

Ecole du Dimanche

Kulonga Bantu

Musoniki: Mama Lorella Rouster
Ministères pour Chaque Enfant

Every Child Ministries (Ministères pour Chaque Enfant)
Ecole du Dimanche Kulonga Bantu par Maman Lorella Rosuter

www.teachingforafrica.com



Mbote mpangi! Tanga lettre yai na ntwala kusadila mukanda yai.

Mbote na beno, beno yonso bampangi ya kele kulonga ecole du dimanche to ya ke zola kuma balongi ya ecodim. Zina na mono Mama Lorella, Directrice Internationale ya Ministère pour Chaque Enfant. Siege ya MCE na Congo kele na Mission Garizim, na zone ya Idiofa, Province de Bandundu. Bureau ya MCE na Kinshasa kele na Maison Gloire a Dieu, Ecole Internationale d'Evangelisation, a Binza IPN. Mono ke na kiese mingi na kusonika mukanda yai sambu na kusadisa beno. Mono me sonika yo sambu mono ke na nzala nde beno yantika kulonga bana na lweka yonso ya beno, mpe nde beno sadisa bana na dibundu na beno ti na bwala na beno na kuzaba ndinga ya Nzambi. Nzambi me pesa mono privilege ya nene ya kulonga bana ndinga ya Nzambi sambu na bamvula 35. Mono ke lomba nde Nzambi ta pesa nge mpe kikesa na kulanda kisalu yai ya nene.

Inki mutindu kusadila mukanda yai? Na kati ya mukanda yai, beto na MCE ta lomba nge kusala mambu tatu:

1. Beto zola ntete nde nge tanga yo mbote-mbote.
2. Beto zola mpe nde nge yindula yo mingi.
3. Beto zola nde nge sonika mvutu ya nge mosi na bangiufula yonso ya beto ta yula na kati ya mukanda.

Mbala na mbala, nge ta mona ligne bonso yai _____ to bonso yai Kana nge mona ligne mutindu yina, nge ta bika kutanga. Nge ta yindula mpila beto kele kuyula nge, ebuna nge ta sonika mvutu ya nge mosi. Na nima nge me sonika mvutu, nge lenda tanga diaka. Mbala mingi nge lenda mona kana yina ya nge sonikaka ikele bonso mvutu beto me pesa. Na nsuka ya konso kapu, beto ta lomba nge na kuvutukila malongi nge me baka, mpe kusala pratique. Beto zola ve nde nge kaka longuka. Beto zola mingi nde nge LONGUKA ti SALA. Kieleka, yina ta pesa kiese mingi na meso ya Nzambi!

Kana nge kele kulanda mukanda yai na seminaire to na classe, nge ta sala bakapu na ndonga ya longi ya seminaire to ya classe yina ta songa nge. Kana nge mosi ke landa mukanda yai, tanga kapu mosi to

zole konso mposo. Yantika nswalu kusala mambu ya nge kele kulonguka. Ata nge zaba kusala mambu yonso ntete ve, tula ngolo kusala yina ya nge me yantika kubakisa. Konso mposo nge ta yika mambu ya mpa. Konso mposo malongi ya nge ta kuma kuluta mbote. Kana nge me manisa mukanda ya mvimba, landa kaka kulonga bana na kintwadi ti dibundu na nge. Yo kele mbote mbala na mbala kuvutukila kapu mosi diaka sambu na kubambuka mbote-mbote inki nge me longuka. Nge lenda kwenda kutala diaka mpe bakapu ya ke tadila bamambu ya kele mpasi sambu na nge. Konso ntangu, meka kusala kuluta mbote.

Kana nge me kuma longi ya ecodim, zaba mbote nde nge kele kusadila dibundu ya Yesu Kristo. Nge kele muntu ya kisalu ya MCE ve. MCE kele kaka nsadi ya kele kusadisa dibundu na formatio ti na materiels ya ecodim. Dibundu kele na kiyeka na zulu ya ecodim na yandi, sambu ecodim kele program na yandi dibundu. Tula ngolo na kulemfuka na responsables ya dibundu, na kuzitisa bo bonso bantwadisi ya Nzambi me pona, mpe kupesa bo kiese. Rapport ya ecodim fweti kwenda na dibundu., sambu ecodim kele program ya dibundu.

Kana balongi kulunga na bwala to na paroisse sika nge kele, solula ti baresponsible kana dibundu lenda yidika lukanu sambu na kuyantika bacellule ya mpa na bisika na lweka ya beno. Nzambi ta baka lukumu mingi kana konso dibundu kifulusa konso bwala na lweka yonso na bo ti ndinga ya Nzambi. Yo pesa Nzambi lukumu ve kana babwala to bisika ya nkaka kele kuwa ve ndinga ya Nzambi, sambu beto bakristo me kangama kaka na kisika mosi.

Nzambi sakumuna nge ti sadisa nge na kisalu yai ya nene! Lumbu ya nge ta kwisa na ntwala ya Yesu Kristo, bika bana mingi kulanda nge, kusonga Yesu nde, "Beto kele awa na zulu sambu beto balulaka ntima na malongi ya longi na beto!"

Mono Maman Lorella

**Ecole du Dimanche
Kulonga Bantu
Beto salaka mukanda yai ntete na 1985.
Beto salaka revisio na yo na 1987, 1994, ti 1998.
Yai kele editio ya 1998.**

*Every Child Ministries
Bureau International
P.O. Box 810
Hebron, IN 46341*

*Ministères pour Chaque Enfant
République Démocratique du Congo*

*Email: Lrouster@ecmafrica.org
Fax: 219-996-4203*

**Mukanda yai ikele kumonika mpe na Lingala, Tshiluba, Francais ti Anglais.
Beto me sonika yo sambu na kusadila yo na baseminaire ya formatio ya ecole du
dimanche. Kana dibundu zola kulomba seminaire ya formatio, pasteur responsable
lenda sonikila beto na adresse na zulu ya dititi yai. Nzambi sakumuna beno!**

MAMBU YA IKELE NA KATI YA MUKANDA YAI:

Kapu Malongi ya Kapu

Dititi

Mbote mpangi, ti Inki mutindu kusadila mukanda yai

KITINI YA NTETE: LONGI YA ECODIM

1. Inki mfunu beto lenda mona na kulonga bana?
2. Nani lenda longa bana?

KITINI YA ZOLE—PROGRAM YA ECODIM

3. Beto longa nani na Ecodim?
4. Beto sala inki na Ecodim?
5. Inki mpila ya kusola ti kutwadisa bankunga?
6. Inki mpila ya kulonga bana kusamba Nzambi?
7. Inki mpila ya kulonga bana baverse ya Bible?
8. Inki mpila kulonga bana kusadila Bible?
9. Inki mpila kulonga bana kupesa makabu?
10. Inki mpila kulonga malongi ya kusadisa na luzingu ya ntoto?
Leso—Paipai, madia ya mbote
Leso—Beto keke bonso beto kudia
Leso—Kana mwana ke sala diare

KITINI YA TATU—MALONGI TO LESO YA BIBLE

11. Inki mpila kusola ndambu ya Bible bonso leso?
12. Inki ikele kikuma to nti ya dilongi ya leso?
13. Inki ikele bitini iya ya konso leso?
14. *Kitini ya ntete ya leso—Kuyantika*
Inki ikele mpila ya mbote kuyantika leso?
15. *Kitini ya zole ya leso—Malongi to histoire ya Bible*
Inki ikele mpila ya mbote kulonga malongi ya Bible?
16. *Kitini ya tatu ya leso—Devoir sambu na bakristo*
Inki mpila ya mbote kubenda bakristo kulemvuka na malongi ya leso?

17. *Kitini ya iya ya lesa—Kubinga*
Inki mpila kubinga bantu kuyamba Yesu?

18. Inki mpila kuyidika lukanu ya lesa?

19. Inki ikele mpila ya mbote na kubambuka diaka baleso ya ntama?

KITINI YA IYA—KUTWADISA BANA NA YESU

20. Kuguluka ikele inki?

21. Inki kele mpila ya mbote kutwadisa bana na Yesu?

KITINI YA TANU—KUSIAMISA BAKWIKIDI

22. Inki mpila kusiamisa bakwikidi ya mpa?

23. Inki kele mpila ya mbote kusadisa na bampasi?

KITINI YA SAMBANU— KUYIDIKA MALONGI NA NIVEAU YA BANTU

24. Inki mpila kuyidika malongi na niveau ya bantu?

Bana ya kele mayele ve

Bana ya bwala

Bana ya fioti

Bana ya le-3e primaire

Bana ya 4e-6e primaire

Bajeune ya le-2e C.O. ti 3e secondaire

Bajeune ya 4e-6e secondaire

Bambuta

KITINI YA NSAMBWADI—ADMINISTRATIO

25. Inki mutindu kusala rapport ya ecodim?

26. Inki mutindu kusala organisatio ya ecodim

27. Inki mutindu kupusa ecodim na kati ya dibundu?

KITINI YA NTETE LONGI YA ECODIM

Kapu ya Ntete Inki Mfunu Beto Lenda Mona Na Kulonga Bana?

Mbala mingi beto banza nde muntu ya nene ikele yandi ya ikele na titre ya luzitu. Beto banza nde bantu ya mfunu ikele bo ya ikele na kiyeka mingi na kati ya dibundu. Beto banza nde bo ya longa bambuta ikele bantu ya nene. Kana beto ke yindula nani ikele nene to mfunu, mbala mingi beto tala mambu bonso lufutu, luzitu, kiyeka, to bilele. Keti yo ikele mpidina ve?

Kisalu ya kulonga bambuta ikele kisalu ya mbote ti ya mfunu, kansi mono zola nde beto bakisa mpe nde kisalu ya kulonga bana ndinga ya Nzambi ikele mfunu mingi, ye banlongi yina ke sala yo na kwikama yonso ikele bantu ya nene na meso ya Nzambi.

Mono tuba nde baraiso nana ya ngolo ikele ya ke songa sambu na inki beto fweti longa bana na bainzo na beto, na babwala na beto, mpe na mabundu na beto. Raiso ya ntete ya beto fweti longa bana ndinga ya Nzambi, yo yai:

1. BANA IKELE MFUNU YE NTALU NA MESO YA NZAMBI.

Beto zaba nde bana ikele mfunu ye ntalu na meso ya Nzambi, sambu Yesu Kristo pesaka ntangu na Yandi sambu na kusakumuna bo. Tala na Matayo 19:13-15. Bantu zolaka nde Yesu sala inki sambu na bana na bo?

.....
Mvutu: Bo zolaka nde Yesu tula bana na bo maboko ti samba Nzambi sambu na bo. Balonguki vandaka na mabanza nde bana vandaka mfunu mingi ve. Inki mpila beto zaba mabanza na bo?

.....
Mvutu: Beto mona mabanza no bo na kati ya bisalu na bo. Bo nganinaka bantu yina zolaka na kunata bana na Yesu. Mbala ya nkaka bo banzaka nde Yesu vandaka na kisalu ya nene, kisalu ya mfunu. Kansi Yesu Kristo ndimaka mabanza na bo ve ata fioti. Balonguki nganinaka bantu yina nataka bana na Yesu, kansi ntangu Yesu monaka yo, Yandi nganinaka BO! Yesu monaka nde mabanza na bo vandaka imbi. Yesu tubaka mambu zole sambu na bana na nzila 14. Inki mambu zole Yandi tubaka?

.....
Mvutu: Yesu tubaka ntete nde beto fweti bikisa bana nde bo kwisa na Yesu, ti ya zole nde beto fweti kanga bo nzila ve na kukwisa na Yesu. Ebuna na nima Yandi tubaka yo, Yandi tulaka bo maboko ye samunaka bo. Ata Yesu vandaka na ksalu mingi na kulonga bambuta, Yandi pesaka ntangu na Yandi sambu na bana. Yandi monaka bo mfunu. Yandi pesaka nsiku nde balonguki na Yandi mpe sala kiteso mosi. Yindula kana mabanza na nge sambu na bana kele inki mutindu. Keti mabanza ya ntima na nge ikele bonso mabanza ya Yesu Kristo? Sonika awa inki mambu fweti kusoba na ntima na nge.

.....
 Ntangu yai, lomba lusadisu ya Nzambi sambu mambu to mabanza yai kusoba. Sonika awa lombilu na nge:

.....
2. BANA IKELE BANKWA MASUMU, YO YINA BO KE NA MFUNU YA KUGULUKA NA YESU.

Mbala mingi beto banza nde bana me sala masumu ve. Beto banza nde Nzambi fweti nata bana yonso na zulu. Keti yo ikele mpidina na bana yonso? Yindula. Keti nge me mona bana ya salaka imbi, ata bo zabaka mbote nde yo vandaka imbi? Ee, beto yonso me mona yo. Mono ke yindula mambu ya mwana ya ntete na beto salaka. Yandi vandaka kaka bamvula tanu ntangu yina. Ntangu beto monaka imbi ya yandi salaka, beto bingaka yandi sambu na kuyula mambu yina. Na ntwala beto yantikaka kuyula yandi, yandi tinaka. Yandi kudibumbaka na nsi ya mbeto. Sambu na inki yandi tinaka?

.....
Mvutu: Yandi tinaka sambu yandi mosi zabaka mbote nde yandi me sala imbi. Yo yina yandi vandaka na boma. Kansi yandi vandaka kaka mwana ya bamvula tanu.

Mbala mingi bana zaba nde bo ke sala imbi, kansi bo mosi sola nzila yina. Mono lenda tuba ve na inki age bana yantika na kusola imbi bo mosi, sambu yo ikele mutindu na konso mutindu na muntu. Mwana ya mayele ya me baka malongi ya mbote lenda zaba inki ikele imbi na age ya 4 to 5, to ndambu ya bana na age ata na nsi na yo. Ya nkaka ikele na mayele mingi ve to bo me baka malongi ya mbote mingi ve, ebuna bo lenda lungisa bamvula 7 to 8 na ntwala bo bakisa imbi ikele inki. Ndambu ya bantu ikele na mayele ve. Ba ta zaba ve nde bo me sala imbi, ata bo kuma bambuta. Mpila ikele ve na kutuba inki age ikele responsible na meso ya Nzambi, kansi Nzambi ikele na mpasi ve na kuzaba yo muntu na muntu.

Kana mwana me kuma na age to na mayele na kuzaba imbi ikele inki, yandi me kuma responsible na meso ya Nzambi. Kana yandi lenda zaba nde nzila mosi ikele imbi, kansi yandi sola na kusala yo, yandi me sala masumu na meso ya Nzambi, ti Nzambi ta mona yandi responsible sambu na masumu na yandi, ata yandi ikele mwana ya fioti. Tala Roma 3:23. Bantu ikwa me sala masumu?

.....
Mvutu: Bantu yonso me sala masumu, ti bana ikele na kati ya bantu yonso. Bana mpe me sala masumu. Roma 6:23. Masumu na beto me natila beto inki mambu ya mpasi?

Mvutu: Masumu na beto me natila beto lufwa ya kimpewe. Kana bana mpe me sala masumu, ebuna bo mpe me zaba lufwa ya kimpewe. Kana bana me sola imbi, ye bo bakisa nde bo me sala imbi, bo ke na mfunu ya kuguluka, bonso bambuta ke na mfunu na yo. Tala Matayo 18:14. Yesu tubaka nde, “Tata na beno yina kele na zulu ke zolaka ve nde, ata leki mosi na kati ya baleki yai kuvila.” Inki mutindu beto zaba nde mpila ikele sambu na bana kuvila?

Mvutu: Kana Nzambi zola ve nde mwana mosi vila, yo ke songa nde MPILA IKELE nde bo kuvila. Mpila ikele. Bo lenda vila, kansi Nzambi ke zola yo ve. Tala Matayo 18:10-13. Na ntwala ya Yesu tubaka kingana ya dimeme mosi ya vilaka, Yesu vandaka kusolula inki?

Mvutu: Yandi vandaka kusolula mambu ya bana. Dimeme ya me vila na kingana na Yandi ikele MWANA. Kana bana me yela ndambu, bo yantika nswalu na kusala imbi, sambu imbi ikele na kati ya ntima na bo, kaka bonso bambuta. Kana bo yantika na kusola nzila ya bo zaba ikele imbi, bo me kuma responsable na meso ya Nzambi.

Mpila beto sala ti bana songa nde yai kele kieleka. Kana bebe ya bilumbu 3 ke dila, beto bula yandi ve. Beto pesa yandi ndola mpe ve, sambu yandi zaba ve yandi ke sala inki. Yandi zaba ve imbi ikele inki. Kansi kana mwana ya bamvula tatu dila kukonda raison, mbala ya nkaka mama to tata ta pesa yandi ndambu ya ndola. Kana mwana ya bamvula nana dila-dila, mbala mingi beto ta pesa yandi ndola, sambu beto zaba nde yandi ke sosa kaka na kusala nzala na yandi mosi. Nzambi ikele juste. Bana ya zaba kima ve, beto ta bika bo na maboko ya Nzambi. Kansi beto fweti bakisa nde mbala mingi, bana ke zaba bo ke sala inki. Bo zaba mbote bo ke sala masumu, kansi bo zola nzila na bo mosi, ebuna bo sala yo.

Nge mona inki? Kana mwana mutindu yina kufwa, yandi ta kwenda wapi? Mpila ikele ve na kukota na zulu kana yandi ikele na masumu. Bible tuba nde bisika na nima ya lufwa ikele zole kaka. Zulu, bwala ya Nzambi kele. Bilungi, zanga ya tiya, bwala ya Satana mpe kele. Kana mwana me sala masumu ti yandi zaba yo, yandi ke na mfunu ya kuguluka na Yesu Kristo. Kana yandi ndima Yesu ve na ntima na yandi, mpila ikele ve na kukota na bwala ya Nzambi.

3. BANA LENDA GULUKA. BO TA KWISA NSWALU NA YESU KRISTO KANA BETO LONGA BO.

Keti nge me mona ciment ya mobisu? Na ntwala yo me yuma, muntu lenda changer yo. Muntu lenda yidika yo na mpila ya nkaka. Mpasu ikele ve na kusala yo. Bana ikele bonso ciment ya mobisu. Muntu lenda changer bo nswalu. Kana malongi ya mbote ikele, bo lenda kwisa na Yesu nswalu. Bo ikele bankwa masumu, ee, kansi bo me baka ntete ve bikalulu MINGI ya bo fweti balula. Bo me longuka bifu ya imbi MINGI ntete ve. Bo mona nswalu mfunu na kutula ntima na Yesu. Na Kuwakana ya Ntama, mukanda ya Longi 12:1 tubaka mpila yai: “Bambuka Musadi na nge na bilumbu ya kileki na nge, na ntwala bilumbu ya imbi ta kwisa, na ntwala bamvula kwisa ya nge ta tuba nde, ‘Mono ke na yo kiese ve’.”

Na nima bana me yela, na nima bo me kuma bambuta, bilumbu ya mbi ta kwisa. Ntangu yina, bifu mingi ti masumu mingi ta vanda me simba bo. Ebuna ntima na bo lenda kwisa nswalu na Yesu mingi diaka ve. Bambuta ikele bonso ciment ya ntama, ciment ya me yuma. Mpila na kubenda bo na Yesu ikele mingi diaka ve.

Bantu me sosa na kuzaba na kati ya bakristo yonso, bantu ikwa me ndima Yesu ntete na kileki na bo, to na kimbuta na bo. Bo yulaka bantu mingi ngiufulu yai: ‘Inki ntangu na moyo na nge nge ndimaka Yesu Kristo ntete? Mvutu bantu pesaka songaka nde bakristo kuluta mingi ndimaka Yesu na kileki na bo. Konso mvula ya kimbuta kele kutula yo kuluta mpasi na kukwisa na Yesu.

Bantu ya nkaka ke mona keti-keti sambu na lukwikilu ya bana. Bo banza nde lukwikilu ya bana ikele ve mbote to ikele ve kieleka bonso lukwikilu ya bambuta. Ebuna bantu yai mona mfunu ve na kulonga bana ndinga ya Nzambi ti na kutwadisa bo na Yesu.

Keti Yesu tulaka keti-keti sambu na lukwikilu ya bana? Tala Matayo 18:6. Nge mona inki?

.....
Mvutu: Yesu tulaka keti-keti ve sambu na lukwikilu ya bana. Yandi tubaka nde, “na kati ya bana yai ya fioti KE TULA NTIMA NA MONO...” Bana lenda tula ntima na Yesu. Yesu Yandi mosi tubaka yo!

Tala na Matayo 18:1-3. Yesu tubaka ve nde bana fweti kituka bonso bambuta na lukwikilu na bo, kansi nde inki?

.....
Mvutu: Yesu tubaka ve nde bana soba bikalulu sambu bo kuma bonso bambuta, kansi Yandi tubaka nde bambuta fweti soba bikalulu kukuma bonso bana! Tala diaka Marko 10:15. Lukwikilu ya kieleka ya ke lunga na meso ya Nzambi ikele inki mutindu?

.....
Mvutu: Yesu tubaka nde lukwikilu ya kieleka ikele “mutindu mwana ke ndimaka yo.” Lukwikilu ya bana ikele lukwikilu ya ngolo, lukwikilu ya kieleka, lukwikilu ya Nzambi keke kundima! Bika beto longa bana ndinga ya Nzambi, sambu kana beto longa bo mbote, nswalu bo ta balula ntima ye bo ta kituka bantu ya mpa na kati ya Yesu Kristo.

4. BANA LENDA SADILA YESU NA KIMWANA NA BO KAKA, TI NA MOYO YA MVIMBA NA BO.

Raiso ya iya ya beto fweti longa bana na beto, yo yai: Kana bana ndima Yesu Kristo na kimwana na bo, bo bantu lenda sadila Yandi yantika na kimwana na bo tii na nsuka ya moyo na bo.

Yo ikele ve kaka bambuta ya lenda sadisa ti sadila dibundu. Yo ikele kaka bambuta mpamba ve ya lenda twadisa bantu ya nkaka na Yesu. Yo ikele kaka bambuta mpamba ve ya lenda lombi Nzambi ti baka mvutu na lombilu na bo. Yo keke kaka bambuta mpamba ve ya lenda pesa Nzambi kiese na bisambu ti na luzingu na bo. Bakristo ya konso age lenda sala mambu yai. Bana mpe lenda sadila Yesu, ata na kimwana na bo!

Keti nge lenda bambuka bana na kati ya Bible ya sadisaka dibundu? Tala Bisalu kapu 12. Yo ikele histoire ya mwana-nkento Roda. Yandi lomilaka Ntumwa Piere Nzambi sikamosi ti bambuta. Mono banza nde yo vandaka lombilu ya Roda ya katulaka Piere na prison, sambu nge ta mona nde bambuta yina kwikilaka ve ntangu Nzambi pesaka bo mvutu. Kaka mwana Roda kwikilaka yo. Lombilu ti lukwikilu ya mwana-nkento yai sadisaka dibundu. Kana Piere fwaka na prison ntangu yina, beto zolaka ve kuvanda na mikanda ya 1 ti 2 Piere na baBible na beto bubuyai. Mikanda yina, na sens mosi, ikele makabu mwana nkento yai Roda pesaka dibundu. Ya kieleka, mwana yai gulusaka moyo ya Piere na lombilu na yandi.

Inki ikele mpila mosi bana lenda sadisa dibundu?

.....
Mvutu: Bana lenda sadisa dibundu na lombilu na bo, sambu bo ikele na lukwikilu ya ngolo. Na Bisalu kapu 23 nge lenda mona diaka mpila ya mwana-bakala mosi gulusaka moyo ya Ntumwa Paulo. Beto zolaka kuvanda ve na mikanda 12 to 13 ya Ntuma Paulo sonikaka, kana mwana yai sadisaka dibundu ve. Mwana yina salaka inki?

.....
Mvutu: Mwana yina songaka bapoli nde bantu vandaka na lukanu nde bo fweti kufwa Paulo. Kikesa ya mwana yai kutuba mambu ya kieleka na ntwala ya bambuta yo gulusaka moyo ya Paulo.

Bu Andre kwisaka na Yesu, mambu ya ntete yandi salaka vandaka na kunata mbuta na yandi Simon Piere na Yesu (tala Yoane 1:41). Mono me mona mbala mingi, kana mwana me ndima Yesu, ntangu fami mona kubalula ya nene keke kota na luzingu ya mwana yina, bo mpe zola ndima Yesu. Mwana lenda twadisa fami ya mvimba na Yesu Kristo. Bantu lenda twadisa fami na Yesu.

Keti nge mosi me zaba fami ya kwisaka na Yesu sambu bana na bo ntete ndimaka Yandi? Nani?

Mvutu: Inki zina nge sonikaka? Yo me salama mbala mingi nde bana twadisaka fami na bo na Yesu. Na Etats-Unis, mwana nkento mosi bondilaka tata na yandi kukwisa na ecole du dimanche nzila mosi ti yandi. Tata vandaka mukristo ve. Yandi zolaka mambu ya Nzambi ata fioti ve. Yandi silaka mwana nde yandi ta kwisa kaka sambu na kudila na yandi, kansi tata yina tubaka nde yandi ta kota ve nzo-Nzambi. Kaka yandi ta tula dikulu mosi na kati ya kielo. Ntangu yandi kwisaka na nzo-Nzambi, mwana bendaka ngolo na diboko ya tata. Yandi kotaka, ye yandi waka ndinga ya Nzambi. Yandi ndimaka Yesu bonso Mvulusi na yandi. Na nima, yandi zolaka mingi kukwisa na nzo-Nzambi. Yandi tambulaka na bisika mingi sambu na kusadisa babwala mingi kuyantika ecole du dimanche. Yandi mosi yantikaka baecole du dimanche na babwala 1300 ya Etats-Unis, ntangu yo vandaka kaka nsi ya mpa. Yandi twadisaka bantu bamille na Yesu. Tala mpila mwana-nkento na yandi sadisaka dibundu! Inki kele mpila mosi bana lenda sadisa dibundu?

Mvutu: Bana ikele na mpila ya mbote kubenda fami na bo na Yesu. Ata luzingu na bo, kana bambuta mona nde Yesu ke sadisa bo.

Bana lenda kudipesa moyo na bo ya mvimba na Nzambi. Kaka bo mpamba lenda sala yo, sambu bambuta ikele na moyo ya mvimba na ntwala na bo diaka ve. Tala Roma 12:1. Ntumwa Paulo bondilaka bakristo nde bo kudipesa na Nzambi. Kansi yindula. Kana muntu kwisa na Yesu na age ya 60, yandi lenda pesa bamvula ikwa na Nzambi? Ata kana yandi kwisa na age ya 30, bamvula mingi yandi me losa na nzila ya masumu. Nzambi zola nde bakristo yonso kudipesa na Yandi, kansi KAKA BANA ikele na moyo na bo ya mvimba na ntwala na bo. Bantu yonso lenda pesa ndambu ya ntangu, ndambu ya bamvula na Yesu, kansi kaka bana lenda pesa moyo na bo ya mvimba na Yesu. Nani lenda pesa makabu ya kuluta mbote, muntu ya age ya 40, keti mwana ya age ya 8? Nge mona inki?

Mvutu: Mono banza nde mwana lenda pesa makabu ya kuluta mbote na Nzambi, sambu yandi lenda kudipesa moyo na yandi ya mvimba. Yandi lenda sadila Nzambi na kimwana na yandi, mpe na kimbuta na yandi.

Keti nge me mona mwana awa na Congo kusadila Yesu ti kusadisa dibundu na mpila ya mbote? Nge me mona nani? Yandi salaka inki mambu ya mbote sambu na kusadila Yesu?

Kana nge me mona mambu yina ntete ve, tala mbote. Mono banza nde nge mpe ta mona bana ke sadila Nzambi na dibundu na nge! Kansi, kana beto mona mingi ve nde bana ke sadila Yesu, mbala ya nkaka yo ke songa nde beto kele kulonga bo ndinga ya Nzambi mingi ve. Bika beto longa bo ti twadisa bo na Yesu. Ebuna bana ya nkaka ta baka kikesa. Bo ta yantika na kusadila Yesu. Bo ta kuma bansadisi ya dibundu.

5. BANA IKELE DIBUNDU YA MBASI, LETA YA MBASI, BATATA TI BAMAMA YA MBASI.

Bo ya ikele bana bubuyai, bo ta vanda bana ntangu mingi ve. Ntama ve, bo ta kuma bajeune, bambuta, ye bantwadisi ya dibundu. Bo ta kuma batata ti bamama. Bo ta kuma bantwadisi ya leta. Konso muntu ya ta vanda ntwadisi na nima ya bamvula 20 to 30, ikele inki bubuyai?

Mvutu: Yandi kele mwana bubuyai, ye nge ti balongi ya nkaka ikele na mpila kulonga yandi bubuyai ti kutwadisa yandi na nzila ya kieleka sambu yandi kuma ntwadisi ya

mbote. Zaba nde, kana nge ke longa mwana, nge ke longa mwana kaka ve. Nge ke longa ntwadisi ya dibundu ya mbasi, mfumu ya mbasi, to ntwadisi ya fami ya mbasi. Yindula bazina ya bantu ya ke twadisa dibundu ti leta bubuyai. Sonika bazina na bo awa:

.....
Mvutu: Nge me sonika bazina ya bantu. Zaba nde bantu yai yonso vandaka ntete bana. Nani ta vanda bantwadisi na ntangu ke kwisa? Beto zaba ve, kansi beto zaba nde bo ikele bana sesepeiyai, to, bantu ta buta, ti bo ta vanda bana mbasi. Kana dibundu longa bana yonso ndinga ya Nzambi, yo mpe ta longa bantwadisi ya mbasi.

Kana beto longa bana ndinga ya Nzambi ve, ebuna beto fweti bakisa nde ntangu beto bambuta ta kufwa, Kikristo yonso ta fwa sikamosi ti beto. Lukwikilu na Yesu ta vanda diaka ve na ntoto yai. Bana ta tanga zina ya Yesu bonso Mfumu na bo diaka ve. Inki mpila bantu ta landa Yesu na ntangu ke kwisa? Bo ta landa Yandi kaka kana beto longa bana na beto malongi na Yandi.

Nge zaba ndambu ya histoire awa na Congo. Keti nge lenda zaba babwala ya vandaka ntete ngolo na mambu ya Nzambi, kansi bubuyai bo ikele ngolo diaka ve? Sonika awa inki nge me mona:

.....
Mvutu: Kana babwala vandaka ngolo na lukwikilu, kansi bo ikele ngolo diaka ve, zaba nde batata, bamama ti bantwadisi ya dibundu me lunga ve na mambu ya kulonga bana ndinga ya Nzambi. Mambu yai bwilaka baYuda mpe. Yosue vandaka ntwadisi mosi ya ngolo ti ya mbote. Tala Yosue 24:24. Na nsi ya malongi ya Yosue, bantu silaka inki na Nzambi?

.....
Mvutu: Bo silaka nde bo ta sadila Mfumu Nzambi, mpe nde bo ta lemfuka na ndinga na Yandi. Bo lungisaka nsilulu na bo. Tala Yosue 24:31. Ntangu ikwa bo salaka mambu ya bo silaka?

.....
Mvutu: Bo lungisaka nsilulu na kulanda Nzambi bilumbu yonso ya moyo ya Yosue. Bo sadilaka Nzambi mpe bilumbu yonso ya bambuta yai, bo mosi zabaka ti sadilaka Nzambi. Kansi mawa mingi! Bo twadisaka bana na bo na nzila ya Nzambi ve. Tala Bazuzu 2:12-13. Na nima bo mosi fwaka, bana na bo vilaka nzila ya Nzambi ti sadilaka biteki na bo. Nzambi vandaka na makasi mingi sambu na mbi bo salaka, yo zina Yandi singaka nsi na bo. O mawa, mawa, sambu bantu yai twadisaka bana na bo ve na nzila ya Nzambi!

Na nima ya bamvula 20, inki mutindu bantwadisi ya dibundu ta vanda? Na nima ya bamvula 30? 50? Mambote ya dibundu ya ntangu ke kwisa, yo ikele mingi na diboko ya beto bubuyai. Beto bantu ke na mpila ya kulonga bana yina ya ta kuma bantwadisi ya dibundu.

Beto zaba nde muntu ya me butuka na kimpeve ve, yandi lenda bakisa mambu ya kimpeve ve. Ata yandi lenda vanda na kati ya bisambu ya bakristo, ata yandi lenda tuba bandinga bonso bakristo ke tubakaka, ata yandi baka bidimbu ya bakristo bonso mbotika to mbundana, kana yandi me butuka ya kimpeve ve, yandi ta sosa ve mambu ya kimpeve. Yandi ta bakisa yo ve, yandi mpe ta zola yo ve. Tala 1 Korinto 2:14. Yo ke tuba inki sambu na muntu ya ke konda Mpeve?

.....
Mvutu: Verse yai ke songa beto nde muntu yina ke na Mpeve ya Nzambi ve, yandi lenda baka to yamba mambu ya kimpeve ve. Yandi ke na mpila ve na kubakisa yo, sambu yo me katuka na Mpeve ya Nzambi, kansi yandi ke na Mpeve ve na ntima na yandi. Yandi ke yindula nde yo kele kaka mambu ya buzoba. Inki mutindu muntu lenda mona mfunu na yo?

Mvutu: Muntu lenda mona mfunu na yo kaka na kimpeve. Yo yina, mfunu ikele na kuvanda na Mpeve ya Nzambi. Kana beto twadisa bana na Yesu Kristo ve, bo ta vanda na Mpeve ya Nzambi ve. Mbala ya nkaka bo lenda longuka bandinga bonso bakristo ke tubaka, kansi kukonda kuzaba Yesu. Mbala ya nkaka bo lenda kwisa na bisambu. Mbala ya nkaka bo ta monika bonso bakristo. Bo lenda yimba na chorale. Bo lenda botama ti bo lenda kota na dibundu. Keti mambu yai ta tula bo na nzila ya Nzambi?

Mvutu: Ikele ve. Bo ta vanda na nzila ya Nzambi kaka kana bo balula ntima ti tula lukwikilu na Yesu Kristo. Kukonda yo, mambu yai yonso ya nkaka kulenda ve pesa Nzambi kiese. Tala Roma 8:9. Inki mutindu muntu keke kubaka Mpeve ya Nzambi?

Mvutu: Nzambi ke pesa Mpeve na Yandi kaka na ntangu muntu pindula mabanza na Yesu Kristo ti tula ntima na Yandi bonso Mvulusi mpe Mfumu. Konso mukristo ikele na Mpeve ya Nzambi, kansi ata muntu mosi ya nkaka ve ikele na Mpeve. Bana mpe lenda bakisa mambu ya kimpeve kaka na nima bo tula ntima na Yesu. Kana bo kuma bantwadisi ye bambuta ya dibundu, kansi bo zaba Yesu ya kieleka ve na ntima na bo, bo ta landa mambu ya kimuntu kaka. Bo ta sadila dibundu sambu na kusosa mambote na bo mosi kaka. Luvunu, kimpala, kunwana, lulendo—yai yonso ta kota mingi na kati ya dibundu. Inki mutindu beto lenda sadisa nde mambu yai kusalama ve?

Mvutu: Mono kwikila nde beto lenda sadisa mambu yai kana beto longa bana mambu ya Yesu, mpe kana beto twadisa bo na kutula ntima na Yandi. Yo yina bo ta kuma bakristo kaka na munoko mpamba ve, kansi bakristo ya kieleka na ntima. Yo ikele ve nde bo ta monika bonso bakristo na meso ya bantu kaka, kansi bo ta monika ya kieleka bakristo na meso ya Nzambi. Kana beto twadisa bana na beto na Yesu ti longa bo nzila ya kieleka, bo ta landa mambu ya kimpeve. Bo ta zaba Bible kuluta mingi, yo yina bo ta vanda bantwadisi ya mbote. Bo ta twadisa dibundu na nzila ya mbote. Tala Roma 10:14. Na ntwala bana lenda samba Nzambi, bo fweti sala inki ntete?

Mvutu: Ntete, na ntwala bantu lenda samba Nzambi, bo fweti tula ntima na Yandi. Roma 10:14 keke kuyula, “Inki mutindu bantu lenda samba Mfumu, kana bo me tulaka ntima na Yandi ntete ve?” Na ntwala bana lenda tula ntima na Yesu, beto bantwadisi fweti sala inki?

Mvutu: Beto fweti longa ye samuna ndinga ya Nzambi na mpila nde bo lenda kuwa yo mpe bakisa yo. Kana beto zola nde bantu tula ntima na Yesu, beto fweti longa bo nsangu na Yandi ntete. Kana beto zola nde bantwadisi na ntangu ke kwisa kuzaba Yesu, beto fweti longa bana bubuyai. Kana beto zola nde bantwadisi na ntangu ke kwisa landa mambu ya kimpeve, beto fweti longa bana ndinga ya Nzambi bubuyai, ntangu bo lenda kwisa nswalu na Yesu.

6. NZAMBI ME TUBA NDE BETO FWETI LONGA BANA. Mbote beto lemfuka na ndinga na Yandi.

Katuka na ntangu ya Kuwakana ya Ntama, Nzambi songaka bantu na Yandi nde bo fweti longa bana na bo. Tala Kulonga 6:2,6,7, ti vs. 20-25. Yindula mingi verse 7. Nzambi songaka nde beto TULA NGOLO na kulonga bana, ti nde beto sala yo KONSU NTANGU, nde beto baka ntangu yonso yandi me pesa beto na kusala yo. Keti baverse yai tuba nde beto lunga sala yo kaka ndambu, kaka kana beto zola? Nge mona inki?

Mvutu: Ikele ve. Nzambi me songa to me tuba nde beto fweti tula ngolo konso ntangu na kulonga bana na beto. Ata na suka, ata na mwini, ata na mpimpa, konso ntangu beto fweti sala ngolo na kulonga bana na beto.

Kana ata raison mosi ya nkaka vandaka ve, kaka raison yai mosi ta lunga. Nzambi me songa to Yandi me commander beto na kulonga bana na beto. Beto ke binga Yandi “Mfumu,” yo yina beto fweti sala yonso ya Yandi kele kutuba na beto.

7. DIBUNDU YA NTETE PESAKA MBANDU NA KUTWADISA BANA NA YESU.

Tala Efezo 6:4. Ntumwa Paulo vandaka muntu ya sonikaka mukanda yai na dibundu ya bwala Efezo. Paulo songaka nde bibuti fweti longa bana na bo inki mambu?

Mvutu: Paulo songaka nde bo fweti longa bo mambu ya kikristo. Inki kele disongidila ya ndinga yai “Kikristo”?

Mvutu: Kikristo ke zola kutuba mambu ya luzingu ya bakristo. Kikristo ikele mambu yonso ya beto bakristo fweti sala, ye mambu yonso va beto fweti buya. Kikristo ikele mambu yonso beto lenda sala sambu na kupesa Nzambi kiesse ti lukumu na nima beto me kuma bakristo. Kana ntumwa Paulo ke tuba nde beto longa bana na beto mambu ya kikristo, yandi ke songa nde bo me kuma bakristo ntete. Yandi ke tuba nde bana yai me ndima Yesu Kristo. Bo me kota na moyo na Yandi. Ebuna, bo lenda baka mbote malongi ya kikristo, sambu mambu ya kikristo ikele sambu na bavidi ve. Yo kele kaka sambu na bakristo. Tala 1 Korinto 2:14. Kana muntu me ndima Yesu ntete ve na luzingu na yandi, yandi ke na mpila ve na kubakisa inki mambu?

Mvutu: Yandi lenda ve bakisa mambu yonso ya ke katuka na Mpeve ya Nzambi. Yandi ikele ve na Mpeve ya Nzambi na kati na yandi, yo yina yandi lenda bakisa mpe ve mambu yonso ye kimpeve. Yandi ke banza nde yo ikele kaka mambu ya buzoba. Paulo ke songa bibuti na kulonga bana mambu ya kikristo. Yo yina, yandi ke tuba nde bo lenda bakisa mambu ya kikristo. Yandi ke tuba nde bo me kuma bakristo dezia. Yandi ke tuba nde muntu me twadisa bo na Yesu dezia, Paulo zabaka nde batata ti bamama na dibundu ya Efezo me twadisa bana na bo na Yesu.

Bana yina, bo me kuma bakristo dezia. Yo yina, Paulo songaka bibuti nde bo fweti longa bana yai mambu ya kikristo sambu bo ta zaba inki mutindu bo lenda pesa Nzambi kiesse. Bana mingi na dibundu vandaka bakristo. Tala Efezo 6:1. Keti Paulo ke tuba na bana na kati ya dibundu to na nganda no yo?

Mvutu: Yandi ke tuba na bana ya kele na kati ya dibundu, bana ya ikele dezia bakristo. Tala mpe Efezo 1:1. Kana mpila ikele, tanga yo na Luwawana (traductio ya ntama ya Kituba) to na français. Tala nde Paulo ke sonika mukanda ya Efezo na bantu ya ikele bakristo. Yandi ke binga bo basantu to banlongo ya Nzambi.

Tala Tite 1:6. Kana dibundu zolaka kutula muntu bonso mbuta ya dibundu, bo talaka bana na yandi. Bana na yandi fweti vanda inki mutindu?

Mvutu: Bana ya mbuta ya dibundu fweti vanda ntete bakristo. Ya zole, bo fweti vanda bana ya luzitu ya ke landa nzila ya Nzambi mbote. Kana Ntumwa Paulo lenda tuba nsiku bonso yai, yo ke songa nde bantu mingi na dibundu twadisaka bana na bo no Yesu. Dibundu ya ntete me pesa beto mbandu mosi ya mbote na mambu yai. Mbote beto mpe twadisa bana na beto na Yesu, bonso bakristo ya ntama vandaka kusala!

8. MAKABU IKELE SAMBU NA BO YA TWADISA BANA NA YESU,

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



KANSI NDOLA SAMBU NA BO YA TWADISA BO NA NZILA YA IMBI.

Tala Luka 9:46-48. Yesu tubaka nde kana beto yamba mwana mosi, muntu lenda tuba nde beto me yamba Yandi mosi. Yesu zolaka beto na kubaka mabanza nde bana ikele mfunu. Yesu ke tuba nde mfunu ya bana ikele bonso mfunu ya Yandi mosi. Kana beto yamba mwana mosi na ecole du dimanche, Yesu ke baka yo bonso beto me yamba Yandi mosi, sambu ya kieleka beto ke sala yo sambu na kupesa Yandi kiese.

Balonguki ya Yesu vanda na kusolula ngiuula yai, “Nani me luta nene?” Yesu ke pesa mvutu yai, nde muntu ya nene ikele muntu ya ke sadila bana ya fioti. Nzambi me sila makabu ya nene na bo ya longa bana, mpe ndola ya nene na bo ya benda bana na kusala masumu. Tala Mayayo 10:42. Nzambi ta pesa makabu na bo ya sala inki?

Mvutu: Yandi ta pesa makabu na bantu yonso yina pesa ata dikopa mosi ya masa na mulonguki yina kele mfunu ve. Dikopa ya masa ikele kima ya fioti ya bantu ke mona mfunu ve. Mbala ya nkaka, kana nge longa bana, bantu ya nkaka ta mona kosalu na nge mfunu ve. Bo ta mona yo kima mosi ya fioti. Kansi tala nde Nzambi ke mona yo kosalu mosi ya nene, mpe ya mfunu. Nge ke pesa kaka masa ya luzingu yai ve, kansi masa ya moyo, masa ya kimpeve. Inki me luta mfunu—mabanza ya bantu sambu na kosalu na nge, to mabanza ya Nzambi sambu na yo?

Mvutu: Mabanza ya Nzambi fweti vanda mfunu MINGI MINGI, kansi mabanza ya bantu ikele mfunu mingi ve.

Makabu Nzambi ta pesa beto ya ke sadila Yesu, yo ta vanda inki? Mono me mona makabu tatu na kati ya Bible. Makabu ya ntete ikele mpu ya lukumu ya Nzambi ta pesa beto. Bible tuba nde bakristo lenda baka mpu ya lukumu sambu na mpila bo me sadila Yesu. Tala 1 Korinto 9:25, 1 Piere 5:4, ti Kusonga 2:10.

Beto ta sala inki ti bampu yina? Keti Nzambi ta pesa beto yo kaka sambu na lukumu ya beto mosi? Ikele ve! Bible ke tuba nde beto yonso ta zola kupesa Yesu lukumu sambu Yandi me gulusa beto, yo yina beto ta sala inki? (Kusonga 4:10)

Mono me tuba nde mono me mona bamakabu tatu sambu na bo ya sadila Yesu na kwikama yonso. Ntete ikele bampu ya lukumu. Makabu ya zole ikele baconverti to bantu ya beto me twadisa na Yesu. Ntumwa Paulo songaka bakristo ya yandi twadisaka na Yesu nde bo vandaka kidimbu ya songaka nde yandi me lunga. Ya kieleka, yandi bingaka bo “mpu ya pesa kiese” (Filipo 4:1). Kana nge kuma na bwala ya Nzambi, ti nge mona kuna bantu ya nge twadisaka na Yesu, keti yo ta pesa nge kiese?

Mvutu: Yo fweti pesa kiese mingi. Mbala ya nkaka muntu ta kwisa na nge kuna na zulu, ya ta tuba nde, “Mpangi, matondo mingi. Mono vandaka na nzila ya lufwa, kansi mono ikele awa bubuyai na bwala ya Nzambi sambu nge twadisaka mono na Yesu.” Kana nge kuwa muntu tubila nge bonso yai, keti yo ta vanda makabu ya mbote?

Sambu na mono, yo ta vanda makabu mosi ya mosi. Beto me mona de makabu ya ntete ikele mpu ya lukumu, ya zole ikele bantu beto me twadisa na Yesu. Makabu ya tatu ikele ndinga ya Yesu Yandi mosi, “Nge me sala kosalu mosi ya mbote, sielo na Mono.” Mambu ve kana bantu ndima kosalu na mono ve. Mambu ya nene ikele kana Yesu ke ndima yo. Makabu ya kuluta mbote sambu na mono ta

vanda bandinga ya Yesu, “Nge me sala mbote? Kiese ya kuluta ta vanda kana Yesu lenda binga mono, “sielo na mono.” Keti nge ke mona bandinga yai bonso makabu ya mbote sambu na kisalu na nge?

YINDULA DIAKA

Manisa baphrase yai sambu na kubambuka diaka mfunu ya kulonga bana.

Kulonga bana kele mfunu:

1. sambu bana
2. sambu bana
3. sambu bana
4. sambu bana
5. sambu bana
6. sambu Nzambi
7. sambu dibundu ya ntete
8. sambu makabu

YINDULA MBOTE.

Mono me songa baraison mingi ya beto fweti longa bana ndinga ya Nzambi. Ntangu yai, mono zola yula nge: Keti nge ta ndima na kusala yo? Keti nge ta longa ntete bana na nge mosi ti bampangi penepene na nge? Kana dibundu ndima nde Nzambi me pesa nge makabu ya kulonga bana na dibundu, keti nge ta ndima mpe na kulonga ecole du dimanche?

INKI NSILULU NGE LENDA TUBA NA Ntwala ya Nzambi na Mambu yai? SONIKA YA AWA.

Kapu ya Zole Nani Lenda Longa Bana?

Bantu mingi ikele na mfunu na kulonga bana—batata ti bamama na fami, balongi na nzo-nkanda, badiacre, bacatechiste ti bapasteur na dibundu. Kansi na kapu yai beto zola kusolula mambu ke tadila balongi ya ecole du dimanche. Nani lenda longa bana na ecole du dimanche? To na club ya Bible?

Nani ta lunga sambu na kuvanda longi ya bana na kati ya dibundu, bonso na ecole du dimanche to na club ya Bible? Longi ya ecodim lenda vanda bakala to nkento. Yandi lenda vanda celebataire to marie. Yandi lenda vanda jeune ya age bonso 16, 17 to 18 kana dibundu me ndima yandi. To yandi lenda vanda ndambu mbuta kana kikesa ti ngolo ikele ti niveau ikele ya kulunga. Mambu yai yonso—bakala to nkento, age, etc.—yo kele mfunu ve, kansi mambu ya nkaka ikele mfunu mingi. Beto kele kusosa mambu sambanu kumonika na kati ya bantu ya zola kuma balongi ya ecole du dimanche. Kana muntu ke lunga na mambu yai yonso sambanu, beto kwikila nde yandi ta vanda longi mosi ya mbote sambu na kulonga bana na ecole du dimanche.

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



Malongi yai lenda sadisa baresponsible ya kusosa bantu ya kulunga sambu na kulonga ecole du dimanche. Yo mpe lenda sadisa balongi, sambu yo ke songa inki muntindu bo fweti sosa kuvanda.

1. LONGI FWETI ZABA NDE YANDI ME GULUKA YANDI MOSI.

Sambu na inki yo kele mfunu nde konso longi zaba Yesu na luzingu na yandi mosi ntete?

Luka 6:39

.....
1 Yoane 5:13-14

Inki kingonza nge mona kana longi zaba Yesu ve?

.....
Keti nge kele sure nde nge zaba Yesu, to keti nge zola lusadisu na mambu yai?

.....
Inki ntangu ti na inki mutindu nge tulaka ntima naYandi?

.....
NB: Kana nge ke na mfunu ya lusadisu na mambu yai, solula ti ntwadisi ya kele kulonga seminaire yai ya formatio, to na pasteur responsible na bwala na nge.

2. LONGI FWETI VANDA MUKRISTO YA ME BOTAMA, YE KELE KUZINGA NA KINTWADI YA MBOTE NA KATI YA DIBUNDU.

Yo kele mfunu mingi nde longi ya ecodim vanda mukristo ya me botama to ya kele kulanda malongi ya mbotika. Yesu Yandi mosi pesaka nsiku nde dibundu botika bakwikidi (Matayo 28:19). Mbotika kele mambu ya ntete ya mukristo fweti lungisa na nima yandi me balula ntima na yandi. Kana longi kele kubuya mbotika, inki mutindu bana ya ecodim ta vanda na kiese sambu na kukota na kintwadi ya dibundu? Longi fweti vanda muntu ya kele kuzinga na kintwadi ya mbote na kati ya dibundu. Yandi lenda vanda ve muntu ya ke tula mavanga na kati ya bakristo, kansi yandi fweti vanda muntu ya kele kuzinga na ngemba ti na kiese na kati ya bantu. Yandi lenda vanda ve muntu ya ke zaba ve bantwadisi to bansiku ya dibundu, kansi yandi fweti vanda mukristo ya kele kulemfuka na ntima mosi ya mbote, ya kele na luzitu na kati ya dibundu. Yandi fweti vanda muntu ya lenda ndima mwa-lusadisu ya dibundu lenda pesa yandi kukonda kubokuta nde lufutu na yandi kele kulunga ve. Yandi lenda vanda ve muntu ya kele kuzinga na masumu ya dibundu kele kundima ve, kansi yandi fweti vanda mukristo ya kele kulanda mbote nzila ya Nzambi. Yandi ta vanda mbandu ya bantu mingi ta landa.

Baverse yai ke songa nde longi fweti vanda inki mutindu?
Roma 2:19-22

.....
Matayo 5:18-19

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



.....
Sambu na inki Ntumwa Paulo vandaka na kikesa?
1 Korinto 4:16, 11:1

.....
Balongi fweti bakisa inki?
Yakobo 3:1

.....
Nge kele inki mutindu ti dibundu? Inki mambu ya mpasi nge kele kumona?

.....
Nge ta sala inki sambu na kuyidika mambu yina? Nge ta sala yo inki ntangu? (Kana makambu ikele, mbote kusolula yo ti responsable ya dibundu.)

.....
Keti nge me bakisa inki lusadisu dibundu lenda pesa nge bonso mwa-prime? Solula mambu yai ti pasteur responsable. Sonika awa mvutu na yandi.

.....
Keti nge lenda ndima mvutu yandi pesaka? Bambuka nde “kana nge benda masa ya dilala, nge ta baka menga ve.” Kingana yai zola tuba nde kana dibundu kele nsukami, yo ta vanda na mpila ve na kusadisa bantwadisi na yo mbote. Keti nge lenda ndima mpila dibundu na nge lenda sala?

3. LONGI FWETI VANDA MUNTU YA NIVEAU YA KULUNGA SAMBU NA CLASSE YANDI TA LONGA

Kana longi me zaba ve kutanga mbote, kana yandi kele kutanga malembe malembe, konso ntangu kaka na mpasi, inki mutindu yandi ta yidika lesu ya Bible na ntwala ya kulonga? Yo ta vanda mpasi sambu na yandi. Kana yandi zaba ve kusonika mbote, inki mutindu yandi ta sonika lukano ya lesu to rapport ya ecodim? Konso longi fweti zaba kutanga ti kusonika mbote. Beto tuba nde niveau ya longi fweti luta niveau ya bana yandi kele kulonga. Pasteur fweti yindula niveau ya bana na konso classe. Yandi fweti sosa balongi ya me luta mbote niveau ya bana yina. Kana ve, yo ta vanda mpasi sambu na bana na kuzitisa longi yina.

Keti niveau na nge ta lunga? _____ Inki classe nge lenda longa? _____

4. LONGI FWETI TULA NGOLO NA KUZABA BIBLE MBOTE.

Yo kele mfunu ve nde longi ya ecodim vanda pasteur. Yo kele mfunu ve nde yandi zaba français. Yo kele mfunu ve nde yandi manisa ntete ecole biblique. Yo kele mfunu ve nde yandi vanda na diplome d’etat. Yandi LENDA vanda muntu mutindu yina, kansi yandi FWETI vanda mutindu yina ve. Kansi mfunu ikele nde yandi vanda muntu ya kele kutanga Bible, ya kele kulunguka Bible konso ntangu. Yandi fweti vanda muntu ya kele kutula ngolo kuzaba Bible mbote.

Sambu na inki yo kele mfunu na kuzaba Bible? Roma 10:14, 17

.....
Bankunga 119:11, 119:97-100

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



5. LONGI FWETI VANDA MUNTU YA KUDIPESA

Longi fweti sala ngolo konso ntangu na ksalu ya Nzambi. Yandi fweti bakisa nde kulonga bana ta lomba KISALU. Dibundu ya Yesu keke kusosa ve bantu ya zola sala kaka ndambu-ndambu. Dibundu keke kusosa ve banlongi ya ta longa ngonda mosi, kansi nswalu bo ta bika ksalu. Dibundu keke kusosa banlongi ya ta sadila Yesu na kwikama yonso, ata na kiese, ata na mpasi.

Mbala mingi balongi ya ecole lenda vanda mpe balongi ya mbote ya ecodim. Bo me bakisa dezia inki mutindu kuyidika lesu, etc. Kansi, kana bo me lembe mingi ya kulonga bilumbu tanu, bo ta vanda na ngolo mingi diaka ve na kulonga na dimanche. Mbala mingi bajeunes ya ecole secondaire lenda kuma balongi ya ngolo ya ecodim.

Sambu na inki bakristo fweti vanda ngolo konso ntangu na ksalu ya Yesu?

Roma 12:1

Matayo 6:24

Matayo 6:33

1 Korinto 15:58

Yindula ndinga yai “kudipesa”. Yo zola tuba inki?

Inki mutindu beto lenda zaba kana longi ya ecodim keke kudipesa na ksalu ya Nzambi?

Inki mambu keke mpasi sambu na nge na makambu yai ya kudipesa na ksalu?

Sosa mukristo mosi ya lenda tula nge na lombilu sambu na mambu yina. Kana nge me samba ti muntu ya nkaka, sonika zina na yandi awa:

6. LONGI FWETI VANDA MUNTU YA NZAMBI ME PESA MAKABU YA KULONGA

Konso mukristo keke na bamakabu ya kimpeve ya mutindu na mutindu (Korinto 12:4-7). Mosi na kati ya bamakabu yina keke makabu ya kulonga (1 Korinto 12:28, Efezo 4:11). Keti bakristo yonso ya mbote keke na makabu ya kulonga? (1 Korinto 12:29).

Mvutu: Keke ve nde kana mukristo keke zinga na kimpeve, yandi ta vanda longi. Nzambi me pesa konso mukristo makabu na yandi. Ya nkaka keke na makabu ya kulonga. Bakristo yai ta vanda balongi ya mbote

ya ecodim. Ya nkaka kele bakristo ya mbote mpe, kansi Nzambi me pesa bo makabu ya nkaka. Bo ta vanda ve balongi ya mbote, ata bo vanda bakristo ya kwikama.

Inki mutindu muntu lenda zaba makabu na yandi? Mbala mingi yandi fweti kaka meka kusala bamambu mutindu na mutindu. Mutindu mosi ya mbote ikele sambu na bakristo ya nkaka na kusadisa na ecodim ntete, na ntwala ya kukuma balongi bo mosi. Bansadisi lenda sadisa kutula ordre, ye bo ta mona inki beto sala na ecodim, ti inki mutindu beto ke sala yo. Na nima, dibundu lenda pesa bo nzila kutesa kulonga ndambu-ndambu. Mbandu: Kana Musidi ke zaba ve makabu na yandi, yandi lenda sadisa na ecodim bamposo zole to tatu ntete. Yandi ta sala kaka observatio, ye yandi ta sadisa kutula ordre na kati ya bana. Na nima, yandi lenda meka kuvutukila verse ya ntama, sambu bana kele kutuba yo kaka mbala zole mpamba. Na nima ya ndambu bamposo, yandi lenda longa verse ya mpa. To, longi lenda pesa yandi kitini mosi na kati ya leso ya kulonga. Mutindu yina, yandi lenda longuka, yandi lenda sala pratique, ti yandi lenda tesa makabu na yandi.

Beto fweti bakisa nde longi ya mpa ta longa ve mbote-mbote bonso longi ya ntama ta longa, ata yandi vanda na makabu ya kulonga. Kulonga mbote ke lomba pratique mingi.

Kansi, kana muntu kele na makabu ya kulonga, mbala mingi beto ta mona mambu yai:

- a. Yandi ta vanda na kiese sambu yandi kele kulonga. Yandi ta zola yo. Ntima na yandi ta benda yandi kusala yo.
- b. Bana ya classe ta zola mpe yandi.
- c. Yandi ta tuba na bandinga ti na mpila ya bana lenda bakisa nswalu.
- d. Yandi ta vanda na kikesa.

YINDULA DIAKA:

Longi ya ecodim fweti vanda muntu ya:

- 1. _____
- 2. _____
- 3. _____
- 4. _____
- 5. _____
- 6. _____

KANA NGE KELE RESPONSABLE YA DIBUNDU---

Yindula balongi ya kele sesepiyai. Keti bo kele kulunga na mambu yai yonso? Inki mambu nge ke mona ya nge fweti yidika?

.....
Nge ta sala inki sambu na kuyidika mambu yina?

.....
Tala bakristo ya nkaka kele na paroisse na nge. Nani lenda kuma balongi ya mbote ya ecodim? Sonika bazina na bo awa:

KANA NGE KELE LONGI YA ECODIM---

Keti nge kele kulunga na mambu yai yonso? Inki mambu nge kele ngolo mingi ve?

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



.....
 Nge kele na inki mambu kuyidika ti dibundu?

.....
 Sosa mpangi ya lenda tula nge na lombilu sambu Nzambi yika nge ngolo na bisika ya nge kele ngolo ve. Kana nge me samba sikamosi ti mukristo ya nkaka, sonika zina na yandi awa:

.....
 Keti nge zaba nge kele na makabu ya kulonga, to nge kele kutesa?

.....
 Inki ke songa nge nde, nge kele na makabu ya kulonga?

.....
 Keti dibundu mene kundima makabu yina? Kana nge me solula mambu yai ti responsable ya dibundu, ntangu ya mbote na kusala yo, yo yai. Sonika nsuka ya masolulu awa:

KITINI YA ZOLE PROGRAM YA ECODIM

Kapu ya Tatu Beto Longa Nani na Ecodim?

Konso ntangu longi longa na ecodim, yandi kele kulonga kaka groupe mosi ve. Yandi kele kulonga bagroupe to bandambu iya ya bana.

BAKRISTO YA NTAMA

Ndambu ya ntete ikele bakristo ya ntama (bana ya me balula ntima na Yesu dezia). Bana yai me landa malongi ya balandi. Bo me botama. Bo kele bamambre ya dibundu. Bo bakisa malongi mingi ya Bible. Bo bakisa ndambu inki mutindu bo fweti zinga sambu na kupesa Nzambi kiese.

BAKRISTO YA MPA

Ndambu ya zole ikele bakristo ya mpa. Bana yai me balula ntima na Yesu, kansi ntama mingi ve. Bo me kota ntete ve malongi ya balandi, to bo me manisa yo ntete ve. Bo kele kulanda malongi yina kaka sesepiyai. Bo me botama ntete ve, to ntama mingi ve. Bo ke kaka yantika kulonguka malongi ya Bible. Bo bakisa mingi-mingi ntete ve inki mutindu bo fweti zinga sambu na kupesa Nzambi kiese.

BAVIDI TO BO YA ME BALULA NTIMA NTETE VE

Ndambu ya tatu ikele bo ya me balula ntima na Yesu ntete ve. Bo me guluka ntete ve, sambu bo me tula ntima ntete ve na Yesu Kristo. Mbala ya nkaka bo me mona mfunu ntete ve ya kubalula ntima, to mbala ya nkaka bo me mona ntete ve inki mutindu bo fweti kubalula ntima.

BAMAMBRE YA DIBUNDU YA NKAKA

Every Child Ministries (Ministères pour Chaque Enfant)
 Ecole du Dimanche Kulonga Bana par Maman Lorella Rosuter

www.teachingforafrica.com



Ndambu ya iya ikele bo ya kele kulanda malongi ya ecodim, kansi yo kele na mpasi kulanda yo yonso mbote, sambu fami kele mambre ya dibundu ya nkaka ya kele kulanda ndinga ya Nzambi ve, na mpila ya beto ke bakisa yo. Beto kele kutanga awa bantu ya kele mambre ya basecte non-biblique. Beto kele kutanga ve bamambre ya mabundu ya nkaka, bampangi na beto bakristo.

LONGI KE NA MFUNU NA KUZABA BANA NA YANDI

Mbote konso longi zaba bana ya kele na classe yandi kele kulonga. Bana yina kele inki mutindu? Bana ikwa lenda vanda bakristo ya ntama? Bakristo ya mpa? Bavidi? Bamambre ya mabundu ya nkaka? Kana longi lenda bakisa mambu yai, yandi ta bakisa mpe inki mutindu kulonga baleso ya lenda simba mabanza ya bana, baleso ya lenda sadisa bo na kuyela to na kubalula ntima. Kana yandi me bakisa ve mambu yai, yandi ta losa ntangu na baleso ya lenda sadisa ve. Bana ta yindula nde Bible to dibundu kele na malongi ve ya kele kutadila luzingu na bo.

Yindula classe na nge. Bana ikwa nge banza lenda vanda bakristo ya ntama? _____ Bakristo ya mpa? _____
Bavidi? _____ Bamambre ya dibundu ya nkaka? _____

Konso ndambu kele na mfunu ya malongi ya mutindu ya nkaka. Beto ta yindula malongi ya lenda vanda mbote sambu na konso ndambu.

MALONGI YA BAKRISTO YA NTAMA

Bakristo ya ntama kele na mfunu na kuyika malongi sambu bo lenda landa nzila ya Nzambi kuluta mbote konso ntangu. Bo kele na mfunu ya encouragement. Bo kele na mfunu ya malongi ya doctrine ya kele kusonga inki mutindu Nzambi na beto kele. Ebuna bo ta vanda na mpila na kutula Yandi ntima kuluta mingi diaka. Bo kele na mfunu ya malongi ya ke songa bo inki mutindu kusamba Nzambi na mpila ya kulunga, inki mutindu kulunguka Bible ti kubakisa yo, inki mutindu kusadisa dibundu ti bantu ya nkaka. Bo kele na mfunu ya malongi ya kele kusonga masumu mosi-mosi ya Nzambi kele kubuya. Bo kele na mfunu ya malongi ya kele kusonga ti mambu mosi-mosi ya kele kupesa Yandi kiese ti ukumu. Bo kele na mfunu na kulunguka inki mutindu kubuya makambu ya imbi, ti inki mutindu kukula bampeve ya imbi.

MALONGI YA BAKRISTO YA MPA

Bakristo ya mpa kele na mfunu ya malongi ya lenda pesa bo assurance ti kikesa sambu bo zaba mbote-mbote nde kieleka, bo me guluka. Bo ke na mfunu na kubakisa malongi ya ntete-ntete ya kikristo— Nzambi kele nani, Yesu kele nani, beto me guluka inki mutindu, etc. Bo ke na mfunu na kubakisa malongi ya ke tadila mbotika ti kukota na kati ya dibundu.

MALONGI YA BAVIDI TO BANA YA ME BALULA NTIMA NTETE VE

Kana mwana me balula ntima ntete ve, yandi kele muvidi. Yandi kele mukristo ntete ve. Yandi kele na mfunu na kumona mpasi sambu na masumu na yandi. Yandi kele na mfunu na kubakisa nde vandi lenda kudiguluka ve yandi mosi, nde bisalu ya mbote lenda sadisa ve ata fioti na kugulusa yandi. Yandi fweti mona nde yandi me vilaka, mpe nde kaka Yesu Kristo mpamba lenda gulusa yandi. Yandi kele na mfunu ya invitation kubinga yandi kutula ntima na Yesu. Kana yandi ndima kubinga yina, nge kele na mfunu na kutwadisa yandi na Yesu. Ata dilongi mosi ya ke tadila kikristo ta sadisa yandi ve, sambu yandi kele na Mpeve ya Nzambi ntete ve.

MALONGI YA BAMAMBRE YA DIBUNDU YA NKAKA

Kana fami ya mwana kele mambre ya dibundu ya nkaka ya ke ndima Bible ve na mpila beto bakisa yo, yandi ta vanda na bampasi ya nkaka. Mwana yina ta vanda mividi to mukristo ya mpa ti kaka mbala mosi, mambre ya dibundu ya ke landa Bible ve. Mambu zole lenda pesa yandi mpasi. Ntete, kuluta mingi beto mona nde yo kele fami ya kele kupesa mpasi. Bo kele na boma nde beto ta benda mwana na bo nde yandi

bika dibundu ya fami, yo yina bo lenda pesa mpasi na mutindu na mutindu. Ya zole, ata fami pesa mpasi ve, malongi ya mwana yina me baka dezia, to malongi ya yandi kele kubaka seseziyai na dibundu ya nkaka, yo mosi lenda pesa mpasi. Mwana lenda mona nde malongi ya Bible ya nge kele kupesa, yo kele kukwenda nzila mosi ve ti malongi ya yandi me baka dezia. Mbala ya nkaka malongi yina zole kele kunwana na mabanza na yandi.

Mbala ya nkaka yandi kele kubakisa malongi na nge mingi ve sambu yandi kele kubalula yo ti malongi yina ya nkaka. Mbala mingi, mabundu ya nkaka sadila bandinga kiteso mosi bonso beto ke sadila. Kansi, bo pesa disongidila ya nkaka, ya mpa na bandinga yina. Yo yina, ntangu mwana na bo kuwa malongi na nge, yandi ta balula malongi nge kele kupesa.

Yo kele kusadisa ve na kuvwenza dibundu na yandi. Kuluta mbote kutuba ve ata fioti makambu ya dibundu yina. Kuluta mbote kaka kulonga Bible na mpila ya lenda sadisa bana, ti tula bana yai ti bafami na bo na lombilu mingi.

Mwana yai kele na mfunu na kubakisa malongi ya kuguluka, na nima, kubakisa malongi ya assurance. Beto lenda twadisa yandi na Yesu ata yandi me mona mpila ntete ve na kubaka mbotika to na kukuma mambre ya dibundu. Beto lenda longa mbandu ya bantu na kati ya Bible. Ntangu bo bakaka mbotika, bo bakaka yo inki mutindu? Beto fweti kanga ntima mingi sambu na bana yai. Beto zola kula bo ve na ecodim, kansi na kuyamba bo kubenda bo. Beto zola longa bo na lutu ya fioti tii ntangu bo me yela. Kana mpila ikele, beto zola songa kinduku na bafami na bo mpe.

Nsuka ikele nde nge zola, kana mpila ikele, kubenda fami yina na kukota na dibundu ya kele kulanda Bible. Nge lenda vanda na kiese ve na kubika mwana na nge na nzo ya bo kele kupesa yandi ndikila! Nge fweti tula ngolo kubasisa yandi. Kansi, nge fweti vanda na mayele mingi na mpila nge kele kusala yo. Kana yo salama ve mbala mosi, kubika bo ve, kansi landa kupesa bo malongi malembe-malembe, kusala kinduku, mpe kutula bo na lombilu mingi.

YINDULA MBOTE.

Sonika bazina ya bana na classe na nge ya kele bamambre ya dibundu ya nkaka. Sonika kana konso mwana yina kele muvidi to mukristo ya mpa. Beto me sala mosi bonso mbandu.

Zina ya mwana	Mambre ya inki dibundu to secte?	Muvidi? Mukristo ya mpa?
Jacques Pierre Muntati	Secte Essaie Ngolo	Muvidi

Sonika bazina ya bana na classe na nge ya me balula ntima ntete ve na Yesu. Sambu na inki nge banza bo me tula ntima ntete ve? Yantika kutula bo na lombilu samba bo ta guluka.

Zina

Yandi me guluka ntete ve sambu:

Etc.

Sambu na bana ya nkaka, inki malongi bo kele na yo mfunu? Sonika baintu tanu ya malongi ya lenda sadisa bo.

1. _____
2. _____
3. _____
4. _____
5. _____

YINDULA DIAKA

Inki kele bandambu iya ya bana ya lenda vanda na konso classe? Tendula konso ndambu.

1. _____
2. _____
3. _____
4. _____

INTERROGATIO

Kana mwana me balula ntima na Yesu ntete ve, beto fweti longa yandi inki mutindu yandi fweti samba Nzambi lumbu na lumbu.
V ou F

Kana mwana kele mambre ya dibundu ya nkaka, beto fweti songa yandi mambu yonso ya imbi ya dibundu na yandi kele kusala.
V ou F

Kana mwana kele mambre ya dibundu ya nkaka, yandi kele kaka mbala mosi na kati ya ndambu ya nkaka mpe (mukristo ya mpa to muvidi).
V ou F

Beto fweti kaka longa bana kutula ntima na Yesu.
V ou F

Kapu ya Iya Beto Sala Inki na Ecole du Dimanche?

Ecole du dimanche ikele program mosi ya mabundu mingi na bisika mingi me mona mbote sambu na kulonga ndinga ya Nzambi.

Ecole du dimanche yantikaka na kati ya bansukami ya ville ya Londres, na nsi ya Angleterre, kuluta bamvula nkama me luta. Yo me salama mbote mingi mpe awa na Congo. Bana me longuka mingi sambu na yo. Bantu mingi me bakisa nsangu ya mbote, ye bo me yamba Yesu Kristo na ntima sambu na program ya ecodim. Bantu mingi ya mpa me kota na kati ya dibundu sambu na yo. Kieleka, na konso sika ya ecodim kele ngolo, dibundu ya Yesu Kristo fweti kuma kuluta ngolo mpe.

Bantu sala inki na ecole du dimanche? Mambu sambanu kele mfunu kusalama sambu na konso ecodim. Mambu ya nkaka lenda kota na ecodim kana dibundu zola mutindu yina.

Mambu ya kele mfunu kusalama na konso ecodim ikele:

- Kuyimba ti kukina sambu na kupesa Nzambi lukumu
- Kulonga bantu kusamba Nzambi
- Kulonga mikanda ti baverse ya Bible
- Kulonga malongi ya Bible kibeni
- Kutwadisa bavidu na Yesu Kristo
- Kupesa bakristo devoirs sambu bo lenda yela na kikristo

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



Mambu ya nkaka ya lenda salama ikele:

- Kulonga bantu kupesa makabu
- Kulonga ndambu ya malongi ya ke sadisa na luzingu ya ntoto—nutritio, santé, luzitu, foyer, jardinage, alphabetisatio, etc.
- Kulonga histoire ya bantwadisi ya nene ya me mwanga nsangu ya mbote

Mambu yai yonso sambanu, to mambu yai yonso uvwa lenda salama na konso ordre. Beto lenda balula ordre ya bandambu yai na konso mpila dibundu ke zola. Mbandu: Bantu lenda samba Nzambi ntete, to na kati ya program, to na nsuka na yo. Bo lenda longuka verse na ntuala ya malongi ya Bible, to na kati na yo, to na nima na yo, etc. Bandambu yai yonso ke songa inki lenda kota kaka. Yo ke songa ve na inki ordre yo lenda kota.

Na bakapu na nima, beto ta mona mambu yai mosi-mosi, ye beto ta mona inki mpila ya mbote na kusala yonso, ti sambu na inki konso kitini ikele mfunu.

YINDULA DIAKA

Beto sala inki na ecole du dimanche? Sonika mambu sambanu ya kele mfunu kusalama na konso ecodim:

Beto sala:

1. _____
2. _____
3. _____
4. _____
5. _____

Sonika mambu tatu ya nkaka ya dibundu lenda yika na program ya ecole du dimanche kana bo zola:

1. _____
2. _____
3. _____

Kana beto tuba nde beto lenda longa na ecodim mambu ya kele mfunu sambu na luzingu yai, inki beto zola tuba? Pesa mbandu:

.....

Yindula malongi ya lenda sadisa bana na luzingu ya ntoto yai. Inki malongi lenda vanda mfunu na sika nge ikele? (Yo lenda vanda bambandu ya beto me tuba, to yo lenda vanda mambu ya nkaka ya nge me yindula.)

.....

**Kapu ya Tanu
Inki Mpila ya Mbote na
Kusola ti Kutwadisa Bankunga?**

Sambu na inki bankunga kele mfunu?

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



Bankunga ya kuyimba ti kukina kele mfunu mingi na ecole du dimanche sambu:

- Bankunga ke pesaka kikesa, kiese, ti mabanza ya mbote na kati ya bantu. Kana muntu kele na kiese, yandi fweti yimba to kina sambu na kusonga kiese yina. Kana yandi kele na mawa, yandi fweti yimba sambu na kubaka diaka kiese ya me vila yandi. Beto zola nde kiese kuvanda mingi na bisambu ya bana, yo yina beto yimba ti beto kina, na mpila ya ke pesa Nzambi lukumu ti beto bantu kiese.
- Bana lemba nswalu. Bo ke zola mingi ve kuvanda pima kaka. Kansi kana beto yimba ti beto kina, yo sadisa kukatula kulembwa yina. Bana yantika na kubaka kikesa diaka, kana beto yimba ti beto kina bankunga ya kiese.
- Kuyimba ti kukina fweti kubenda bantu. Bantu zola kwisa mingi kana bo kuwa bankunga ya kitoko ti ya kiese.
- Kuyimba ti kukina lenda kumisa Nzambi. Bantu zola misiki mingi, Nzambi mpe zola yo. Katuka ntama, kuyimba vandaka kitini mosi ya bisambu ya bantu ya Nzambi (yindula Bankunga 150). Na Kuwakana ya Mpa, Nzambi songaka beto na kuyimba.

Beto fweti yimba inki? (Efeso 5:19)

.....
Bakwikidi lenda sala inki na kukina na bo? (Bankunga 149:3, 150:4)

.....
Ntangu Nzambi nungisaka bantu na yandi, bo kumisaka Yandi inki mutindu? (Exode 15:20-21)

.....
Bankunga lenda longa mpe malongi ya Nzambi. Ikele ve nde bana kele kubaka malongi kaka na kati ya lesa ya Bible mpamba. Kana beto sola bankunga ya mbote, beto kele kulonga ntangu yonso ya bantu kele kuyimba mpe.

Mbandu, mpasi mosi ya beto me mona na dibundu awa na Congo kele kutadila mbotika. Bantu mingi kele na mabanza kisakasaka, mabanza ya me kwelana ve ti mabanza ya Bible na mambu yai ya mbotika. Bantu mingi banza nde bo kumaka bakristo na kati ya mbotika na bo. Bible kele kusonga beto nde muntu me guluka kana yandi me yamba Yesu Kristo na ntima na yandi. Kana yandi me yamba Yesu, yandi me kuma dezia mukristo. Mbotika kele yina ya kele kusonga na meso ya bantu mpila yandi me zengaka sambu na Yesu. Beto na MCE sonikaka nkunga ya kele kulonga malongi ya kieleka ya Bible sambu na kuyidika diaka mabanza ya bantu ya vandaka kisakasaka. Nkunga yina, yo yai:

Mbotika ta gulusa nge ve! Yina kele kaka kidimbu!
Mbotika ta gulusa nge ve! Tula ntima na Mfumu Yesu!

Konso ntangu beto yimba nkunga yina, beto kele kulonga mambu ya kieleka sambu na mbotika, mpe sambu na mpila ya kuguluka.

Malongi ya bana baka na nzila ya bankunga, malongi yina ta kwenda kumonika na bisika mingi. Bana ta kwenda kuyimba bankunga yina na banzo na bo, na babwala na bo, na banzo nkanda na bo, ti na bisika mingi. Bantu mingi ta kuwa malongi ya kele na kati ya bankunga. Ebuna, sambu na baraison yai yonso ya beto me tuba, beto kwikila nde kuyimba ti kukina kele ndambu mosi ya mfunu na program ya ecole du dimanche.

Lukanu ya bankunga ikele mfunu.

Mbala mingi awa na Congo, bantwadisi ya kele kutwadisa bankunga kele na lukanu ve bo ta yimba inki. Bo kaka yimba konso nkunga ya ta kota na mabanza na bo ntangu bo telema na ntwala ya bantu. Kansi, na ecodim, yo kele kuluta mbote na kuvanda na lukanu ya bankunga. Yo kele kuluta mbote kana muntu ya ta twadisa bankunga kuyindula lukanu ya bankunga na ntwala ecodim yantika. Yandi fweti sola bankunga ya mbote. Mpila ikele na kuyika mosi to katula mosi kana Mpeve ya Nzambi bula na ntima na yandi na nima. Kansi lukanu yina ta sadisa na kuvanda na bankunga ya kele kutadila malongi ya beto zola kutuba na lumbu yina.

Inki mutindu kusola bankunga ya mbote?

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



Beto zola sola bankunga ya mutindu yai:

- Bankunga ya bana zola kuyimba, ya pesa bo kiese.
- Bankunga ya kele mpasi ve na kuyimba.
- Bankunga ya kele na rhythme ya mbote.
- Bankunga ya longa malongi ya mbote, ya kele na kifu ve.
- Bankunga ya longa nzila mosi ti kikuma ya lesa.
- Bankunga ya lenda yantika konso kitini ya program: Lombilu, Makabu, Lesa, etc.

Bika beto yindula mambu yai mosi-mosi.

- **Bankunga ya bana zola kuyimba, ya pesa bo kiese**

Kana nge me twadisa bankunga mingi, nge ta bakisa nswalu nde ata bana ta yimba bankunga yonso, bo ta zola bankunga ya nkaka mingi-mingi, kuluta bankunga yonso. Bankunga yina kele bonso favori na bo. Bankunga yina ta pesa bo kiese. Bo ta yimba bankunga yina na banzo ti na banzila. Konso ntangu ya nge ke sola bankunga sambu na program ya ecodim, sola ndambu bankunga ya nge zaba ta pesa bana kiese mingi.

Yindula sesepiyai. Na kati ya bankunga yonso ya nge me zaba tii ntangu yai, inki bankunga bana ke zola kuyimba kuluta? Sonika batitre ya bankunga yina awa:

-
- **Bankunga ya kele mpasi ve na kuyimba**

Mbala na mbala nge ta wa chorale kuyimba nkunga mosi ya mbote ti ya kitoko, kansi yo ta simba mingi ve na ecodim. Kana mpidina, yo kele sambu nkunga yina kele mpasi sambu na bana kuyimba . Bankunga ya bana, yo fweti kwenda na ndinga na zulu mingi ve, to na ndinga na nsi mingi ve. Yo fweti vanda mpasi ve kulanda.

Yindula sesepiyai. Na kati ya bankunga ya nge me wa bachorale kuyimba, keti nge lenda pesa mbandu mosi ya nkunga ya kele mpasi sambu na bana? Yindula diaka. Inki na kati ya nkunga yina kele kutula yo mpasi? Sonika mvutu awa:

Keti nge lenda pesa mbandu ya nkunga mosi ya kele mpasi ve sambu na bana? Sambu na inki yo kele mpasi ve?

-
- **Bankunga ya kele na rhythme ya mbote**

Bana zola bankunga ya pesa bo nzala ya kukina. Kana nkunga pesa beto nzala yina, beto tuba nde yo kele na rhythme ya mbote. Mbandu ya nkunga ya kele na rhythme ya mbote kele **Mbotika Ta Gulusa Nge Ve.**

Yindula sesepiyai. Keti nge zaba bankunga ya nkaka ya kele na rhythme ya mbote? Sonika yo awa. Bankunga yai lenda vanda mbote mingi sambu na ecodim.

-
- **Bankunga ya longa malongi ya mbote, ya kifu ve**

Mbala na mbala mono Mama Lorella me wa chorale kuyimba nkunga ya kele na malongi ya me kwelana ve ti malongi ya Bible. Awa na Congo, kele bachorale mingi ya mabundu mingi mutindu na mutindu kele kuyimba. Ntangu bantu kuwa bo, mbala ya nkaka bo zola rythme to ton ya nkunga yina, ebuna bo baka yo. Bo yantika kuyimba yo, ti kulonga yo na bantu ya nkaka. Kansi mawa! Bo me yindula ve kana malongi ya bo kele kuyimba me kwelana ti malongi ya Bible.

Mbandu, mono me wa bachorale mingi yimba nde bisalu ya muntu me sala, yo ta gulusa bo, to yo ta funda bo. Malongi yina me kwelana ve ti baverse mingi ya Bible ya kele kutuba nde bisalu ya mbote lunga gulusa muntu ve, kansi kuguluka kele kaka nlemvo ya Nzambi sambu beto me tula ntima na Mfumu Yesu Kristo (Galate 3:1-14, Efeso 2:8-9, Tite 3:5).

Nge fweti yantika kuyindula mbote malongi ya kele na kati ya bankunga ya bantu kele kuyimba. Keti nge ta longa malongi yina na dibundu na nge? Kana ve, inki mutindu nge ta yimba yo na ecodim?

Sonika awa nkunga mosi nge me wa, ya me kwelana ve ti malongi ya Bible:

.....
Inki nge lenda sala kana nge mona nde nkunga kele na rythme to ton ya mbote, kansi malongi ya kifu?

.....
Nge lenda meka ntete kusoba ndambu bandinga ya nkunga yina. Kana yo simba ve, nge lenda simba tone ti rythme, kansi tula bandinga ya nkaka na nkunga yina yonso. Kana yai simba ve, nge fweti losa nkunga yina.

Yindula nkunga ya nge me sonika na zulu. Keti nge lenda soba ndambu na yo, to sonika bandinga ya mpa? Sonika awa mpila nge me yidika yo sambu yo kwelana ti malongi ya Bible:

.....
• **Bankunga ya longa nzila mosi ti kikuma ya lesa**

Konso lesa ta vanda ti kikuma na yo. Kikuma kele bonso ntu ya dilongi, to but ya lesa, mambu ya nene ya nge zola longa na lesa yina. Mbote kana nge kidika lukana ya program na mpila nde konso ndambu na yo ta kwenda nzila mosi ti kikuma ya lumbu yina.

Mbandu, kana kikuma ya lesa kele *Kubika Luvunu*, beto fweti sola ndambu bankunga ya ke longa malongi yina, to malongi ya nkaka ya kele kutadila yo. Mbandu: Kuzitisa Nzambi na munoko na nge. Kutuba luvunu ve, kansi sadila munoko na nge sambu na kumisa Nzambi.

Bankunga ya beto lenda yimba ya ke kwenda nzila mosi ti kikuma *Kubika Luvunu*, yo yai:

O keba munoko, inki nge tuba (Luvunu ve!)
Yonso ke ya Yesu, yonso (verse 2) (Kintwadi No. 88)
Nkembo, Nkembo, pesa Nzambi nkembo!
Zitisa zina ya Yesu
Bu nge lembwa na ntantu na ntima (Kintwadi No. 106)
Yesu, Mfumu, Mono ke zolaka nge (Kintwadi No. 128)
Kukembila Yesu Ngulusi (Kintwadi No. 130)
O Luvunu, (O Luvunu) O Luvunu Yambula

Sonika awa bankunga ya nkaka ya lenda kwenda nzila mosi ti lesa, kubika luvunu:

Konso leso ta vanda ti kikuma na yo. Ntangu nge kele kuyidika program ya ecodim, nge fweti sola ndambu ya bankunga ya kele kukwenda nzila mosi ti kikuma ya leso.

Awa kele liste ya bikuma (buts) ya baleso. Sonika bankunga zole ya mbote ya kwenda nzila mosi ti konso kikuma:

Kulomba Nzambi na ntangu ya mpasi:

- 1.
- 2.

Kuzitisa mama ti tata na nge:

- 1.
- 2.

Kusamba kaka Nzambi mpamba:

- 1.
- 2.

Kuyiba ve.

- 1.
- 2.

Kutula ntima na Yesu sambu nge guluka.

- 1.
- 2.

Kubokuta ve.

- 1.
- 2.

Nzambi zola sadisa beto:

- 1.
- 2.

Yesu kele nduku ya bana:

- 1.
- 2.

Mbote bakristo baka mbotika:

- 1.
- 2.

- **Bankunga ya lenda yantika konso kitini ya program**

Yo kele mbote na kusola nkunga mosi ya beno ta yimba konso mposo sambu na kuyantika konso kitini ya program. Par example, nge sola nkunga mosi ya ke tadila lombilu. Bana yimba yo konso mposo, kaka na ntwala ya ntangu ya lombilu. Kana

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



bo me yikama, nge fweti tuba diaka ve nde, ntangu ya lombilu me lunga. Nkunga ya lombilu ta vanda bonso introductio ya ta pesa anons sambu na nge. Kana bana kuwa yo, bo ta zaba nde ntangu ya lombilu me lunga.

Yindula bankunga ya nge lenda yimba ya kusonga nde ntangu ya lesa me lunga. Sola mosi ti sonika yo awa:

.....
Kana nge zaba ve nkunga ya kele kulunga na mambu yai yonso, nge mosi lenda sonika nkunga, tula ton na yo, ye longa yo na bana. Kana nge sonika nkunga, mbote yo vanda nkufi, ti mpasi ve na kuyimba. Longa yo ntete na bana ya nge mosi, to bana na mpangi na nge. Ebuna nge ta mona kana yo kele mpasi kuyimba, to ve.

Keti nge me mona mpasi na kumona nkunga ya kulunga sambu na bikuma yai ya beto me sonika na zulu? Bonso nkunga ya nkaka me monika ve, nge sonika nkunga nge mosi sambu na kikuma yina. Sonika bandinga awa. Na nima, yimba yo na mpangi na nge.

.....
Yo kele mbote na kusadila bankunga ti participatio ya bana na kisalu ya Nzambi. Mbandu: Bo lenda yimba nkunga ya ke songa nde Yesu me sala bimpa ya nene. Bo lenda telema mosi mosi, ye songa mambu ya nene ya Nzambi me sala sambu na bo. To, bo lenda yimba nkunga ya ke songa Satana kukatuka. Bo ya ke mona nde bampeve kele kuyangisa bo lenda telema. Bana ya kele penepene tula bo na lombilu. To, bo lenda yimba nkunga ya louange, ye bo yonso kumisa Nzambi. Kana ve, bankento lenda yimba ti babakala kumisa Nzambi.

Inki mpila kutwadisa bankunga?

Mambu ya ntete kele kusola bankunga ya mbote. Mambu ya zole kele kutwadisa bana na kuyimba bankunga yina.

1. Na ntwala kutwadisa nkunga na meso ya bantu, nge fweti zaba yo mbote-mbote nge mosi. Kana nge sola nkunga ya nge me zaba mingi-mingi ntete ve, nge lenda longuka yo na ntwala ntangu ya classe. Kana nge zola longuka yo, mbote nge kuwa yo mingi mpe yimba yo mingi na nzo na nge mosi, bilumbu mingi na ntwala nge meka kutwadisa yo. Yo kele mfunu na kuzaba bandinga mpe ton na yo. Nge lenda longa yo na bana na nzo na nge to na bana ya nkaka penepene na nzo na nge. Kana ve, nge lenda sola muntu ya nkaka na kutwadisa yo, muntu ya kele kuzaba yo mingi.
2. Kana nge kele kutwadisa bankunga, yimba na kikesa yonso. Sadila nitu yonso na bageste. Kikesa yina ta pesa bana kikesa na kuyimba yo, ata yo vanda nkunga ya mpa.
3. Kele ve nde bankunga yonso fweti vanda ya kukangama mbala mosi na kati ya program bonso yai:

Nkunga
Nkunga
Nkunga
Nkunga
Malongi
Malongi
Malongi
Malongi

Mabundu mingi kele kukabisa malongi yonso ti bankunga. Bo kele kumwanga bankunga na kati ya program ya mvimba bonso yai:

Nkunga

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



Ndambu malongi

Nkunga

Ndambu malongi

Nkunga

Ndambu malongi

4. Kana nge zola longa nkunga ya mpa, longa yo yonso mbala mosi ve. Yantika na mvutu ya nkunga ti longa yo malembe malembe. Landa kuyimba yina bamposo mingi. Kana bana me zaba mvutu mbote, yika verse mosi.
5. Beto yimba bankunga ya louange sambu na makutu ya Nzambi. Ntwadisi yandi mosi baka mabanza ya bisambu, ebuna bana mpe ta landa yo.

YINDULA DIAKA

Beto sola bankunga ya inki mutindu?

1. _____
2. _____
3. _____
4. _____
5. _____
6. _____

INTERROGATIO Manisa baphrase yai:

Na ntwala nge twadisa nkunga nge mosi fweti _____.

Kana nge zola bana kuyimba nkunga, kansi nge mosi ke zaba yo mbote mingi ve, nge lenda sala inki? Nge lenda _____, to nge lenda _____.

Mbote nge twadisa bankunga na _____ yonso.

Bana fweti yimba bankunga mosi kaka mbala mosi ve, kansi longi lenda _____ na kati ya program. Yandi lenda tula nkunga, malongi, nkunga, malongi, etc.

Kana longi zola longa nkunga ya mpa, mbote yandi longa yo inki mutindu? _____.

Kana kulonga nkunga ya mpa, longi lenda longa inki kitini ya nkunga ntete? _____.

Kana nkunga kele na malongi ya kifu, longi lenda sala inki? _____, to _____, to _____.

Kana nkunga ke monika ve ya ke kwelana ti malongi ya lesa, longi lenda sala inki? _____.

Ntangu ya yandi kele kutwadisa bankunga, longi lenda songa kikesa na inki ndambu ya nitu ya yandi? _____.

OBSERVATIO (Kutala mpila muntu ya nkaka kele kusala)

Tala mpila muntu ya nkaka kele kutwadisa bankunga. Inki mambu ya mbote yandi ke sala? _____.

Inki mambu ya mbote mingi ve yandi ke sala? _____.

Inki mutindu yandi lenda songa kikesa ya kuluta? _____.

Kapu ya Sambanu Inki Mpila ya Mbote na Kusamba Nzambi?

Sambu na Inki Kusamba Nzambi ti Kulonga Bana Kusamba Kele Mfunu na Ecodim?

Kusamba Nzambi kele mfunu na program ya ecodim. Beto samba sambu na kunata lusakumuna ya Nzambi na zulu ya program ti malongi ya bana. Beto samba mpe sambu na kulonga bana inki mutindu ya mbote bo lenda samba Nzambi bo mosi na nzo. Na bisika mingi, bana me mona bantu kusamba na mpila ya kele kukwelana ve ti yina ya Bible kele kusonga beto. Mbandu, bo me wa bantu kusambila basantu, to kulomba Nzambi na zina ya ntwadisi na bo ya nene, to kulomba lusadisu ya bafwa to bampeve ya bambuta. Bo ke bakisa ve inki mutindu Bible ke songa beto na kusamba.

Bana ya nkaka zola samba Nzambi, kansi bo ke bakisa ve inki bo fweti tuba, to inki bo lenda kulomba na Yandi. Bo kele na mfunu ya kulonguka inki mutindu Bible ke ndima nde bantu kusamba Nzambi. Lombilu to bisambu kele kitini ya mfunu mingi na ecole du dimanche. Beto zola samba Nzambi na mpila ya mbote na kati ya program ya ecodim. Beto zola mpe kulonga bana inki mutindu bo lenda samba Nzambi konso ntangu na bainzo na bo.

Inki mutindu beto longa bana kusamba?

1. Tula nkunga ya introduction sambu na ntangu ya lombilu.

Sola nkunga mosi ya ke songa bana nde bo me kuma na ntangu ya lombilu. Sadila nkunga yai konso mposo bonso introduction ya lenda benda mabanza na bo na lombilu. Mbandu: Nkunga “Lomba na Nzambi Kaka”

2. Longi muntu fweti samba Nzambi na mbala ya ntete.

Ntangu dibundu yantika program ya ecodim, na luyantiku bana lenda vanda na ndambu nsoni na kusamba na meso ya bantu. Kana yo kele mpidina, longi kaka yandi mosi lenda samba na luyantiku. Kansi na nima ya ndambu ntangu, beto ta zola kumona bana bo mosi samba Nzambi. Mbote longi kuzaba mbote bansiku yonso ya Bible ya beto zola longa bana sambu na lombilu. Yo kele mfunu nde yandi mosi landa bansiku yai yonso na lombilu na yandi, bonso mbandu ya mbote ya bana lenda landa na nima.

3. Longa kaka nti mosi ya malongi na mambu yai, tii ntangu bana me simba yo.

Malongi na mambu ya lombilu ikele malongi ya bana ta baka na zulu ya malongi ya leso. Yo yina, yo kele mfunu nde yo vanda ve nda bonso leso. Konso mposo beto ta longa kaka nti mosi mpamba ya dilongi na mambu ya bisambu. Beto ta landa konso nti bamposo zole to kuluta, tii ntangu ya bana zaba yo mbote to ntangu bo yantika kulanda nsiku na yo ntangu bo kele kusamba.

4. Vutukila diaka banti ya dilongi ya bana me longuka.

Konso mposo, sadila une minute sambu na kuvutukila nswalu banti tatu to iya ya malongi ya bisambu ya bana me longuka ntete.

5. Yantika kusadila bansiku ya lombilu ya beno me longuka.

Na nima nge me longa nti ya dilongi sambu na lombilu, sadila nsiku yina na lombilu na beno ta tula. Mbandu: Kana beno longa nde beto sambila bantwadisi na beto Nzambi, na ntangu ya lombilu, beno ta tanga bazina ya bamfumu na ntuala ya Nzambi. Na bamposo ke kwisa mpe, beno ta landa kaka kusadila nsiku yina.

6. Inki kusala kana bana me yikama kusamba na mpila ya Bible ke ndima ve.

Kana bana ya mabundu ya nkaka ke kwisa na ecodim, yo lenda salama nde mwana kusamba na mpila ya Bible kundima ve, ata na ecodim. Kansi, nge ta mona probleme yai mingi ve kana nge longa bana mbote. Na ntuala bana samba, bambukisa bo, “Beto samba na nani?” (Na Tata Nzambi.) “Na zina ya nani?” (Na zina ya Yesu.)

Nge lenda controller ve inki konso mwana ke sala na nzo na yandi, kansi nge lenda pesa mbandu ya mbote na ecodim. Kana mwana yantika kusamba na meso ya bantu na mutindu ya Bible ke ndima ve, kupesa yandi nsoni ve, kuvanda makasi ve, kunganina yandi ve, kansi kanga bisambu yina nswalu. Tula diboko na nge na zulu ya mwana kele kusamba na kifu. Tuba na ndinga na ngolo (kansi ya makasi ve),, “Pardo.” Kana yandi bika kusamba, tuba nde, “Pardo, nge zabaka ve” (to “nge vilaka”). “Na ecodim, beto samba kaka na mpila ya Bible ke longa beto. Beto samba.....”(songa mpila ya mbote na

kusamba, par example, “na Tata Nzambi na zina ya Yesu.” Kana mambu salama nde nge fveti kanga bisambu ya mwana, solula ti yandi mbote-mbote na nima, sambu yandi bakisa inki me salama, mpe sambu yandi bakisa nde nge kele na makasi ve ti yandi.

7. Na nima ndambu ntangu, bana ta yantika kusamba bo mosi.

Longi lenda yula bana nani zola samba, tii ntangu ya yandi zaba mbote nani ta ndima. Beto zola ve kubenda mwana na kingolo-ngolo, sambu bana ya nkaka kele nsoni na meso ya bantu. Kansi beto zola kubenda bo malembe-malembe, tii ntangu ya bo ta vanda na kiese na kusamba na meso ya bantu.

8. Pesa kikesa na bana ya kele kusamba mbote.

Kana bana kele kulanda bansiku ya nge me longa bo, pesa bo kikesa. Nge lenda tuba bandinga bonso yai: “Nge me samba mbote. Nge me bambuka nde beto samba kaka na Tata Nzambi na zina ya Yesu” (to konso nsiku ya yandi me landa).

9. Pesa bana ngindu inki mambu bo lenda tula na lombilu.

Nge lenda baka bana iya to tanu ya zola longa. Bo kwisa na ntwala ya bana ya nkaka. Nge pesa konso mwana mambu mosi na kutula na lombilu. Mbandu: Mwana ya ntete—Kaka kumisa Nzambi na beto. Mwana ya zole—Sambila pasteur ti bantwadisi ya dibundu Nzambi. Mwana ya tatu—Samba sambu na bamalade. Mwana ya iya—Samba sambu na bana na bwala yai ya me ndima Yesu Kristo ntete ve na ntima na bo. Mwana ya tanu—Samba sambu na bana na bainsi bonso Libie, sika bo zola ve bana kuwa ndinga ya Nzambi. Etc.

10. Ntangu ya Nkaka, Sadila Bankunga Bonso Lombilu

Nkunga lenda vanda bisambu yo mosi. Bana lenda yimba yo na ntima ya bisambu, ebuna yo kuma bisambu na bo. Mbandu: Yimba nkunga ya ke tuba nde Yesu zola belula bantu. Lomba bana ya zola Nzambi kubelula bo, kutelema ntangu bo kele kuyimba yo. Bana ya kele penepene lenda tula bo maboko. Lombilu kele nkunga yina.

Inki mutindu kutula bana na lombilu sambu na bampasi na bo? (Mbala mingi, beto sala yai na nima program ya ecodim.)

Na nima program ya ecodim me mana ye bana me basika na nganda, nge kele na occasion ya nkaka ya nge lenda kulonga bana na mambu ya bisambu. Mbala mingi, kana bantu zole kele kulonga bonso equipe, na nima ya program ya ecodim, longi mosi ta bikala na nzo-Nzambi sikamosi ti bo ya zola balula ntima na Yesu. Longi ya zole ta benda bana ya nkaka na nganda, mwa-distance ti nzo-Nzambi, sambu bo yangisa ve bana ya zola balula ntima.

Bana yai ya me basika na nganda, ti longi na bo, bo kele na occasion ya mbote na kusamba Nzambi diaka sambu na bampasi mingi ya bana kele kumona. Bo lenda pesa intentio sambu na lombilu. Longi lenda sambila bo Nzambi, ye bo mosi lenda samba. Yai kele ntangu beno lenda samba sambu na maladi ya bana, kukula bampeve ya imbi ya kele kuyangisa bo, lomba lusakumunu ya Nzambi na zulu na bo, etc.

Beto longa bana inki malongi ke tadila lombilu?

Awa kele bansiku to banti ya malongi ya longi lenda longa bana mosi-mosi, malembe-malembe. Kulonga bansiku yai yonso ta lomba mvula mosi ya mvimba, to kuluta yo. Kana beno manisa yonso, vutuka diaka na luyantiku, to kuyika bansiku to malongi ya nkaka ya nge ta mona na ntangu nge kele kutanga Bible nge mosi. Beto lenda longa bansiku yai na konso ordre.

Bansiku ya Bible ke tadila lombilu:

- 1] Lombilu kele mfunu mingi sambu na bakristo.
Marko 13:33, Luka 6:12, Yakobo 5:16-18
- 2] Nzambi zola sadisa beto, kansi yandi kele kuinga
ntangu beto lomba lusadis na Yandi.
Matayo 7:11, Bankunga 65:2, Yerima 33:3
- 3] Beto lenda samba konso ntangu na konso kisika.
Bankunga 55:17, 1 Timoteo 2:8
- 4] Beto lenda samba Nzambi na ntangu ya mpasi.
Matayo 6:9, Luka 4:8, 1 Piere 5:7

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



- 5] Beto fweti samba Nzambi kaka, bantu ya nkaka ve.
Matayo 6:9, Luka 4:8
- 6] Beto fweti samba na zina ya Yesu Kristo.
1 Timoteo 22:5, Yoane 14:13
- 7] Beto fweti tonda ye kumisa Nzambi.
1 Tes. 5:16-18
- 8] Beto fweti kanga ntima ti landa kaka kusamba.
Luka 18:1, 1 Tes. 5:17
- 9] Beto lenda samba Nzambi ata kufukama (Luka 22:41), ata kutelema (Marko 11:25), ata kuvanda, ata maboko ya kukanga, ata maboko na zulu (1 Timoteo 2:8), etc.
- 10] Beto lenda samba Nzambi ata na bankunga (Bankunga 9:1-2, Yakobo 5:13), ata na kudila (Bankunga 39:12).
- 11] Beto fweti ndima luzolo ya Nzambi na mambu beto kele kulomba.
Luka 22:42, 1 Yoane 5:14
- 12] Beto fweti lolula bantu ya nkaka ya me sala beto mbi kana beto zola nde Nzambi kuwa lombilu na beto.
Matayo 6:14-15
- 13] Masumu ya beto me sala lenda kanga nzila nde Nzambi kuwa lombilu na beto ve.
Yesaya 59:1-2, Yoane 9:31

Beto longa bana nde beto lenda lomba inki mambu na Nzambi?

- 1) Beto fweti lomba kaka yina ya ta pesa Nzambi kiese ti lukumu.
1 Yoane 5:14
- 2) Beto lenda lomba Nzambi sambu na kuguluka.
Roma 10:13, 1 Timoteo 2:4
- 3) Beto fweti lomba mambu ya Nzambi ke mona mfunu. Mbandu: Kuguluka ya bantu, dibundu, familia, masonga
Filipo 4:6
- 4) Beto lenda lomba Nzambi konso kima ya beto ke na yo mfunu.
Filipo 4:6
- 5) Beto lenda lomba Nzambi na kusadisa bantu ya nkaka.
Kolosai 1:9
- 6) Beto lenda lomba Nzambi kubelula bantu ya maladi.
Yakobo 5:15
- 7) Beto lenda lomba Nzambi sambu na bantwadisi na beto.
1 Timoteo 2:1-3
- 8) Beto lenda sadisa bansadi ya Nzambi na lombilu.
2 Korinto 1:11
- 9) Beto lenda lomba Nzambi kutinda basadi na yandi sambu bantu yonso kuwa nsangu ya Yesu.
Luka 10:2

- 10) Beto lenda samba Nzambi sambu na kubaka ngolo ya Mpeve.
Matayo 17:21, Efeso 6:18
- 11) Beto lenda samba Nzambi nde beto lenda nunga mpukumunu.
Luka 22:40,46
- 12) Beto lenda lomba ndolula ya masumu na beto.
1 Yoane 1:9
- 13) Beto lenda samba na kimvuka. Ntangu beto ndima lombilu ya bakristo ya nkaka, kundima na beto ta yika ngolo na bisambu yina.
Matayo 18:19-20, Bisalu 1:14
- 14) Beto fweti sambila ata bambeni na beto Nzambi.
Luka 6:28
- 15) Beto fweti kanga ngolo ya bampeve ya mbi na lombilu.
Matayo 17:21, 18:18, Luka 10:17

YINDULA DIAKA

Tula cercle na lweka ya mvutu ya mbote.
Bonso yai: Nzambi keke [mosi kaka, mingi].

Ntwadisi fweti samba na [kikesa, boma].

Beto fweti samba na [Saint Yosefi, Nzambi kaka].

Beto samba na zina ya [Kimbangu ti Kristo, Yesu Kristo kaka].

Nzambi [zola, zola mingi ve] kusadisa beto bakwikidi.

Kulomba lusadisu ya bansantu keke [masumu, mfunu].

Beto lenda lomba Nzambi [ata konso mambu, bonso keke luzolo na yandi].

Beto lenda kanga ngolo ya bampeve ya mbi na [lombilu, kindoki].

Nzambi ta gulusa beto kana beto [binga zina na yandi, sala mbote].

YINDULA SESEPIYAI

Inki nti ya dilongi lenda sadisa bana na classe na nge sambu na lombilu?

.....
Sonika awa verse ya mvimba ya ke kwenda ti nti ya dilonga yina. Na nima, longuka kutuba verse yina.
.....

Kapu ya Nsambwadi Inki Ikele Mpila ya Mbote na Kulonga

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



Baverse ya Bible?

Sambu na inki yo kele mfunu kulonga baverse ya Bible?

Beto mona yo mfunu na kulonga baverse ya Bible—bandinga kibeni ya Bible na mpila nde bana ta zaba kutuba yo na munoko, kubumba yo na ntima, ye kubambuka yo na ntangu ya bo kele na yo mfunu.

Kuzaba bandinga ya Bible lenda sadisa bana na kubaka ngolo na kikristo na bo. Ntangu Ntumwa Paulo songaka binwaninu ya solda ya mbote ya Yesu, yandi tubaka nde beto fweti lwata mambu ya kieleka mpe nsangu ya mbote (Efeso 6:10-18). Inki mutindu muntu lenda lwata bandinga? Ntumwa Paulo ke zola kutuba inki?

Mvutu: Kana beto lwata bilele, yo kele mfinama na beto. Yo ke kwenda nzila mosi ti beto konso kisika ya beto ke kwenda. Yo kele ve ndambu ya nitu, kansi ntangu beto ke lwata yo, yo me kuma bonso ndambu ya nitu. Beto fweti zaba ndinga ya Nzambi bonso yo, na mpila nde yo kwenda nzila mosi ti beto. Yo fweti kota na ntima na beto, na mpila nde beto zaba bandinga na yo, ti beto bakisa inki kele disongidila na yo. Beto lenda bambuka yo konso ntangu beto ke na yo mfunu. Beto lenda mona yo nswalu na kati ya Bible sambu na kusonga bampangi ya nkaka.

Kana bana yantika na kuzaba Bible mpila yina, yo ta sadisa bo mpe na kubuya mpukumunu. Konso ntangu ya Satana zolaka benda Yesu na masumu, Yesu vutulaka yandi inki? (Matayo 4:1-11)

Mvutu: Yesu vutulaka bandinga ya Bible (ya Kuwakana ya Ntama) yina ya Yandi zabaka na ntima na Yandi sambu Yandi longukaka yo na kimwana na Yandi. Mpidina, Yesu nungaka na zulu ya Satana.

Kana beto bumba ndinga ya Nzambi na ntima na beto, yo ke sadisaka na inki? (Bankunga 119:9,11)

Mvutu: Yo ke sadisa kubuya mpukunu. Mbandu: Kana mwana ke wa mpukumunu ke benda yandi na kutuba luvunu, yo ta sadisa mingi kana yandi bambuka verse yandi me longuka ya kele kubuya luvunu. Keti nge lenda tuba verse mosi ke songa nde Nzambi ke ndima ve luvunu? Sonika yo awa.

Baverse kele mingi ya songa mambu yai, ebuna ntangu yai, kangula Bible na nge ti tala kana yina ya nge sonikaka vandaka mbote yonso. Verse mosi ya buya luvunu kele Efeso 4:25. Bana mingi kele kuzaba yo, sambu yo kele verse ya mabundu mingi me longa na ecole du dimanche. Kana mwana me bambuka verse yina, yo lenda bula na ntima na yandi. Nzambi lenda sadila yo na kubambukisa yandi inki ta vanda mbote na meso na Yandi. Verse yina lenda sadisa mwana na kubuya mpukumunu na mambu ya luvunu.

Yo kele mfunu nde bana kubumba bandinga ya baverse ya Bible na ntima na bo na mpila nde bo lenda bambuka yo ti sadila yo konso ntangu, konso kisika bo ikele.

Yindula mambu yai ya ke tadila kulonguka verse ya Bible:

1. Mpila ya kusola verse

Sola verse ya ke kwenda nzila mosi ti kikuma ya leso. Katula mabanza ya nkaka kota na verse yina, ya ke kwenda nzila mosi ve ti kikuma ya leso. Tuba kaka ndambu ya verse ya me kwelana ti leso.

2. Nda ya verse

Mambu ya ta zenga nda ya verse kele age, niveau ti mayele ya bana ya nge kele kulonga. Bana ya fiti tii age 6 lenda longuka phrase mosi ya kiteso ya bandinga 5, 6, to 7. Bo ta longuka ve “adresse” to sika verse lenda monika na kati ya Bible (adresse kele mukanda, kapu ti verse yo ke monika na kati ya Bible). Bo ta longuka kaka nde yai kele bandinga ya Bible, bandinga ya Nzambi. Bana ya bamvula 7 tii na 9 lenda longuka phrase zole to tatu, kiteso ya bandinga 15 tii na 20, ye bo lenda longuka mpe

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



sika verse yina keke na kati ya Bible (mbandu: Yoane kapu 3 nzila 16). Bana ya bamvula 10 ti na zulu lenda longuka verse ya mvimba na lumbu mosi, ti sika yo keke na kati ya Bible. Bo lenda yika baverse konso mposi tii ntangu bo zaba passage ya mvimba, to bo lenda longuka baverse mosi-mosi ya keke kutadila mambu ya nkaka.

Mbandu ya adaptatio ya nda ya verse sambu na age:

Bana ya fioti “Nzambi me lutaka kuzola bantu yonso” [Bandinga ya Bible]
(bandinga 6)

Bana age 7-9 “Nzambi me lutaka kuzola bantu yonso, [Yoane kapu 3, nzila ya kutanga 16]
yo yina yandi pesaka bo mwana mosi yina
vandaka na yandi”
(bandinga 17)

Bana age 10 “Nzambi me lutaka kuzola bantu yonso, [Yoane 3:16]
yo yina yandi pesaka bo mwana mosi yina
vandaka na yandi, sambu konso muntu yina
kwikila yandi, yandi kufwa ve, kansi yandi
kuvanda na moyo ya mvula na mvula.”
(bandinga 35)

Bandinga ya nge sola sambu na kulonga bana ya fioti FWETI VANDA VE bandinga ya ntete ya keke na verse. Yo lenda katuka na kati, to na nsuka ya verse.

Mbandu:

Bana ya fioti “yandi me kuma muntu mosi ya mpa” [Bandinga ya Bible]

Bana age 7-9 “Kana muntu keke na kimvuka ti Kristo, [2 Korinto kapu 5, nzila ya kutanga 17]
yandi me kuma muntu mosi ya mpa”

Bana age 10 “Kana muntu keke na kimvuka ti Kristo, [2 Korinto 5:17]
yandi me kuma muntu mosi ya mpa.
Mambu na yandi ya ntama me mana;
mambu ya mpa me kwisa na kuyinga
na yandi.”

Ndambu ya verse ya nge sola sambu na kulonga, yo fweti lungisa dibanza mosi ya mvimba. Mbandu: Nge lenda longa “Bika konso muntu kutubila mpangi na yandi mambu ya kieleka” (Efeso 4:25), sambu yo me lungisa dibanza mosi. Kansi nge lenda ve kulonga, “Konso muntu kutubila mpangi na yandi mambu” sambu yo lungisa ve dibanza ya mvimba. Kieleka, kana nge tuba kaka bandinga yina, nge me balula disongidila ya phrase yina.

Mfunu na Kuzaba Verse Nge Mosi

Na ntwala nge yantika na kulonga verse, nge mosi fweti zaba kutuba yo yonso mbote, konso ndinga kukonda kifu, kukonda kuyindula mingi. Nge fweti tuba yo kaka na mpila yo ikeke na Bible, kukonda kubalula ata ndinga mosi na yo. Yo keke kulonga ve ata fioti kana muntu tuba kaka mabanza na yo, kansi yandi kutuba yo na bandinga na yandi mosi. Kana nge zola bana na kulonguka verse, ntete nge mosi longuka konso ndinga na yo mbote-mbote. Balongi mingi mona nde yo sadisa bo na kutuba yo na nzo na bo, ti fami na bo ntete. Na nima, bo meka kutuba yo bo mosi, ti muntu ya nkaka keke kutala Bible sambu yandi kuzaba kana bo me tuba mbote. Bo lenda balula ve ata ndinga mosi.

Mfunu ya Kikesa

Longa na KIKESA YONSO! Bana ta mona yo kiese na kulonguka baverse ya Bible kaka kana longi mona yo kiese, ti kana yandi songa kiese yina na mpila ya yandi keke kulonga. Longi ya eodim, kikesa fweti katuka ntete na nge! Na nima, yo ta fulusa mpe bana ya age ya nge keke kulonga. Longa verse na kikesa!

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



Mfunu na Kupesa Bana Kiese (Encouragement)

Kana bana sala ata ndambu mbote, to, kana bo meka ngolo kutuba verse ya kele ndambu mpasi, pesa bo kiese. Ata bo tuba ve yonso mbote, nge lenda tuba nde, “Beno me *meka* ngolo.” Kunganina bo ve kana bo sala kifu, kansi sosa konso ntangu na kupesa bo kiese.

Bangindu sambu na kupesa kiese, yo yai:

Beno me sala mboteeeeeee!
Beno me tula ngoloooooo!
Bana ya mayeeeeee!
O ye! Walalala!
Kubula maboko mutindu na mutindu
Kusonga luse ya kiese
Très bien ! Magnifique !
Excellent !
Oui !
OK !
A plus !
100% !
Champion !
Nge me nunga !
Beno ke pesa mono kiese bubuyai.
Matondo !
Nani lenda luta beno ? Muntu ve !
Essaie ya mbote

Bansiku (bamethode) ya lenda sadisa nge na kulonga verse ya Bible na mpila mosi ya mbote, yo yai:

1. *Longi tanga verse ya mvimba sambu bana lenda kuwa yo.*

Na ntwala nge yantika na kulonga verse, nge mosi fweti tanga verse ya mvimba na Bible na nge na meso ya bana. Tanga yo mbote-mbote ti espresso. Kutanga yai ta sadisa bana na kubakisa dibanza ya nene na kati na yo. ATASIO! Mono ke tuba ve nde nge fweti tanga leso ya mvimba na Bible. Nge ta tanga kaka verse mosi mpamba, verse yina ya bana zola longuka kutuba na munoko.

2. *Bana fweti tuba adresse ya verse na ntwala ti na nima ya verse yo mosi.*

Tuba “adresse” (mukanda ya Bible, kapu ti verse) konso mbala ya nge twadisa verse. Tuba adresse na ntwala nge tuba verse, ti diaka na nima nge tuba yo. Mbandu ya adresse: Yoane 1:12.

3. *Bana tuba verse bitini-bitini.*

Nge ta yantika kutuba verse yina na bitini-bitini. Nge ta tuba kitini mosi ya fioti, ebuna bana ta landa kutuba yo na nima. Kana nge manisa verse ya mvimba, tuba yo diaka, kansi kangisa bitini ndambu-ndambu. Tuba yo diaka, ti kangisa bitini diaka kuluta nda, tii ntangu ya nge me vukisa verse ya mvimba.

Mbandu:

Mbala ya ntete: Matayo/ kapu 19/ nzila 14/ Beno/ bikisa bana/ bo/ kwisa awa/ na mono;/ beno/ kanga bo/ nzila ve/ sambu/ Kimfumu ya Nzambi/ kele/ na bantu/ yina kele/ bonso bo./ Matayo/ kapu 19/ nzila 14.

Na mbala ya ntete, beto me kabisa verse yai na bandambu ikwa? _____

Mbala ya zole: Matayo kapu 19/ nzila 14/ Beno bikisa bana/ bo kwisa awa/ na mono;/ beno kanga bo/ nzila ve/ sambu Kimfumu ya Nzambi/ kele na bantu/ yina kele bonso bo./ Matayo kapu 19/ nzila 14.

Na mbala ya zole, beto me kabisa verse yai na bandambu ikwa? _____

Mbala ya tatu: Matayo kapu 19/ nzila 14/ Beno bikisa bana/ bo kwisa awa na mono;/ beno kanga bo/ nzila ve/ sambu Kimfumu ya Nzambi/ kele na bantu yina kele bonso bo./ Matayo kapu 19/ nzila 14.

Na mbala ya tatu, beto me kabisa verse yai na bandambu ikwa? _____

Mbala ya iya: Matayo kapu 19 nzila 14/ Beno bikisa bana bo kwisa awa na mono;/ beno kanga bo nzila ve/ sambu Kimfumu ya Nzambi kele na bantu yina kele bonso bo.

Matayo kapu 19 nzila 14

Na mbala ya iya, beto me kabisa verse yai na bandambu ikwa? _____

Mbala ya tanu: Matayo kapu 19 nzila 14/ Beno bikisa bana bo kwisa awa na mono;/ beno kanga bo nzila ve sambu Kimfumu ya Nzambi kele na bantu yina kele bonso bo./

Matayo kapu 19 nzila 14

Na mbala ya tanu, beto me kabisa verse yai na bandambu ikwa? _____

Mbala ya sambanu: Matayo kapu 19 nzila 14/ Beno bikisa bana bo kwisa awa na mono; beno kanga bo nzila ve sambu Kimfumu ya Nzambi kele na bantu yina kele bonso bo./ Matayo kapu 19 nzila 14

Na mbala ya sambanu, beto me kabisa verse yai na bandambu ikwa? _____

NB: Ikele ve nde konso verse fweti vanda ya kukabisa na nombre ya bitini kaka bonso yai. Beto zola kaka na kusonga nde nge yantika kulonga na bitini mingi ya nkufi, ebuna nge kangisa-kangisa yo ndambu-ndambu. Na nsuka, bana tuba verse ya mvimba.

4. **Bana tuba verse mbala mingi, kansi bo balula mpila bo ke tuba yo mutindu na mutindu.**

Bana fweti tuba verse mbala mingi, tii ntangu bo zaba yo mbote-mbote. Kana nge ke longi verse ya mpa ya bana me zaba ntete ve, bo fweti tuba yo mbala 6 to na zulu. (Mbala ikwa bo fweti tuba yo ta landa mayele na bo ti nda to mpasi ya verse yina.) Nge fweti sala verse na REPETITIO (kutuba yo mbala mingi), ti na VARIÉTÉ (kutuba yo mutindu na mutindu).

Yo yina, konso longi kele na mfunu na kuzaba bamethode mingi (mutindu mingi) na kulonga verse. Konso mbala bana tuba verse, bo kangisa bitini ndambu, kansi konso mbala bo tuba yo, bo lenda tuba yo mpe na mutindu ya nkaka.

Mbandu ya mutindu ya nkaka ya bana lenda tuba verse, yo yai :

- Tuba yo na kuvanda, ya kutelema, ya kufukama (kana verse ke tadila lombilu).
- Tuba yo ti maboko kukanga, maboko na zulu, kuvanda na zulu ya maboko.
- Tuba yo na mpila mosi ya pima, tuba yo ngolo.
- Tuba yo na ndinga na zulu, na ndinga na nsi.
- Tuba yo na ti diboko mosi na zulu, ti maboko zole na zulu.
- Bankento tuba yo, babakala tuba yo.
- Bana ya troisième tuba yo, bana ya quatrième, etc.
- Ndonga yai awa tuba yo, ndonga yina kuna tuba yo.
- Kunikisa musapi ntangu bana kele kutuba yo, kunikisa ntu.
- Kubula maboko na konso syllabe, kubula makulu.
- Kutuba yo ti rythme.
- Sala competitio inki ndonga ya bana lenda tuba yo kuluta mbote.
(Pesa bazina ya kiese : Bana ya Kinshasa, Bana ya Mputu, Bana ya Shaba, etc.)
- Kutelema konso mbala bo kuwa ndinga mosi.
- Bana yonso ya kudiaka sakasaka bubuyai tuba yo, bo yonso ya kudiaka loso.
- Bana yonso ya ke lwata basandali tuba yo, bo ya kele makulu ngulu.
- Bana yonso ya ke lwata couleur rouge tuba yo, bo ya ke lwata couleur jaune.
- Bana yonso ya bwala mosi tuba yo, bana yonso ya bwala ya nkaka.
- Bana ya zinga na droite ya nzila, bana ya zinga na gauche.
- Bana yonso ya kele mbuta na kati ya fami tuba yo, bo yonso ya kele leki.
- Kabisa na bandonga, konso ndonga tuba phrase mosi.
- Sonika verse na tableau noir to na ntoto. Na nima, katula bandinga mosi-mosi.
- Bana meka kusonika yo na ntoto to na tableau.
- Nge yantika verse ti bana manisa yo.
- Bana lungisa bandinga ya nkaka na kati ya verse.
- Bana sala bageste ya ke songa ngindu ya verse.

Etc. Ntangu yai, nge mosi yindula bangindu 2 ya nkaka ya lenda pesa variété. Sonika yo awa :
Ngindu ya ntete :

Ngindu ya zole :

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



5. **Bana tuba na bageste.**

Methode ya kutuba ti bageste kele mbote mingi. Beto zola sadila methode yai mbala mingi. Yindula inki bageste lenda songa mabanza ya verse yina. Sala bageste yina ti exaggeratio. Bageste yina ta kuma bonso kima mosi ya lenda kubambukisa bana bandinga ya verse.

6. **Bana lenda yimba verse ti kina.**

Methode ya nkaka ya luta mbote kele kuyidika nkunga ya kele kutuba bandinga ya verse. Tula ngolo nde nge balula bandinga ya verse ve. Nkunga yina kele ve kaka mabanza ya verse, kansi yo kele bandinga ya verse yina kibeni. Yo lenda vanda ti adresse na kati ya nkunga, to bana lenda tuba adresse na ntwala, yimba nkunga ya verse, ti tuba adresse diaka na nima. Nkunga ya kele na rythme ya mbote (ya pesa bana nzala ya kukina) me luta mbote. Ton ya nkunga fweti vanda ngolo ve na kuyimba. Repetitio ta vanda diaka ve mpasi kana bana kele kuyimba nkunga, ti kukina. Bana ta yimba baverse mingi na banzo na bo kana nge longa baverse mutindu yina. Mpila yai ya kulonga verse ya Bible ta sadisa bana na kubambuka yo kuluta bampila yonso ya nkaka.

7. **Longi tendula verse ndambu.**

Bana kele na mfunu ya kuzaba disongidila ya verse ya bo kele kulonguka. Kansi mbala mingi balongi zola kusamuna. Yai kele mbote ve. Kana verse kele mpasi mingi, kana yo ke lomba ntendula mingi, yo luta mbote na kusola verse ya nkaka ya bana lenda bakisa nswalu. En general, kutendula ya verse fweti luta ve une minute.

YINDULA DIAKA

Pesa bamethode tanu ya beto lenda sadila kulonga verse ya Bible:

1. _____
2. _____
3. _____
4. _____
5. _____

Tendula phrase yai: Longi fweti longa verse ti repetitio, mpe ti varieté.

Bana fweti tuba verse mbala ikwa? _____

Longi, mambu ya ta sadisa nge na kusimba malongi yai mbote-mbote ikele kusala yo. Konso ntangu ya nge kele kulonga verse, sala evaluatio nge mosi. Inki bampila bana kele kuzola mingi? Inki kele mpasi na bo ya kubakisa? Inki ngindu ya nkaka Nzambi lenda pesa nge? Inki mutindu nge lenda sala kuluta mbote na ntangu ke kwisa?

Kapu ya Nana

**Inki Ikele Mpila ya Mbote
Na Kulonga Bana Kusadila Bible?**

Dibundu zola nde bana kulonguka Bible mbote na mpila nde bo mona yo bonso kiyeka ya lenda songa bo inki mutindu bo fweti kuzinga. Ebuna beto fweti longa bana inki mpila kusadila Bible. Bana fweti bakisa inki mutindu bo lenda mona malongi bo mosi na kati

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



ya Bible.

Mbote bana vanda na Bible na bo mosi.

Yo kele mpasi na kusosa malongi na kati ya Bible, kana Bible kele na nzo ve, to kana bana kele ve na inswa na kutanga to kusimba yo. Kuluta mbote nde baBible kuluta mosi kuvanda na kati ya nzo ya konso fami. Kana mama to tata zaba kutanga, bo vanda na Bible na bo. Bana mpe kuvanda na Bible na bo, ti konso mwana ya ecole secondaire kuvanda na Bible ya yandi mosi.

Mbote dibundu kuyindula sambu na inki baBible kele kulunga ve na banzo na beto. Kana yo kele nde bantu kele kumona ve mpila kusumba yo, ebuna ntangu muntu kwenda na Kinshasa, dibundu lenda sumba carton ya baBible. Bantu lenda futa na ntwala bonso kupesa commande, kana mbongo ya dibundu kele kulunga ve. Kana bisika kele ya bantu lenda sumba Bible, dibundu lenda songa wapi bisika yina kele, ti inki kele ntalu ya Bible na bisika yina. Dibundu lenda pesa bantu mabanza na kukwenda kusumba yo.

Kana mpila ikele ve kuvanda na Bible ya mvimba, fami lenda sumba kaka Kuwakana ya Mpa sambu na bana. Yo kele na ntalu na nsi, ti bana lenda longuka kusosa malongi na kati na yo ti longuka kutanga yo.

Longi ya ecodim lenda sadisa kupesa bana nzala na kuvanda na Bible. Konso mposo, yandi lenda lomba bana na kusonga baBible na bo, ti kunangula yo na zulu. Kana bana kele kuyimba nkunga ya kele kutadila Bible, longi lenda songa bo na kusadila Bible na bageste. Longi lenda lomba bana ya zaba kutanga mbote nde bo tanga verse mosi to zole na kati ya lesu.

Longa ndambu-ndambu, malembe-malembe.

Beto ta landa malongi yai tii na ntangu ya bana yonso zaba yo mbote-mbote. Malongi yai ta lomba ntangu mingi ve konso mposo. Mbala ya nkaka minute tatu konso mposo ta lunga sambu na malongi. Kusosa verse to kusala competitio ta yika diaka kiteso ya minute 3 tii na 5.

Kuvutukila mingi.

Beto ta vutuka mbala mingi na malongi ya beto me mona ntete. Na nima, beto ta yika ndambu malongi ya mpa. Na bisika mingi na kati ya Bible, Nzambi tuba nde beto kele bantu ya ke vilaka nswalu. Yo yina kuvutukila mingi ikele mfunu.

Ntete, beto longa bandambu zole ya Bible.

Kana dibundu yantika na kulonga inki mutindu kusadila Bible, malongi ya ntete ta tendula luswaswanu na kati ya ndambu ya ntete ya Bible ya beto ke binga Kuwakana ya Ntama, ti ndambu ya zole ya Bible ya beto ke binga Kuwakana ya Mpa. Beto lenda longi malongi yai:

1. **Kuwakana ya Ntama** ikele ndambu ya Bible ya ntama, ya bo sonikaka ntete. Yo kele histoire ya bantu ya Nzambi ya ntama-ntama, ti ya bantu ya Nzambi ya ikele kubingwa Israeli to Bayuda. Yo salamaka na ntwala ya kukwisa ya Yesu Kristo, ti yo kele kusonga beto nde, **NGULUSI TA KWISA**.
2. **Kuwakana ya Mpa** ikele ndambu ya zole ya Bible, ya bo sonikaka na nima. Yo kele histoire ya bantu ya Nzambi ya kele kubingwa balonguki ya Yesu, ti dibundu ya Yesu. Yo salamaka na ntangu ya Yesu Kristo ti kaka fioti na nima na Yandi. Yo kele kusonga beto nde, **NGULUSI MENE KWISA**.

Beto lenda songa bana bandambu yai lenda monika na inki kisika na kati na baBible na bo. Bo lenda sosa dititi ya kele kusonga luyantiku ya Kuwakana ya Ntama ti Kuwakana ya Mpa. Bo lenda longuka kuzaba nswalu kana Bible kele Bible ya mvimba to kana yo kele kaka kitini beto binga Kuwakana ya Mpa. (Yandi ta zaba kana yandi mona nene to fioti na yo.)

Niveau ya Bana:

Malongi ya bana kele kulunguka kaka na munoko, bana yonso lenda longuka yo, ata bana ya fioti to bana ya bwala. Kansi yina kele kulumba kusosa na kati ya Bible, kaka bana ya me zaba kutanga lenda sala yo.

Ya zole, beto longi mikanda ya Bible na bandonga na yo.

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



Beto zola bana kuzaba inki mikanda kele na kati ya Bible, ti inki ordre mikanda yina kele kulanda, ti mikanda lenda kukabwana na inki bandambu. Beto zola bo kubakisa malongi ya nene-nene ya kele na kati ya konso mukanda ti konso ndambu. Mpidina Bible ta vanda diaka ve bonso nzenza na mabanza na bo. Bo ta zaba kusosa nswalu baverse to malongi ya kele na kati ya Bible. Bo ta vanda na mpila na kusonga malongi yai na bantu ya nkaka. Bible ta kuma bonso nduku na bo.

1. Songa bo liste ya “Mambu ya kele na Mukanda Yai” na luyantiku ya Bible. Liste yina kele kusonga bazina ya mikanda ti na inki dititi konso mukanda kele kuyantika. Konso mwana ya kele na Bible lenda kangula Bible na kumona dititi yina. Bana ya kele kutanga mbote lenda tanga bazina ya mikanda na kimvuka. Bana ya tanga mbote mingi ve lenda tuba yo mosi-mosi, na nima ya longi.
2. Songa mpila bo me kabisa mikanda na bandambu. Solula konso ndambu, inki mutindu mikanda na kati na yo ikele.
3. Mbala mingi beto yantika na kulunguka mikanda ya Kuwakana ya Mpa ntete. Beto sala yo mpidina sambu bana kuluta mingi lenda vanda na Kuwakana ya Mpa. Beto sala yo mpidina mpe sambu bana zaba Kuwakana ya Mpa kuluta, ti sambu yo kele ndambu nkufi, kansi Kuwakana ya Ntama kele ndaa. KANSI, nge lenda yantika na Kuwakana ya Ntama kana bana kele kulunguka baleso ya me katuka na Kuwakana ya Ntama.
4. Longuka mikanda ya ndambu mosi ntete, na nima yika mikanda ya ndambu ya nkaka. Mbandu, kana nge kele kulonga mikanda ya Kuwakana ya Mpa, nge ta longa mikanda ya NSANGU YA MBOTE ntete. Na nima, nge ta yika mukanda ya kele HISTOIRE YA DIBUNDU. Na nima, nge ta yika mikanda ya sonikaka na Ntumwa Paulo, etc. Na konso ndambu, landa na kulonga yo tii na ntangu ya bana zaba yo mbote-mbote.

Bibles yonso songa ve bimvuka ya mikanda, yo yina, beto ta tula yo awa:

KIMVUKA YA NTETE—KUWAKANA YA NTAMA

Mikanda ya Moise: Mikanda ya Histoire ya Bayuda na Ntoto na Bo:

Kuyantika	Yozue
Kubasika	Bazuzi
Levi	Ruti
Kutanga	Samuele ya ntete ti ya zole
Kulonga	Bantotila ya ntete ti ya zole
	Bansangu ya ntete ti ya zole
	Esdrasi
	Nehemia
	Estere

Mikanda ya Poesie: Mikanda ya Nda ya Prophecie Mikanda ya Nkufi ya Prophecie:

Yobi	Yezaya	Ozea
Bankunga	Yeremia	Yoele
Bingana	Mawa	Amosi
Longi	Ezekiele	Abdias
Kuluta Kitoko	Daniele	Yonasi
		Mishe
		Nahumi
		Habakuki
		Sofonia
		Agai
		Zakaria
		Malashi

**Nombre ya mikanda na
Kuwakana ya Ntama: 39**

KIMVUKA YA ZOLE—KUWAKANA YA MPA

Mikanda ya Nsangu ya Mbote ya Yesu: Luyantiku ya Dibundu:

Matayo	Bisalu ya Bantumwa
Marko	
Luka	
Yoane	

Mikanda ya Ntumwa Paulo:

Roma
 Korinto ya ntete ti ya zole
 Galatia
 Efezo
 Filipi
 Kolosai
 Tesalonika ya ntete ti ya zole
 Timoteo ya ntete ti ya zole
 Tito
 Filemoni

Mikanda ya Nkaka:

Baebreo
 Yokobo
 Piere ya ntete ti ya zole
 Yoane ya ntete, ya zole, ti ya tatu
 Yude

Mukanda ya Prophecie to Mambu ya Nsuka:

Kusonga

Nombre ya Mikanda na Kuwakana ya Mpa: 27 Bible Yonso: 66

5. Kana bana kele na Bible, bo lenda kangula na mikanda ya bo kele kulunguka. Yo sadisa mingi kana bansadisi lenda vanda sambu na kusadisa bo.
6. Bo lenda sosa mikanda bo mosi, kansi kaka mikanda ya bo me longuka. Bo lenda mona zina ya mukanda na zulu ya dititi.

Niveau ya bana: Malongi ya mikanda, kapu ti verse ya Bible kele kuyantika na bana ya ke longuka kutanga. Beto ke sala yo ve na bana ya fioti to bana ya bwala.

Ya tatu, beto longa bakapu ya Bible.

1] Kana bana me zaba mikanda ndambu mingi, beto lenda longa bo na kumona bakapu (chapîtres) na kati ya Bible. Bakapu kele kumonika na banombre ya nene.

2] Bana yantika na kusosa mukanda ti kapu. Mbandu, bo sosa Yoane kapu 3. To, bo lenda kangula Bible na konso kisika ti songa inki kele mukanda ti kapu ya bo kele kumona.

Ya iya, beto longa baverse ya Bible.

- 1) Beto longa bana na kumona baverse na kati ya Bible. Baverse kele kumonika na banombre ya fioti. Bo fweti bakisa nde konso ndambu ya Bible kele na banombre zole ya kele mfunu—nombre ya kapu ti nombre ya verse.
- 2) Bana yantika na kusosa mukanda, kapu ti verse. Mbandu, bo sosa Matayo 5:8. To, bo lenda kangula Bible na konso kisika ti songa inki kele mukanda, kapu ti verse ya bo kele kumona.
- 3) Kana bo me bakisa mambu yai, bo lenda sala competitio na kuzaba nani ta mona verse nswalu. Bana kele kuzola nsaka yai mingi. To, bo lenda vanda na equipes. Pesa bo bazina ya kele kupesa kiese (Bana ya Université, Bana ya Faculté, Bana ya Mayele Mingi, etc.) Bo yantika kusosa verse, kansi konso mambre ya equipe na bo fweti mona yo yandi mosi na ntwala equipe na bo lenda kununga. Kana muntu mosi mona verse yina, yandi fweti sadisa muntu ya nkaka tii ntangu bo yonso me mona yo. Kansi, mwana mosi lenda ve kusimba Bible ya mwana ya nkaka. Yandi lenda kaka songa yandi na munoko mambu ya lenda sadisa yandi.

PRATIQUE: KUSONGA VERSE NA MPANGI

Bana lenda sala pratique yai: Kana bo me longuka kusosa baverse mbote, konso mposo bo lenda sosa verse na nzo ti songa yo na bibuti. Dibundu lenda songa bibuti nde konso mposo bana ta vanda na pratique yai ya bo fweti sala. Kansi bo lenda sala yo kaka na nima malongi yai me simba mbote-mbote.

YINDULA DIAKA

Lungisa baphrase yai:

Every Child Ministries (Ministères pour Chaque Enfant)
 Ecole du Dimanche Kulonga Bana par Maman Lorella Rosuter

www.teachingforafrica.com



Beto longa bana ntete _____ ya Bible, ya zole _____ ya Bible, ya tatu _____ ya Bible, ti ya iya _____ ya Bible.

Ntangu ikwa malongi yai fweti kubaka? Malongi yai fweti baka kiteso ya minutes _____, ti kusosa baverse kiteso ya minutes _____ tii na minutes _____.

Kuwakana ya Ntama kele kusonga nde Ngulusi _____ kwisa, ye Kuwakana ya Mpa kele kusonga nde Ngulusi _____ kwisa.

Bana ya fioti lenda baka inki malongi na kati ya malongi yai yonso? _____

Liste ya “Mambu ya kele na Mukanda Yai” lenda monika na _____ ya Bible.

YINDULA SESEPIYAI

Sonika awa mikanda yonso ya Bible na ndonga. Tala mpila bo me sonika yo. Nge mosi longuka mikanda ya nge ta longa ntete na bana.

Kapu ya Uvwa

Inki Mpila ya Mbote na Kulonga Bana Kupesa Makabu?

Nzambi kele kulomba bantu ya Yandi na kupesa makabu sambu na kuvutula Yandi matondo. Yai kele mpila mosi ya beto lenda zitisa Nzambi. Yo kele mpila mosi mpe ya beto lenda sadisa kimalu ya dibundu ya Yesu sambu yo kwenda na ntuala na bwala na beto, na Congo yonso, na Afrika ya mvimba, tii na ntoto yonso.

Beto me tuba nde kupesa makabu kele ve mambu ya FWETI salama na ecodim, kansi yo LENDA kana dibundu ke zola. Mabundu mingi me mona nde yo kele mpila ya mbote na kulonga bana kupesa makabu. Bo kele kumona mpe nde yo lenda sadisa dibundu.

Bansiku ya lenda sadisa beto kulonga bana kupesa makabu, yo yai:

1. Ntete, dibundu fweti zenga mambu iya:

- a. *Keti bana ta pesa makabu na ecodim?*
- b. *Kana bo pesa, bo ta pesa inki?* (Mbongo? Masangu? Manioco? Nkuni? Konso yina?) Kana dibundu mona nde mbongo ta vanda mpasi, bana lenda nata kima ya nkaka. Mabundu ya nkaka lumba bana kunata nkuni to buboko to kima ya nkaka ya bo sumba ve, kansi yo kele kumonika na kati ya mfinda to ntoto to bilanga na bo.
- c. *Makabu ya bana ta sala inki?* Makabu ya bana lenda kota kaka na caisse ya dibundu, kansi yo ta pesa bana kikesa kuluta kana bo lenda vanda na caisse na bo mosi ya ecodim. Makabu na bo lenda sumba materiels sambu na ecodim: mpembe, papier, etc. Yo lenda sumba mikanda ya baleso. Yo lenda sadisa bamoniteur ya ecodim na babic, savon, etc.

(Kana dibundu zola ve makabu kusadisa moniteur mutindu yina, bana lenda sala kimalu ya lenda sadisa moniteur na bo. Bo lenda nata nkuni to masa, to bo lenda sosila yandi madia ya kele kumonika na kati ya mfinda. Bo lenda tunga mandala to nata bainti sambu na kuyidika nzo na yandi, etc. Mambu yai yonso lenda pesa kikesa na balongi, ata dibundu kele na mpila ve na kupesa bo lufutu ya kieleka.)

- d. *Nani ta vanda tresorier?* Dibundu fweti zenga nani ta vanda muntu ya ta tala makabu, mpe muntu ya ta sonika rapport sambu na yo. Mbote tresorier kuvanda ve moniteur, kansi muntu ya nkaka, muntu ya kwikama ya kele kuzaba ntalu, mpe muntu ya dibundu lenda tula ntima.

2. Mbote bana pesa makabu na mpila africain. Mfunu ikele ve na kulanda mpila ya banzenza kele kusala.

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



- a. Sola nkunga mosi ya beno ta yimba konso mposo na ntangu ya makabu.
 - b. Yimba ti kina na kikesa.
 - c. Bana kwisa na ndonga.
 - d. Longa bo bansiku ya dibundu na mambu ya makabu (nani kwisa ntete, bo landa wapi, etc.)
 - e. Makabu ta lomba ntangu mingi ve.
 - f. Beto ta pesa bana kiese kana bo nata yo, kansi beto lenda pesa bo nsoni ve ata bo kupesa ve.
3. **Sala yonso na mpila mosi ya kwikama na meso ya Nzambi ti ya dibundu.**
Bana ti bibuti fweti zaba lukanu ya dibundu sambu na makabu ya ecodim. Landa kaka lukanu yina. Pesa rapport na bisambu konso mposo.
4. **Konso mposo, sadila une minute na kupesa ndambu malongi ya ke tadila makabu. *Ndambu malongi ya mbote, yo yai:***
- a. Nzambi zola beto kupesa makabu na kiese. 2 Korinto 9:7
 - b. Nzambi zola beto kuvanda na lukanu ya kupesa, ti na kubumba makabu na ntwala. 1 Korinto 16:2
 - c. Nzambi zola bantu kuvutula Yandi “mosi ya kumi” ya bima yonso Yandi me pesa bo. Kana bo pesa ve, bo kele kuyiba Nzambi, mpe bo kele kuzwa lusilu. Malachi 34:8-11.
 - d. Lukanu ya Nzambi kele nde makabu kusadisa basielo na Yandi ya kele kulonga ndinga na Yandi.
Kutanga 18:24, 1 Timothée 5 :17-18
 - e. Nzambi zola beto kupesa Yandi makabu ya mbote, ya mbi ve.
Bingana 3 :9
 - f. Kupesa makabu kele kubenda lusakumunu ya Nzambi.
Bingana 3 :9-10
 - g. Kupesa makabu ta sadisa ve kana ntima na beto kele ve mbote ti Nzambi. Bingana 15 :9

YINDULA DIAKA

Songa mambu iya ya dibundu fweti zenga na ntwala bana yantika kupesa makabu na ecodim :

1. _____
2. _____
3. _____
4. _____

YINDULA SESEPIYAI

Inki dilongi lenda sadisa bana ya bwala na nge sambu na mambu ya makabu ? Sonika yo awa , ti verse ya Bible ya kele kusonga yo :

.....

Kapu ya Kumi

Inki Ikele Mpila ya Mbote na Kulonga Malongi Ya Kusadisa na Luzingu ya Ntoto?

Kana dibundu zola, balongi lenda baka minute tanu konso mposo na ntangu ya ecodim sambu na kulonga bana ndambu malongi ya lenda sadisa bo na bampasi ya luzingu yai ya ntoto.

Mbandu ya mambu ya bo lenda longa, yo yai:

- Kulonga bana kutunga sambu na kuyidika bilele ya me pasuka

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



- Kulonga bana inki mutindu bo kele kubaka banyoka mingi na divumu
- Kulonga bana ndambu malongi ke tadila kudia ya mbote
- Kulonga bana malongi ke tadila SIDA
- Kulonga bana inki mutindu kutokisa diki, etc.
- Ndambu lusadisu na alphabetisatio

Bansiku ya lenda sadisa beto na malongi ya luzingu, yo yai:

1. Yo lomba ve kuluta minute 5. Kana mfunu kele na kulonga kuluta minute tanu, bo lenda yidika ntangu ya nkaka specialement sambu na malongi yina, to bo lenda yantika club.
2. Beto yindula malongi yonso beto zola pesa sambu na mambu mosi. Beto tula yo na ndonga, na ordre ya ta vanda mfunu ntangu beto longa yo. Beto kabisa malongi na bandambu ya fioti. Beto pesa kaka ndambu mosi ya fioti konso mposho.
3. Malongi vanda ve **kaka kutuba ya longi**. Beto sosa nde **bana kusala** mpe. Mbandu: Kana nge kele kulonga madia ya mbote, nata ndambu madia yina sambu bana kudia yo, to pesa bo bankuni sambu bo kuna yo.
4. Beto sola malongi ya luzingu ya ta sadisa mingi na sika beto ikele.

Baleso ya Luzingu

Ministères pour Chaque Enfant me yidika lukanu ya baleso ya fioti ya luzingu ya ke tadila mambu yai : **1) Paipai, Madia ya Mbote, 2) Nge Ke Kuma Yina ya Nge Kudia, 3) Nkisi Bonso Masa sambu na Kunwanina Diaré**. Bantu lenda yika ndambu ya baleso yai na malongi na bo ya ecodim kana bo mona yo mfunu sika bo ikele. Bo fweti landa ordre yai ve ya beto me pesa. To, kana bo sadila ve baleso ya MCE, bo lenda mona mpila beto me sala baleso yai, ebuna bo kwenda kuyidika baleso na bo mosi na mambu ya bo ke na yo mfunu.

Beto zola benda mabanza ya dibundu na kusonika baleso ya nkaka ya nkufi mutindu yina, sambu na kusadisa na bampasi ya bo kele kumona na sika bo ikele. Bantwadisi ya MCE ta zola mingi kubaka copi mosi ya baleso mutindu yina, kana beno kele na nzala nde bampangi ya nkaka mpe profiter na yo.

YINDULA SESEPIYAI

Inki malongi ya mutindu yai kele mfunu na sika nge ikele ? Yidika lukanu ya malongi yonso ya ta vanda mfunu :

Inki malongi nge me mona mfunu sambu na luzingu ya ntoto ?

.....
Sambu na inki malongi yai kele mfunu na sika nge kele ?

.....
Kabisa malongi yina na bitini ya fioti :

- 1.
- 2.
- 3.
- 4.
- 5.
- 6.
- 7.

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



8.

Nge me yindula inki longi ta tuba. Ntangu yai, yindula inki bana lenda sala bonso participatio :

.....

Awa keke baleso ya fioti ya MCE me yidika bonso mbandu . Tala mbote-mbote mpila ya beto me sala baleso yai :

BALESO SAMBU NA PAIPAI

Paipai, Madia ya Mbote ti ya Mfunu

Awa keke baleso ya fioti sambu na bamposo nana, minute 3-5 konso mposo :

Mposo 1 Songa paipai mosi. Bana lenda simba yo na maboko. Bo lenda repeter :

« Paipai keke madia mosi ya mbote. » « Mbote beto kudia paipai mingi. » « Paipai sadisa nitu na beto. » « Paipai sadisa divumu. »
Songa bo nde paipai keke na bima mingi ya mbote na kati, ya keke kusadisa nitu kuyela mbote, mpe ya keke kusadisa divumu sambu yo baka madia na mpila ya mbote.

Mposo 2 Songa paipai mosi ya kitoko. Zenga yo na bitini na mpila mosi ya kitoko. Tuba nde yo ikeke kitoko na meso—couleur mosi ya kitoko. Kuwa nsudi na yo. Tuba nde, « Mmm ! Nsudi mosi ya mbote ! » Tula kitini mosi na kati ya munoko. Tuba nde, « Mmm ! Yo ikeke ntomo na munoko. » Kumina yo. Tuba nde, « Yo keke mbote na divumu. » Pesa bana yonso kitini mosi ya kudia kana bo zola. Songa bo nde bankeni na yo keke mfunu sambu yo yela mingi na bwala. Tula bankeni na kisika ya mbote ti keba yo mbote sambu na kukuna na mposo ke kwisa.

Mposo 3 Na ntwala ecodim yantika, sadisa bana na kubondula ndambu ntoto mbote. Bana ya ecodim lenda kuna bankeni ya papipai na ntoto yina ti losa yo masa. Tula bana zole responsable na kutula masa konso lumbu. Songa bo na kiese nde bankeni yina ta buta nti ya paipai, ebuna kana yo me yela, bo ta lenda kudia paipai na yo. Bana lenda repeter, « Paipai keke madia mosi ya mbote. Beto zola kudia yo. »

Mposo 4 Paipai keke na vitamin A mingi na kati na yo. Vitamin A ke sadisa meso na beto sambu bo mona mbote. Bana repeter nde, « Paipai ke sadisa meso na beto. » Paipai keke na Vitamin C mingi na kati na yo. Vitamin C ke sadisa nitu ya mvimba, sambu yo kuma maladi nswalu ve. Bana repeter nde, « Paipai ke sadisa nitu na beto yonso. » Songa paipai, ti zenga yo na bitini sambu konso mwana lenda kudia kitini mosi.

Mposo 5 Songa paipai mosi. Paipai ke sadisa divumu ti misopo na kubaka bavitamin yonso ya mbote ya ikeke na kati ya madia na beto. Paipai ke sadisa kana muntu ke na divumu ya mpasi. Bana tula diboko na divumu ti repeter, « Paipai ikeke mbote sambu na divumu. » Na nima ya ecodim, pesa bana bitini ya paipai sambu bo kudia. Pesa bo mpe bankeni na yo, sambu bo kuna yo penepene na nzo na bo.

Mposo 6 Yula nani kunaka bankeni ya paipai. Pesa bo felecitatio. Kuvutukila ndambu malongi sambu na paipai.

Mposo 7 Yula bana sambu na inki paipai keke mbote. Pesa kiese na bana ya tuba mbote.

Mposo 8 Yula bana nani na kati na bo kudiaka paipai na mposo me luta. Bana ya nkaka fweti tuba, « O yea ! Champio ! » sambu na bo.

BETO KELE BONSO BETO KUDIA

Baleso ya ke tadila Madia ya Mbote

Baleso ya fioti sambu na bamposo sambanu:

Mposo 1 Yula : Na mambu ke tadila santé, inki keke mambu beto ke na yo mfunu ?

Bana lenda pesa bamvutu, mbandu :

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



- Beto ke na mfunu ya meso ya ngolo sambu na kumona mbote.
- Beto ke na mfunu ya kuvanda ngolo sambu na kuzomba to na kuloba bambisi.
- Beto ke na mfunu na kuvanda ngolo sambu na kuzinga mingi, sambu beto kufwa ve na kileki na beto.
- Beto ke na mfunu na kuvanda ngolo sambu beto lenda baka masa sambu na fami.
- Beto ke na mfunu na nitu ya ngolo sambu beto bela ve.
- Beto ke na mfunu ya nitu ya ngolo sambu beto lenda sakana mingi.
- Beto ke na mfunu ya mayele sambu beto lenda sala mbote na nzo-nkanda. Etc.

Yula : Inki mutindu madia beto kudia sadisa beto na mambu yai yonso ?

Bana lenda pesa bamvutu, mbandu :

- Madia ya mbote sadisa nitu na kubuya bamikrobi ti maladi ti bamputa.
- Madia ya mbote sadisa nitu kuyela mbote.
- Madia ya mbote sadisa meso kumona mbote.
- Madia ya mbote sadisa mutomfu sambu beto vanda mayele. Etc.

Mposo 2 Beto ke na mfunu na kudia madia mingi mutindu na mutindu. Songa madia ya mbote ya mutindu ya mutindu. Songa bo madia yai kele inki, ti inki mutindu yo kele kuyela. Songa bo mutindu bo lenda yobisa yo ti lamba yo. Nata madia mosi ya mbote ya nge me lamba na mutindu ya nkaka. Pesa bo yonso ndambu sambu bo kutesa yo.

Mposo 3 Songa bana nde bubuyai beto ta mona kima mosi nitu na beto ke na yo mfunu—protein. Mipasi kele nde mbala mingi, beto kudia ve protein ya kulunga. Sambu na inki beto ke na mfunu ya protein ? Sambu protein sadisa misisa na kuyela mbote ti ngolo. Sambu protein pesa mabanza ya mbote sambu na kupesa mayele, kansi buzoba ve. Sambu nsuki kuvanda mbote ti kitoko, mbwaki ve.

Mposo 4 Nitu na beto kele na mfunu ya protein. Ebuna, inki madia kele na protein mingi ?

Madesu, mbisi ya masa, maki, mabele, bankeni, mantete, nguba, plantain, mbisi, nsusu, banyama, masangu, pondo, mingolo, etc. Keti madia yai yonso ikele ntalu bonso mbisi ? Ikele ve. Bantu lenda vanda ngolo ti bo lenda vanda na santé ya mbote, ata madia mingi ya bo kele kudia ikele mbisi ve, ikele ntalu mpe ve. Madia mingi ya protein, nge lenda kuna yo na bilanga, to nge lenda mona yo na mfinda.

Mposo 5 Nata ndambu madia ya kele na protein ya mbote. Songa bana nde, Kana bo zola kudia mbote, bo ke na mfunu ya madia ya protein bonso yai. Songa bo madia ya kele na protein. Bo simba yo. Bo tuba zina na yo. Solula mpila madia inki kele kuyela, ti inki mutindu bo ke sukulaka yo, mpe bo ke lambaka yo. Pesa bo ndambu ya madia mosi ya protein ya nge me lamba, to mosi ya ke lamba ve nde bo kulamba yo, mbandu, mantete to nguba.

Mposo 6 Yula bana, Inki madia ya mbote beto lenda mona na mfinda na beto ? Bo pesa mvutu, mbandu : bisaka na mutindu na mutindu, banyama, mingolo. Inki madia ya mbote beto lenda loba to zomba ? Bana pesa mvutu, mbandu : Mbisi ya masa, mbisi ya mfinda to ya nseke, nyoka, etc.

KANA MWANA KE SALA DIARÉ

Baleso ya fioti sambu na bamposo 8 :

Mposo 1 Diaré ikele maladi mosi ya mpasi mingi. Yo ke pesaka mpasi mingi na divumu ti na misopo. Kana mwana sala yo mingi, yo lenda nata lufwa. Ebuna kana mwana yantika na kusala diaré, mfunu ikele na kusadisa yandi nswalu. Masa yai to nkisi yai ikele mpila mosi ya kusadisa mwana ya ikele na diaré.

Nge sala nkisi bonso yai :

Vukisa : 1 litre masa ya kitoko, ka kutokisa (ya kele tiya diaka ve)

2 balutu ya nene ya sicre to bwiki

ndambu-fiote mungwa

ndambu-fiote bicarbonate, to ndambu-fiote mungwa diaka

ndambu ya zole ya dikopa ya masa ya malala (to koko,

dinkondo ya kututa, to konso mbuma ya lenda monika)

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



(Songa carte ya malongi yai kana yo kele, to sonika yo na tableau to na papier.)

Mposo 2 Diaré lenda vanda kidimbu ya maladi ya ngolo ya docteur fweti sansa. Kana mwana baka ngolo nswalu ve, bibuti na yandi fweti sosa docteur. Kansi mbala mingi, nkisi yai lenda sadisa mpe. Kuvutukila malongi ya carte.

Mposo 3 Sala demonstratio kusonga bana inki mpila kusala nkisi yai. Nge sala nkisi na meso ya bana, ti songa bo yonso nge kele kusala. Vanda na balutu to makopa sambu bana lenda meka yo. Pesa konso mwana lutu to dikopa ya kitoko, ti yobisa yo na nima.

Mposo 4 Sala nkisi na ntuala ya classe, kansi tula ve masa ya malala. Nata masa ya bambuma 5 to 6 mutindu ya mutindu kana yo kele. Tula nkisi na makopo 5 to 6, ti ndambu masa ya mbuma ya nkaka na konso dikopa. Bana lenda tesa yo ti songa inki masa ya mbuma bo ke zola kuluta na nkisi yina.

Mposo 5 Mwana mosi lenda sala nkisi yina na meso ya classe. Yandi lenda mona carte ti tendula inki yandi ke sala. Bana ya nkaka lenda bambukisa yandi kana mfunu ikele. Na nima ya classe, bana kwenda kupesa nkisi yai na mama ya kele na mwana ya kubela. Bo tendula yandi nkisi yina ti tula mwana na lombilu.

Mposo 6 Mwana ya nkaka lenda sala nkisi na meso ya classe. Mbala yai, yandi sadila ve carte, kansi bana ya nkaka sadisa kana yandi kuvila. Bo sadila nkisi yina bonso bo salaka na mposo me luta.

Mposo 7 Misopo kele kisika na kati ya nitu ya kele kubaka masa ya kele na madia na beto. Misopo kele kusimba yo ti kutula yo na kati ya menga sambu yo kwenda na nitu ya mvimba. Masa yina ikele mfunu mingi sambu na muntu. Kana yandi ke sala diare, misopo ke simba masa ve. Ata mwana kunwa masa mingi ya mbote, yonso kele kaka kubasika diaka. Nitu ke baka yove. Yo yina, bana lenda kufwa sambu na diare, sambu menga kele kaka mfunu na kati ya nitu. Nkisi yai ya beto ke sala, yo kele kubenda nitu sambu yo simba masa diaka mbote. Yo ke sadisa bana mingi na mpila yina.

Mposo 8 Bana songa nge inki mutindu na kusala nkisi ya diaré. Bo sala na bageste bonso bo kele kusala yo. Bo songa sambu na inki yo ke sadisa. Bo songa inki muntu fweti sala kana diaré kulanda kaka (sosa docteur nswalu). Pesa bana devoir kutendula bibuti na bo mambu yonso ya bo me longuka.

KITINI YA TATU MALONGI TO LESO YA BIBLE

Kapu Kumi na Mosi Inki Mpila Kusola Ndambu ya Bible bonso Leso?

Kusola Ndambu ya Bible ya Kulunga

Inki ndambu ya Bible ta lunga bonso lesa? Yo fweti vanda histoire to ndambu ya histoire ya kele ndambu complet. Mabanza na yo fweti vanda ya kulunga. Bible ya Kituba kele kusonga mabanza na bapapagraph. Leso lenda vanda verse to paragraph to ndambu bapapagraph, ya mabanza mosi ya kulunga.

Every Child Ministries (Ministères pour Chaque Enfant)
Ecole du Dimanche Kulunga Bana par Maman Lorella Rosuter

www.teachingforafrica.com



Longi fweti longa ve konso verse na kati ya kapu, to konso kapu na kati ya histoire ya lesa. Yandi lenda katula baverse ya sadisa ve na malongi yandi zola kupesa. Mbandu: Kuyantika kapu 37 tii na 50 keke histoire ya Yosefi, kansi bandambu ya nkaka na kati ya bakapu yina songa ve histoire yina. Mbandu: kapu 38 ke songa mambu ya nsoni ya Yuda, kapu 46:1-5 ke songa ndosi ya Yakobi, ti 46:8-26 ke songa bazina ya bantu na fami ya Yakobi ya kwendaka na Ezipte. Kana longi vandaka kulonga histoire ya luzingu ya Yosefi, yandi lenda katula baverse yina yonso, sambu yo keke kusonga ve histoire ya Yosefi, ata yo keke kumonika na kati ya histoire na yandi.

Kana histoire keke nda, to kana bana keke bana ya fioti, longi lenda sola kaka baverse ya keke mfunu mingi, to yandi lenda kabisa histoire yina na bandambu ti longa yo na baleso mingi. Mbandu: Kuyantika kapu 37 lenda vanda baleso 4. Tata pesa Yosefi lele (37:1-4) lenda vanda lesa mosi. Bandosi ya Yosefi (37:5-10) lenda vanda lesa ya zole, bambuta teka Yosefi (37:11-27) lenda vanda lesa ya tatu, ti Yosefi kuma na Ezipte (37:28-36) lenda vanda lesa ya iya.

Histoire ya mbote sambu na bana keke yina ya keke na action na kati na yo. Histoire ya keke kaka malongi ya bantu me tuba, yo keke kuluta mpasi ya kulonga. Bingana ya Yesu keke mpasi ve na kulonga, sambu ata yo keke malongi ya Yesu tubaka, action keke na kati ya bingana yina.

Kana longi ta longa ve konso verse, yo ta sadisa yandi na kutula kidimbu na kati ya Bible na yandi sambu na kusonga inki verse yandi ta longa ti inki verse yandi ta longa ve. Kana yandi sonika bidimbu yina na crayon, yandi lenda katula yo na nima kukonda mpasi.

YINDULA MBOTE

Tanga Bisalu kapu 16. Kabisa yo na bandambu ya ta lunga bonso baleso sambu na classe na nge. Sonika awa inki bandambu nge me yindula:

Classe na nge keke na inki age to niveau? _____

Verses: Bandambu ya lenda sala lesa:

Kapu Kumi na Zole

Inki Ikele Kikuma to But to Ntu ya Dilongi ya Lesa?

Ntangu bambuta kutana na bisambu na bo, pasteur to muntu ya nkaka ke samunaka to ke longaka ndinga ya Nzambi. Ntangu bana kutana na bisambu na bo ya ecodim, longi fweti longa mpe ndinga ya Nzambi na mpila ya bana lenda bakisa yo. Ndambu yai ya ecodim ikele malongi to lesa ya Bible.

Mambu ya ntete ya longi fweti bakisa ikele kikuma to but ya lesa. Bantu ya nkaka keke kubinga yo ntu ya dilongi ya lesa. Kikuma to but ikele dilongi ya nene ya nge keke kupesa na kati ya lesa ya Bible. Yo keke malongi ya nge zola bana kulonguka keti kusala sambu na lesa.

Kikuma to but ya lesa keke mvutu na bangiufula yai zole:

1. Na nsuka ya lesa yai, mono zola bana na kuzaba to kubakisa inki?
2. Na nsuka ya lesa yai, mono zola bana na kusala inki?

Kana beto meka kulonga malongi mingi-mingi na kati ya lesu mosi, ata dilongi mosi ta simba ve. Beto balongi fweti yindula mbote. Kana kaka dilongi mosi lenda simba na kati ya lesu yai, beto zola inki dilongi kusimba? Dilongi yai kele kikuma to but ya lesu yina.

Bahistoire ya nkaka kele na malongi mingi ya lenda monika na kati na yo. Longi ta yindula malongi yina yonso, ebuna yandi ta sola dilongi mosi ya yandi ke mona ta sadisa bana na classe na yandi kuluta. (Yindula diaka nani kele na classe na nge—bakristo ya ntama, bakristo ya mpa, bana ya me balula ntima ntete ve, to bana ya kele bamambre ya dibundu ya nkaka.)

Mbandu: Lesu ya ke monika na Bisalu 16:25-34-- Ntumwa Paulo ti Silasi na Boloko ya Bwala Filipino Na histoire yai, beto lenda basisa malongi yai:

1. Mbote bakristo kumisa Nzambi, ata na ntangu ya mpasi.
2. Nzambi zola nde beto kembila Yandi ntangu yonso.
3. Muntu ta guluka kana yandi tula ntima na Yesu Kristo.
4. Bakristo mpe ta mona mpasi.
5. Mbote beto botama na nima beto me ndima Yesu Kristo.

Malongi yai yonso ti ya nkaka mpe kele na kati ya histoire yai. Kansi, beto kele na ntangu ve kutuba malongi yai yonso na ecodim. Kana beto tubaka yo yonso, bana mpe ta vanda na mpila ve na kusimba yai yonso mbala mosi. Kuluta mbote beto sola na kati ya malongi yai yonso kaka dilongi mosi. Inki dilongi ta sadisa bana kuluta na sika ya nge kele kulonga?

Kana bana mingi me balula ntima ntete ve na Yesu, nge ta sola but yai: Muntu ta guluka kana yandi tula ntima na Yesu Kristo. But yina ta sadisa bo. Kansi, kana bana na classe na nge ikele bakristo bo yonso, dilongi yai ta sadisa bo mingi ve. Kana bo mingi kele bakristo ya mpa ya me botama ntete ve, kikuma to but ya lenda sadisa bo ikele yai: “Mbote beto botama na nima beto me ndima Yesu Kristo.” Kikuma to but yina lenda benda mabanza na bo na mbotika. Kansi, kana bo yonso me botama, dilongi yai ta sadisa bo mingi ve. Bo ke na mfunu ya kikuma to but bonso “Nzambi zola nde beto kembila Yandi ntangu yonso,” to “Mbote bakristo kumisa Nzambi, ata na ntangu ya mpasi.”

Beto baka mbandu ya nkaka. Nge mosi meka kubasisa malongi ya lenda monika na histoire yai, Bisalu 19:11-20—Ntumwa Paulo na bwala Efeso. Sonika konso dilongi awa:

1. _____
2. _____
3. _____
4. _____
5. _____

Na kati ya malongi yai ya nge me basisa, inki dilongi kele kutadila bavidi?

No(s): _____ Keti bana mingi na classe na nge kele bavidi? _____ Keti yo ta vanda mfunu na kulonga malongi yai bonso kikuma ya lesu? _____

Na kati ya malongi yai ya nge me basisa, inki malongi lenda sadisa bakristo ya mpa? No(s): _____ Keti bana mingi na classe na nge kele bakristo ya mpa? _____ Keti yo ta vanda mfunu na kulonga malongi yai bonso kikuma ya lesu? _____

Na kati ya malongi yai ya nge me basisa, keti malongi ya nkaka lenda sadisa bana ya kele bamambre ya dibundu ya nkaka?

_____ Inki nombre(s)? _____ Bana ikwa na classe na nge kele bamambre ya dibundu ya nkaka? _____ Keti malongi yai lenda vanda mfunu sambu na bo? _____

Na kati ya malongi ya nge me basisa, keti malongi ya nkaka lenda sadisa bana ya kele bakristo ya ntama? _____ Inki nombre(s)? _____ Bana ikwa na classe na nge kele bakristo ya ntama? _____ Keti malongi yai lenda sadisa bo? _____

Ntangu yai, katula malongi ya lenda sadisa mingi ve na classe na nge. Na kati ya malongi ya me bikala, nge fweti sola KAKA DILONGI MOSI MPAMBA sambu na kuvanda kikuma to but ya lesu yai. Inki kikuma ta sadisa bana na classe na nge ya kuluta?

Kana nge me sola dilongi mosi, yindula mutindu yai: Bana fweti zaba inki, ti bo fweti sala inki? Lungisa phrase yai: Na nsuka ya lesu yai, bana ta zaba nde _____, ye bo ta _____ (sala inki)?

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



Mbandu: Kikuma: Mbote beno botama na nima beto me ndima Yesu Kristo. Mono zola bana na kuzaba nde, bakristo ya ntete bakaka mbotika nswalu na nima ya bo ndimaka Yesu. Mono zola bana kukota na malongi ya mbotika.

Mbala mingi, kana longi kele kulanda mikanda ya baleso, kikuma ta vanda ya kusonika dezia na kati ya mukanda sambu na konso lesu. Yai lenda sadisa, sambu yo lenda pesa ngindu mosi inki lenda vanda kikuma ya mbote. Kansi nge longi kele muntu ya fweti zenga kana kikuma yina ta sadisa bana ya nge kele kulonga. Kana ve, nge lenda sola kikuma ya nkaka sambu na lesu.

Kusola kikuma to but ya mbote ya lesu ikele mfunu mingi, sambu na nima, nge ta yindula kikuma yina ntangu nge kele kuyidika lukanu ya konso ndambu ya program. Nge ta sola bankunga ti verse ya Bible ya kwenda nzila mosi ti kikuma yina.

Mbandu: Lesu Bisalu 19:11-20. Kikuma: Kuzaba nde Nzambi kele kubuya mambu yonso ya kindoki. Yo yina, mbote beto bakristo yoka tiya bima yonso ya kindoki ya beto kele na yo. Nge ta yindula kikuma yai ntangu nge kele kusola bankunga, ebuna nge lenda sola nkunga bonso “O Keba Maboko Inki Nge Sala (Kindoki Ve!)” to “O Kindoki Yambula.” Nge ta yindula kikuma yai ntangu nge kele kusola verse ya kulonguka, ebuna nge ta sola verse bonso Bisalu 19:19, ya kele kusonga nde bo yokaka mikanda na bo ya kindoki.

YINDULA DIAKA TI INTERROGATIO

Nge mosi tendula inki kikuma ya lesu ikele:

.....
Songa mambu zole ya nkaka ya fweti kwenda nzila mosi ti kikuma ya lesu:

1.

2.

.....
Lungisa phrase yai: Kikuma to but ya lesu kele ntu ya dilongi ya kele kusonga inki bana fweti _____ sambu na lesu yai, ti inki bo fweti _____.

Keti yai lenda vanda kikuma to but ya lesu: “*Lubutuku ya Yesu*”? Sambu na inki?

YINDULA SESEPIYAI

Tanga baleso yai na Bible. Basisa malongi, ti sola dilongi mosi bonso kikuma ya lesu. Sonika yo na mpila ya beto me tuba.

Lesu	Malongi	Kikuma ya Lesu
Mpukumunu Ya Yesu Matayo 4:1-11	1. _____ 2. _____ 3. _____ 4. _____	Na nsuka ya lesu yai, bana ta zaba nde _____, ye bo ta (sala inki)? _____ _____
Banzo zole Matayo 7:24-27	1. _____ 2. _____ 3. _____ 4. _____	Na nsuka ya lesu yai, bana ta zaba nde _____, ye bo ta (sala inki)? _____ _____
Yesu kudia na	1. _____	Na nsuka ya lesu yai, bana ta zaba

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



Bantu na 2. _____ nde _____,
 Masumu 3. _____ ye bo ta (sala inki)? _____
 Matayo 4. _____
 9:10-13

Kingana ya 1. _____ Na nsuka ya lesu yai, bana ta zaba
 Mbongo ya 2. _____ nde _____,
 Vilaka 3. _____ ye bo ta (sala inki)? _____
 Luka 15:8-10 4. _____

Zashé balula 1. _____ Na nsuka ya lesu yai, bana ta zaba
 Ntima 2. _____ nde _____,
 Luka 19 :1-10 3. _____ ye bo ta (sala inki) ? _____
 4. _____

Kapu Kumi na Tatu

Inki Ikele Bitini Iya ya Konso Leso ?

Konso lesu to malongi ya Bible ikele na bitini iya. Yai ikele bitini ya lesu ya longi ta longa na bana. Kikuma ya lesu ikele ve kitini mosi na kati na yo, sambu kikuma to but ya lesu kele mabanza ya ta fulusa bitini iya yonso, mpe sambu kikuma to but kele bonso base ya bitini iya yina yonso.

Bitini iya ya lesu ikele :

1. Kuyantika (Introductio)
2. Malongi kibeni ya Bible to histoire ya Bible (Développement de Leçon)
3. Devoir sambu na bakristo (Applicatio pratique)
4. Kubinga na Yesu sambu na bo ya me yamba Yesu ntete ve (Invitatio)

Kuyantika ikele mpila na kubenda mabanza ya bana sambu bo kuwa mbote malongi ya Bible.

Malongi kibeni ikele histoire mosi ya nkufi to ntendula ya dilongi mosi ya nkufi na kati ya Bible. Yo kele bonso développement ya lesu. Yo lenda sadila bamethode to ba-activite mutindu na mutindu sambu na kulonga lesu yina.

Devoir sambu na bakristo ikele mambu mosi ya bakristo lenda sala na mposo ke kwisa sambu na kulemfuka na malongi ya lesu.

Kubinga na Yesu ikele mpila ya longi lenda benda mabanza ya bavidu sambu bo bakisa nde bo kele na mfunu ya kuguluka, mpe sambu bo zenga kulanda Yesu Kristo. Kubinga yina ta songa bana mpila ya bo lenda kuwa malongi ya nkaka ya lenda sadisa bo na mambu ya kuguluka.

Bitini iya fweti salama na inki ndonga ?

Bitini iya yai fweti salama na inki ndonga to ordre ? Kuyantika fweti vanda mambu ya ntete, sambu yo kele kuyantika yina ya kele kubenda mabanza ya bana sambu bo kuwa mbote malongi ya Bible. Malongi ya Bible kibeni fweti vanda mambu ya zole, sambu devoir ti kubinga fweti basika na malongi yina.

Kaka bitini ya nsuka—devoir ti kubinga na Yesu, bitini yai lenda vanda kubaluka. Devoir lenda salama ntete, ebuna na nima, Kubinga na Yesu. To, Kubinga na Yesu lenda salama ntete, ebuna na nima, Devoir.

Mbandu :	LUKANU YA LONGI A	LUKANU YA LONGI B
	1. Kuyantika	1. Kuyantika
	2. Malongi kibeni ya Bible	2. Malongi kibeni ya Bible
	3. Devoir	3. Kubinga
	4. Kubinga	4. Devoir

Every Child Ministries (Ministères pour Chaque Enfant)
 Ecole du Dimanche Kulonga Bana par Maman Lorella Rosuter

www.teachingforafrica.com



Lukanu ya Longi A ti Lukanu ya Longi B, yonso zole ikele mbote.

Beto lenda fwanikisa kulonga lesu na kutunga nzo. Beto lenda tuba nde Kikuma to But ya lesu keke bonso fondement ya keke na nsi ya ntoto, ya keke kusimba nzo. Yo ke monika ve, kansi yo keke mfunu mingi. Nzo ta vanda ngolo kana fondement keke ngolo. Lesu ta vanda mbote kana Kikuma keke mbote. Longi keke kusonga bana ve na munoko nde, « Tala, kikuma na beto keke yai ». Kansi, bo ta bakisa yo nswalu na malongi yonso ya keke kupesama.

Kuyantika ti Malongi Kibeni keke bonso bibaka ya nzo. Longi keke kutunga bapartie yai, bonso bantu keke kutunga nzo.

Devoir ti Kubinga keke bonso ludi ya nzo. Ata bibaka keke mbote, kana ludi keke ve, masa ya mvula ta simba bantu. Kiteso mosi, ata malongi keke mbote, kana longi kupesa ve devoir to kubinga, yo ta vanda mpasi sambu na bana na kusadila lesu yina.

Ludi keke na bitini zole—mosi na gauche ti mosi na droit. Yonso zole keke mfunu. Lesu keke na mfunu ya devoir sambu na bakristo ti Kubinga sambu na bavidi, yonso zole. Ebuna lesu yina ta simba konso mwana, ata yandi keke mukristo, ata yandi keke muvidi.

YINDULA DIAKA

Inki keke bitini iya ya konso lesu ? 1. _____, 2. _____
3. _____, 4. _____.

Kapu Kumi na Iya

Inki Ikele Mpila ya Mbote na Kuyantika Lesu ?

Ntangu longi zola longa lesu ya Bible, mbala ya nkaka bana ikele kuyindula mambu mingi ya nkaka, mambu ya keke kutadila lesu ya Bible ve. Longi keke na mfunu na kubenda mabanza na bo, na kuyantika malongi na yandi na mpila ya ta simba mabanza ya bana. Kana kuyantika ya lesu keke mbote, bana ta yindula bamambu na bo diaka ve, kansi bo ta yantika kuyindula mambu ya keke kutadila lesu ya Bible. Mpidina bo ta vanda na nzala ya kuluta na kulanda malongi.

Inki ta lunga ve bonso luyantiku ya lesu ?

Banlongi ya nkaka keke kuyantika lesu na bampila mingi ya keke kulunga mingi ve. Ndambu ya bampila ya keke mbote mingi ve, yo yai : (Bampila yai yonso keke mbote ve sambu bo benda ve mabanza ya bana, to sambu yo lomba ntangu mingi na kusala yo.)

- Kutanga histoire ya nda na kati ya Bible
- Kutanga lesu ya mukanda ya ecodim na meso ya classe
- Kusonga bana kikuma ya lesu
- Kunganina bana sambu bo vanda pima, bo kuwa

Inki ta lunga mbote bonso luyantiku ya lesu ?

- Ngiufula ya ta benda mabanza ya bana, yina ya bo fweti yindula
- Histoire ya keke kutadila luzingu na bo (malongi ya Bible ta pesa mvutu)
- Revisio ya baleso ya ntama ya keke mfunu sambu na lesu yai

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



- Théâtre ya ke tadila lesa
- Kima ya kusonga ya ke tadila lesa mpe ya ta benda mabanza ya bana
- Nkunga ya ke tadila lesa
- Problème ya ke tadila lesa

Mbandu ya kuyantika ya kele mbote :

1. Inki nge ta banza kana tata na nge pesaka lele mosi ya mpa, ya kitoko na leki na nge, kansi na nge, mbuta ya fami, yandi pesaka kima ve ? Inki mutindu nge ta mona yo ? (Yai kele ngiufula ti histoire to problème ya kele kutadila lesa mpe luzingu ya bana) Na mukanda ya Kuyantika na Bible, beto mona leki mosi zina ya Yosefi. Bambuta ya Yosefi waka kimpala sambu tata na bo, Yakobi, pesaka leki Yosefi lele ya kitoko, kansi na bo, bambuta ya fami, yandi pesaka kima ve. (Kota na lesa kibeni ya Bible, Kuyantika kapu 37.)
2. Yimba nkunga, « O luvunu, o luvunu, o luvunu yambula ! » Bana, Bible ke songa beto histoire ya bantu zole ya tubaka luvunu. Mono banza bo monaka yo luvunu ya fioti, kansi yo nataka mawa mingi. (Kota na lesa kibeni ya Bible, Bisalu 5 :1-11.)

Inki mpila kusadila revisio bonso kuyantika ya lesa ?

Inki ntangu revisio ya baleso ya ntama lenda vanda kuyantika ya lesa ya mpa ? Revisio lenda vanda mbote kana baleso kele kulanda mukanda mosi ya Bible (mbandu : baleso ya mukanda ya Bisalu). Yo lenda vanda mbote kana baleso ikele **kulanda luzingu ya muntu** mosi (mbandu : baleso ya luzingu ya Ntumwa Piere). Yo lenda vanda mbote kana baleso ikele **kulanda thème to ngindu mosi** (mbandu : baleso ya kele kutadila lombilu).

Kana baleso kele kulanda mukanda ya Bible mosi, revisio ikele mfunu sambu bana landa mabanza yonso ya mukanda yina, to mambu ya nene ya kele kusonika na mukanda yina.

Kana baleso kele kulanda luzingu ya muntu mosi ya Bible, revisio ikele mfunu sambu bana bambuka inki muntu yina me sala tii ntangu ya lesa. Bana ta vanda na nzala na kuzaba inki diaka yandi ta sala, to inki mutindu yandi ta basika na bampasi na yandi. Revisio ta sadisa bo mpe na kuvukisa mambu ya nene ya muntu yina salaka ye tubaka na ntwala.

Kana baleso kele kulanda thème to ngindu mosi, revisio ta songa diaka inki bana me longuka na mambu yina tii ntangu ya lesa.

Longi fweti keba nde yandi kusala ntangu mingi ve na revisio. Yandi ta tuba bahistoire yina ya ntama yonso diaka ve. Yandi ta tuba kaka ngindu ya nene na phrase mosi ya nkufi.

Bangiufula ikele mbote na revisio, sambu bo benda bana na kuyindula. Bangiufula ya yantika « Sambu na inki... » kele mbote mingi.

Nda ya Kuyantika

Longi fweti keba nde kuyantika ya lesa kuvanda nda mingi ve. Mbote yo baka kiteso ya une minute mpamba, to minute zole to tatu kana yo kele théâtre to nkunga. Yo lenda luta ve minute tatu.

YINDULA DIAKA

Sambu na inki kuyantika ya lesa kele mfunu ?

.....
Songa bampila sambanu ya mbote ya longi lenda yantika lesa.
.....

Revisio kele mbote bonso luyantiku ya lesa kana lesa kele inki mutindu ?
.....

YINDULA SESEPIYAI

Beto yindula diaka baleso ya beto yindulaka na kapu me luta. Sola mpila mosi ya mbote na kuyantika konso lesa :

Mpukumunu ya Yesu
Matayo 4 :1-11

Banzo Zole
Matayo 7 :24-27

Yesu Kudiaka na
Bantu ya Masumu
Matayo 9 :10-13

Kingana ya Mbongo
Ya Vilaka
Luka 15 :8-10

Zashé Balulaka Ntima
Luka 19 :1-10

Keti kuyantika na nge ta benda mabanza ya bana ? Ketu kuyantika kele kutadila lesa na mpila nde yo ta vanda mpasi ve na kukota malongi kibeni ya Bible ? Ketu luyantiku ta lomba ntunga mingi ve ?

Kapu Kumi na Tanu

Inki Ikele Mpila ya Mbote na Kulonga Malongi ya Bible ?

Malongi ya Bible ikele kutendula ya histoire to ya malongi ya Bible kibeni. Yo kele kwenda nzila mosi ti kikuma ya lesa, ti kusonga ntendula ya malongi yina. Yo kele bonso développement ya lesa. Yo fweti vanda ve kaka nde longi tuba ti bana kuwa. Ikele ve ! Malongi ya Bible lenda sadila bamethode mingi active, to ba activité mingi (mambu mingi ya bana lenda kusala) sambu na kulonga lesa ya Bible.

Kulonga Malongi Kibeni ya Bible

1. Yo kele mfunu mingi nde longi *yidika lukanu ya lesa na ntwala*. Kapu 17 ta songa mpila na kusala yo. Yo kele mfunu nde longi kuzaba lesa mbote-mbote na ntwala yandi meka kulonga yo. Malongi ta vanda mbote mingi ve kana longi me tula ngolo ve kuyidika lukanu ya lesa. Malongi ta vanda ngolo ti mbote kana longi me longuka lesa mbote, ti kana yandi me yidika lukanu ya mbote na kulonga yo.
2. Longi fweti bambuka kikuma ya lesa, sambu yandi ta zola kuyidika lukanu ya lesa na mpila nde bana ta bakisa kikuma yina.
3. Longi lenda sadila mukanda ya baleso na kuyidika lukanu ya lesa, kansi yandi lenda tangila bana mukanda yina ve.
4. Longi lenda tanga ve baverse mingi ya Bible mbala mosi na meso ya bana.
5. Longi fweti longa na kikesa.

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



Mpila mosi ya kulonga leso

Mpila mosi ya mabundu mingi me mona mbote na kulonga leso keke yai :

1. Kukabisa leso na bandambu ya fioti ya keke kulanda action ya leso. Konso ndambu lenda vanda verse mosi, zole to tatu .
2. Na konso ndambu ya leso, sala mambu yai iya :
 - Tanga mbote-mbote verse ya keke kusonga action.
 - Tendula to yula bana mambu ya baverse yina.
 - Bana sala théâtre na kusonga mambu yina.
 - Bana yimba nkunga mosi ya fioti ya keke tadila mambu yina.
3. Landa mpila beto me sala mambu yai iya na baleso ya mukanda ya Yonasi. Tala mpila beto me kabisa konso leso na bandambu ya fioti. Na nima, beto me sala mambu yai iya na konso ndambu ya leso.

Ndambu ya Mukanda sambu na Kulonga Yonasi, yo yai :

Leso 1 (Développement)

1. Nzambi binga Yonasi Yonasi 1 :1-2

- A. **Tanga** na meso ya bana : Yonasi 1 :1-2 na malembe yonso.
- B. **Yula** bana : Nzambi bingaka Yonasi na kuwenda wapi ? (*Mvutu* : Na Nineve)
- C. Bana zola sala **théâtre** kusonga mpila Nzambi bingaka Yonasi.
- D. **Yimba** na ton ya « Yesu Azali Awa », to sala na ton na nge mosi : « Yonasi, Kwenda na Nineve ! »
- E. **Tendula** Nineve vandaka inki mutindu :
 Ville ya nene
 Capitot ya Kimfumu ya Assyrie, ya yalaka bainsi mingi
 Mbeni ya Bayuda (Yonasi vandaka Muyuda)
 Bantu ya kwisaka na kunwanina Bayuda
 Fuluka na bantu ya mbi ya zolaka ve Nzambi
 Fuluka na bantu ya sambaka biteki ti bampeve ya mbi

3. Yonasi tina Nzambi Yonasi 1 :3

- A. **Tanga** na meso ya bana : Yonasi 1 :3 na malembe yonso.
- B. **Yula** : Inki mutindu Yonasi buyaka ndinga ya Nzambi ? (*Mvutu* : Yandi lemfukaka ve.)
- C. Bana sala **théâtre** ya mambu yai :
 Yonasi kangaka bima na yandi.
 Yandi kwendaka ntete na Yafa.
 (Bambuka nde Nzambi songaka yandi kukwenda na Nineve.)
 Na Yafe, yandi sumbaka tike.
 Yandi kotaka na masuwa.
 Yandi zolaka kwenda na Tarsisi. (Tarsisi keke ntama ti Yafa, na ndambu ya Espagne, mpe na direction ya nkaka. Yo keke bonso Nzambi songaka Yonasi kukwenda na droit, kansi yandi kwendaka na gauche.)
 Yonasi zolaka kutina Nzambi. (Bana sala bonso bo ke bumbana.)
- D. **Yimba** Nkunga : (Ton Yesu Azali Awa) « Yandi lemfukaka ve ! O Mawa ! »

4. Nzambi mona Yonasi Yonasi 1 :4

- A. **Tanga** na meso ya bana : Yonasi 1 :4 na malembe yonso.
- B. **Yula** : Inki vandaka mabanza ya Yonasi ? (Kudibumba sambu Nzambi kumona yandi ve.)
- C. **Théâtre** : Mwana sala bonso yandi keke Nzambi, ke mona Yonasi. Mpila ya kubumbana na meso ya Nzambi ikeke ve. Na nima, bana yonso sala bonso bo keke mupepe ya ngolo, mpe bonso bo keke na kati ya masuwa na ntembo ya nene.
- D. **Yimba** : (Ton Yesu Azali Awa) « Nzambi keke mona nge ! Ntangu yai ! »

YINDULA DIAKA

Lungisa baphrase yai :

Every Child Ministries (Ministères pour Chaque Enfant)
 Ecole du Dimanche Kulonga Bana par Maman Lorella Rosuter

www.teachingforafrica.com



Longi fweti yidika _____ ya lesu na ntwala ya kulonga.

Longi fweti bambuka _____ ya lesu sambu bana ya classe lenda bakisa yo nswalu.

Longi lenda tangila bana VE inki mukanda ? _____

Longi lenda tanga baverse mingi ya Bible mbala mosi na meso ya bana ? _____ Sambu na inki ? _____

Longi fweti longa inki mutindu ? na _____

Songa diaka mambu iya ya longi ta sala na konso ndambu ya lesu :

- 1.
- 2.
- 3.
- 4.

YINDULA MBOTE

Bisalu kapu 10 kele histoire ya Ntumwa Piere, ntangu yandi nataka nsamu ya Yesu na fami ya Korneye. Tanga kapu ya mvimba. Na nima, kabisa yo na bandambu ya kele kulanda action to mabanza ya histoire yina. Konso ndambu lenda vanda na baverse mosi, zole, to tatu. Na nima, sonika inki mutindu nge ta sala mambu iya (kutanga, kutendula to kuyula, théâtre, kuyimba) na konso ndambu. Mono me sala ndambu ya ntete bonso mbandu.

Tanga verses	Kutendula/ Kuyula	Théâtre	Kuyimba
1-2	Beto zaba inki sambu na muntu yai Korneye ?	Songa mpila Korneye sambaka Nzambi, ti mpila yandi sadisaka bansukami.	E-e-e ! Korneye sambaka Nzambi-e !

Kapu Kumi na Sambanu

Inki Ikele Mpila ya Mbote na Kusonga Devoir sambu na Bakristo ?

Devoir ikele mambu mosi ya bakristo lenda sala na mposo ke kwisa sambu bo yantika kulemfuka na malongi ya lesu. Yo ta kwenda nzila mosi ti kikuma ya lesu, kansi yo ta vanda specifique mingi.

Mbandu :

Kikuma ya lesu : Kubakisa nde Nzambi zola ve makambu ya luvunu, ebuna kubika konso mambu ya luvunu.

Devoir : Na mposo ke kwisa, kulomba pardo ya muntu ya nge me kusa.

Devoir ya nkaka: Kutuba kaka mambu ya kieleka na mposo ya mvimba ke kwisa.

Yo keke mfunu nde, na nima beto me pesa bana devoir, beto yula bana diaka mambu yina na nima ya mposo mosi, na kuzaba kana bo salaka yo. Na luyantiku, mbala ya nkaka bo ta vila mingi, kansi kana konso mposo longi keke kuyula bo kaka, ndambu ya bana ta yantika kumeka kusala devoir yina. Tuba kima ve kana bo vila kusala yo, kansi pesa bo kiese mingi kana bo meka kusala yo. Bana ya me meka kusala yo lenda pesa rapport ya nkufi inki mutindu bo salaka.

YINDULA DIAKA

Longi ya mpa keke kumona mpasi na kubakisa luswaswanu na kati ya devoir ti kikuma ya lesu. Inki mutindu nge ta tendula luswaswanu yai na yandi ?

YINDULA MBOTE

Tala Bisalu kapu 10 diaka, histoire ya Piere ti Korneye.

Kikuma ya lesu ta vanda yai : Na nsuka ya lesu yai, mono zola nde bana kuzaba nde bawanzio keke kuzola bantu ya bainsi yonso ti batribu yonso kiteso mosi. Ebuna bo ta yantika kusonga luzolo na bantu yonso.

Nge yidika devoir sambu na bakristo keke kusonga mpila mosi specifique ya bakristo lenda sala, ya ta sadisa bo sambu bo yantika kulemfuka na malongi yai na mposo ke kwisa. Devoir ya nge ta pesa ta vanda inki ? Tendula yo awa :

**Devoir= Bana sala mambu mosi specifique na mposo
na nima ya lesu, ya keke kusadisa bo sambu bo
kuyantika kulemfuka na malongi ya lesu na luzingu
na bo.**

Kapu Kumi na Nsambwadi

Inki Mpila ya Mbote na Kubinga Bantu na Yesu ?

Bambuka nde bana ya nkaka me yamba Yesu ntete ve na ntima na bo. Bo ikele bakristo ntete ve, ata bo me butuka na fami ya bakristo, to ata bo kele kukwisa na bisambu. Nzambi kele kusosa mambu mosi **NTETE, NTETE, NTETE** ya konso muntu. Mambu ya ntete ya Nzambi kele kusosa ya muntu kele kubalula ntima na Yandi, kuyamba Yesu Kristo na ntima.

Kana bana me yamba to me ndima Yesu ntete ve, na nsuka ya konso lesa, yo kele mfunu nde longi ya ecodim binga bo sambu bo kwisa tula ntima na Yesu. Mbala mingi beto kele kutuba nde kubinga yai kele Invitation.

Beto zola binga bana sambu bo ya kele na mfunu na kuyamba Yesu, bo ta kwisa, to bo ta bikala na nima ya ecodim, to bo ta kwenda kutana ti beto na sika beto me songa bo. Beto zola kutana mpe kusolula ti bo sambu beto lenda pesa bo malongi ya nkaka ya lenda sadisa bo, mpe sambu beto lenda samba sikamosi ti bo sambu bo kuyamba Yesu. Kubinga yina fweti songa bo wapi bo fweti kwenda, to inki bo fweti sala kana bo zola baka lusadisu ya nkaka. Yo lenda vanda simple ti nkufi, bonso yai :

« Mbala ya nkaka nge me yamba Yesu ntete ve na ntima na nge. Kana nge zola kuyamba Yandi bubuyai, nge lenda bikala na nima ya ecodim. Kwisa vanda na kiti yai (songa inki kiti). Mono ta kwisa kusadisa nge. »

« Kwisa na Yesu ! »

Kana lesa me songa ve inki mutindu muntu lenda kuguluka, yo kele mbote na kuyika ndambu ya malongi ti verse ya kele kusonga malongi yina, bonso yai :

« Mbala ya nkaka nge me zaba Yesu ntete ve na luzingu na nge. Yesu zola nge. Yandi zola gulusa nge. Yandi me sila, 'Konso muntu yina ta kwisa na mono, mono ta buya yandi ve' (Yoane 6 :37b). Kana nge zola kutula Yesu ntima bubuyai, na nima ya ecodim nge lenda kwisa vanda awa (songa kisika). Mono ta kwisa kusadisa nge. »

Kubinga yai kele kaka sambu na bo ya me yamba Yesu ntete ve na luzingu na bo. Kana bo me bakisa mbote, konso mwana ta ndima kubinga yina kaka mbala mosi mpamba.

Kana longi me zaba mbote-mbote nde konso mwana na classe na yandi kele mukristo, yandi lenda bika kubinga yai.

- Kansi, kana bo yonso me kuma bakristo, mbote kusosa kuyika bantu ya mpa, sambu Yesu zola konso muntu na bwala kuguluka.
- Kansi ata nge sala ve invitatio, vanda ya kuyilama konso mposo kusala yo. Nge zaba ve inki ntangu Yesu ta benda muvidi na kukwisa kutala classe na nge.

NB : Kana ecodim kele kusalama na nganda, to kana kisika kele mingi ve na kati ya nzo-Nzambi, nge lenda songa sika ya madidi na nganda, sika ya bana lenda kwenda kana bo zola yamba Yesu. Mbandu :

« Bana, kana nge me yamba Yesu ntete ve, kansi kaka bubu nge zola yamba Yandi, na nima malongi na beto me mana, nge ta kwenda na nsi ya madidi yina (songa wapi yo kele na diboko na nge). Kinga mono kuna. Mono ta kwisa solula ti nge. »

Na kuzaba inki malongi longi ta pesa na bana ya ndima kubinga yai, tala kapu makumi zole na mosi.

YINDULA MBOTE

Songa devoir ya mbote sambu na konso kikuma ya lesa :

Kikuma : Na nsuka ya lesa yai, bana ta zaba nde Nzambi zola beto kumisa Yandi, ebuna bo ta yantika kumisa Yandi na luzingu na bo.

Devoir :

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



.....
Kikuma : Na nsuka ya lesu yai, bana ta zaba nde Mpeve ya Nzambi kele kuluta ngolo ti bampeve ya mbi, ebuna bo ta yantika kubuya kosalu ya bampeve ya mbi.

Devoir :

.....
Kikuma : Na nsuka ya lesu yai, bana ta zaba nde kimpala kele kunata mpasi, ebuna bo ta yantika kubuya mambu yonso ya kimpala.

Devoir :

.....
Kikuma : Na nsuka ya lesu yai, bana ta zaba nde dibundu kele kimvuka ya bakristo, ebuna bo ta vanda kwikama na kutana sikamosi ti bakristo ya nkaka na bisambu.

Devoir :

.....
 Kana nge me sala mbote, devoir sambu na konso kikuma ta vanda specifique kuluta kikuma. Yo ta vanda mambu mosi bana fweti sala kaka na mposo ke kwisa.

Kapu Kumi ya Nana

Inki Mpila Kuyidika Lukanu ya Leso?

Nge me longuka bampila mingi ya mpa ya kulonga. Kana nge zola sadila bampila yai na malongi na nge, nge fweti kuyidika lesu ti program ya ecodim mbote na ntuala nge yantika kulonga. Ata nge yika bampila ya nkaka ya kulonga, ata konso mpila ya nge longa, yo kele mfunu mingi kaka na kuyidika lukanu ya lesu ti ya program mbote.

Malongi ya muntu lenda luta ve mpila yandi me longuka lesu ti mpila yandi me yidika lukanu na yo. Kana longi me tanga lesu nswalu ti na zulu-zulu, yandi ta longa kaka kiteso mosi. Kansi, kana longi me tula ngolo na kubakisa lesu mbote-mbote, ti kana yandi me sonika lukanu ya mbote, malongi na yandi ta vanda mbote mpe. Kulonguka lesu ti kuyidika lukanu na yo kele bonso kutunga fondement ya nzo. Kana ya kele kukonda, mpila ta vanda ve sambu na lesu na kuvanda ngolo. Kutunga nzo ya ngolo ke lomba ntete fondement ya mbote. Kulonga lesu ya mbote ke lomba ntete kuyidika lukanu ya mbote sambu na lesu yina.

Kieleka, beto ke sosa konso ntangu nde Mpeve ya Nzambi twadisa beto. Mbala na mbala, na nima longi me yidika lukanu ya lesu, Mpeve ta tuba na ntima nde yandi fweti bika lukanu yina, ti sala mambu ya nkaka. Konso ntangu beto fweti kuwa ti beto fweti landa yina ya Mpeve ya Nzambi zola kusonga beto. Kansi, inki ke konda Mpeve ya Nzambi na kutwadisa beto kaka na ntangu ya beto ke yidika lukanu? Yandi lenda twadisa beto, kana beto lomba lusadisus na yandi na mambu yina.

Awa kele mpila mosi ya mbote na kuyidika lukanu ya lesu:

1. **YANTIKA** Yantika na ntangu ya mbote. Kulonguka lesu ke lomba ntangu. Nge zola ve kuvanda presse! Kana nge kinga kuyidika lukanu ya lesu na samedi kaka, Satana lenda bwila nge na mambu mingi, sambu na kukanga nge nzila ya kulonguka lesu

mbote. Ntangu ya mbote na kuyantika kele na kintete, kana nge fweti longa na lumingu. Ebuna, nge ta vanda na ntangu ya kulunga. Nge lenda sala kosalu mosi ya mbote.

2. **SAMBA** Yantika na lombilu, ti landa kaka na lombilu sambu na lesu yina ti sambu na bo yonso ya ta wa yo. Kana nge kele kulunguka lesu, nge mosi ntete kele na mfunu ya lusadisu ya Nzambi. Nge kele na mfunu nde Yandi yika nge mayele! Lomba Yandi mayele yina! Bana ya classe mpe kele na mfunu ya Mpeve ya Nzambi. Lomba nde Yandi ta kangula ntima na bo sambu bo lenda kuwa mbote. Lomba lusadisu ya Nzambi nde nge lenda longa na kikesa ti na mpila mosi ya mbote. Lomba Nzambi kubenda bana ya fweti kuwa malongi ya lesu yai.
3. **TANGA LESO NA BIBLE** Na lumbu ya ntete, tanga lesu ya mvimba na kati ya Bible. Kana nge kele kulanda mukanda ya baleso, tala kaka wapi lesu yai kele kumonika na kati ya Bible. Tanga ntete ve ntendula ya lesu na mukanda yina, kansi tanga ntete-ntete ndinga ya Nzambi.
4. **TANGA LESO MBALA MINGI NA BIBLE** Tanga lesu mbala mingi sambu na kulunguka yo mbote. Balongi mingi kele kutuba nde na kuzaba lesu mbote, bo fweti tanga yo mbala 6 to mbala 7. Ntangu nge kele kutanga yo, yindula bangiufula yai:
 - **NANI?** Nani bantu kele mfunu na lesu yai? (Yindula bantu, mpe Nzambi, Satana, bawanzio, bampeve) Inki mambu ya nkaka ya mfunu nge lenda zaba sambu na bantu yai? Tala bazina na bo na Diksonere ya Bible kana yo kele. Nani me luta nene na kati ya bantu yai ya nge me mona?
 - **WAPI?** Inki bisika nge kele kumona na kati ya lesu? Tala bisika yina na carte géographique kana yo kele. (Mambu yai kele mfunu sambu na bana ya 4eme ti na zulu, kansi yo kele mfunu ve sambu na bana ya fioti.) Inki mambu ya nkaka nge zaba sambu na bisika yina? Tala bazina yina na Diksonere ya Bible kana yo kele. Landa mouvement ya bantu na kati ya lesu yai.
 - **INKI NTANGU?** Mambu ya lesu yai lutaka na inki ntangu? Tala bandinga yonso ya ke tadila ntangu. Ntangu ikwa kele kuluta na kati ya lesu yai? Bamvula? Bilumbu? Ntangu ikwa?
 - **INKI MAMBU SALAMAKA?** Inki mambu lutaka na histoire yai? Inki lutaka ntete? Ya zole? Ya tatu?
 - **INKI MALONGI YA MFUNU BETO LENDA LONGUKA?** Yindula konso verse ya lesu. Inki malongi beto lenda mona? Yo kele kusonga beto inki malongi sambu na Nzambi?
 - **EBUNA?** Malongi ya lesu yai zola songa inki na luzingu na nge ti bana ya classe ya nge kele kulonga? Inki mutindu muntu lenda lemfuka na malongi yai? Keti nge lenda mona na kati ya lesu yai—
 - Nsiku ya nge fweti lemfuka?
 - Masumu ya nge fweti tina?
 - Mbandu ya mbote ya nge fweti landa?
 - Nsilulu ya nge lenda tula ntima?
 - Mbandu ya ke songa inki mutindu Nzambi na beto kele?

Yindula kaka baverse ya lesu ve, kansi yindula mpe verse ya bana fweti longuka na ntima na bo, verse ya bo fweti tuba na munoko. Yindula bangiufula yai yonso sambu na verse yina mpe.
5. **TANGA NA NDIINGA YA NKAKA** Kana nge zaba ndinga to langue ya zole, ti kana nge kele na Bible na ndinga yina, nge lenda tanga lesu ya mvimba ti verse ya kutuba na munoko, na ndinga yina. Ndinga français ti ndinga anglais kele mbote mingi na kutanga, kana nge me bakisa yo mbote, sambu bandinga yai kele rich. Kutanga lesu na ndinga ya nkaka lenda sadisa sambu nge bakisa yo kuluta mbote.
6. **TANGA NTENDULA YA LESO** Kana mukanda ya baleso ikele, nge lenda tanga lesu. Yai kele mabanza ya muntu ya nkaka ya me longuka lesu yai. Yo kele bonso commentaire. Mbala ya nkaka mabanza na yandi ta sadisa mpe nge.

7. **KIKUMA** Sola kikuma ya lesu. Sambu na kusala yo, basisa malongi yonso ya lesu yina. Na nima, sola na kati ya malongi yina yonso kaka ntu mosi ya dilongi ya lenda sadisa bana mingi ya nge kele kulonga. Kana mukanda ya baleso ikele, tala inki ntu ya dilongi bo me yindula bonso kikuma. Nge lenda sola to ndima yo bonso kikuma ya lesu, to nge lenda sola kikuma ya nkaka ya lenda sadisa bana na nge kuluta.
8. **INTRODUCTIO** Sola mpila ya kuyantika lesu ya ta simba mabanza ya bana. Kuyantika yina fweti kwelana mbote ti malongi ya lesu ya ta landa. Sonika kuyantika kaka na mpila ya nge ta tuba yo. Yidika mambu yonso ya ta vanda mfunu sambu na kusala kuyantika yina.
9. **LUKANU** Yidika lukanu ya malongi. Kabisa action to malongi na bandambu. Yindula mambu iya ya beno ta sala na konso ndambu: Kutanga Bible, Kuyula bana, Kusala théâtre, ti Kuyimba. Na konso ndambu ya lesu, yindula inki nge lenda yula bana, yindula inki mutindu bo lenda sala theatre, ti yindula inki bo lenda yimba. Sadila crayon na kukabisa bandambu na kati ya Bible na nge.
10. **VERSE YA MEMORISATIO** Sola verse ya bana ta tuba na munoko. Yo fweti vanda verse to kitini ya verse ya kwenda nzila mosi ti kikuma ya lesu. Tuba yo mbala mingi tii ntangu ya nge me longuka yo mbote.
11. **BANKUNGA** Sola bankunga ya kwenda nzila mosi ti kikuma ya lesu, ti bankunga ya nkaka, bonso ya bisambu, etc.
12. **DEVOIR** Yindula devoir ya nge ta pesa bakristo. Inki kele mambu mosi ya bo lenda sala na mposo ke kwisa sambu na kulemfuka na malongi ya lesu yai? Devoir ya nge me sola kele kukwenda nzila mosi ti kikuma ya lesu?
13. **KUBINGA** Yindula inki mpila nge zola kubinga bavidi na Yesu. Bambuka nde, kana lesu vandaka sambu na bakristo, nge fweti yika ndambu ya malongi ya ke songa inki mutindu muntu lenda guluka. Kana nge me songa ve mpila ya kuguluka na kati ya lesu, kubinga na nge ta vanda ndambu nda. Sonika kubinga na mpila ya nge ta tuba yo.
14. **PLANIFICATIO** Yindula ndonga ya program. Sonika konso mambu na ordre na yo. Yindula bima yonso ya ta vanda mfunu. Yidika bima yina yonso na ntwala. Yindula kana lusadisu ya bantu ya nkaka ta vanda mfunu. Kana lusadisu kele mfunu, solula ti bantu na ntwala sambu na kuzaba nde bantu me ndima kusadisa.
15. **BIMA YA KUSADILA** Tula bima yonso na ndonga, kaka na ordre ya nge zola sadila yo.
16. **ADAPTATIO NA NIVEAU** Yindula bamvula to niveau ya bana na classe na nge. Keti yonso kele kulunga sambu na bo? Kana bo kele bana ya fioti, tala nde lesu, verse, ti bankunga ikele nda ve to mpasi ve ya kulunguka.
17. **PRATIQUE** Sala pratique. Longa ndambu ya bana ya bampangi ya nge to bana ya nge mosi. Tuba verse na mpangi na nge sambu na kuzaba nde nge me zaba yo mbote.
18. **SIMPLIFICATIO** Tala diaka lukanu ya nge me sonika. Yo fweti songa mambu yonso sambu nge lenda bambuka yo, kansi yo fweti vanda nda mingi ve, sambu nge ta zola ve na kutanga yo. Nge ta zola kaka na kutala lukanu ya nswalu. Yo fweti vanda mpasi ve na kulanda yo. Yo fweti luta nene ya Bible na nge ve. Tula yo na kati ya Bible na nge.
19. **SAMBA** Nge me sala ngolo sambu na kulunguka lesu mbote, mpe sambu na kuyidika lukanu ya mbote. Kansi Mpeve ya Nzambi fweti bula lesu na ntima ya bantu sambu luzingu na bo soba. Tula lesu na diboko ya Nzambi ti sosa ngolo na Yandi sambu na kulonga yo.

YINDULA DIAKA

Kana muntu fweti longa na lumingu ya mbasi, ntangu ya mbote na kuyantika kulunguka lesu ikele:

.....
Ntete longi fweti tanga lesu ya mvimba na kati ya:

.....
Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



Longi fweti tanga lesa mbote bonso mbala ikwa sambu na kulonguka yo?

.....
 Longi lenda yula inki ntangu yandi kele kulonguka lesa? _____? _____? _____?

_____? _____? ti _____?

Na zulu ya Bible, songa mikanda zole ya nkaka ya lenda sadisa kulonguka lesa.

1. _____ 2. _____

Lukanu ya lesa fweti songa mambu yonso, kansi yo fweti vanda _____ ve.

Longi lenda sala pratique wapi? _____

YINDULA MBOTE

Yantika kuyidika lesa mosi ya nge zola longa. Nge lenda yidika lesa ya nge zola longa na mposo ke kwisa. Kana yo kele ve, baka Luka 4:5-8 bonso lesa. Longuka yo mbote ti yidika lukanu na yo. Sonika lukanu na nge na papier ya nkaka.

Kapu Kumi na Uvwa

Inki mpila ya mbote na Kubambuka Diaka Baleso ya Ntama?

Kuvutukila baleso ya ntama kele mfunu mingi. Malongi kele kusimba mbote na nima ya bantu me wa yo mbala mingi. Kubambuka diaka baleso ya ntama ti baverse ya ntama lenda sadisa bana sambu bo simba malongi yina mbote-mbote. Kieleka, yo kele mfunu mingi.

Kansi, mpasi kele nde, kana beto tuba diaka bahistoire ya ntama ti baverse ya ntama, ntangu ta lunga diaka ve sambu na kulonga lesa ya mpa. Ntangu ke konda beto na kuvutukila mingi.

Mpasi ya nkaka kele nde, kana beto kuvutukila kaka na mpila ya beto longaka malongi ntete, bana ta zola mingi ve kukwisa na ecodim, sambu bo ta baka ngindu nde bo me wa malongi yina yonso dezia. Bo ta yindula nde beto kele na malongi ya mpa ve na kupesa bo.

Kuvutukila ke lomba nde, 1. Yo baka ntangu mingi ve, 2. Beto sala yo bonso nsaka sambu bana lemba ve.

Kuvutukila kele ve kaka kubambuka lesa ya mposo me luta. Beto fweti bambuka malongi mingi ya kimvuka ya mvimba ya baleso. Nsaka ya kuvutukila lenda lomba kiteso ya 3 minutes konso mposo. Kana kimvuka ya baleso kele kulanda ngindu mosi to luzingu ya muntu mosi to mukanda mosi ya Bible, longi ta yantika konso lesa na kusonga nswalu ti na zulu-zulu, malongi ya lesa me luta. Kansi nsaka ya kuvutukila lenda salama mpe. Nsaka yina ta bambukisa bana malongi ya baleso mingi.

MBANDU YA BANSAKA:

- **MONO KELE NANI?** Nsaka sambu na bana ya lenda tanga. Yo kele mbote sambu na baleso ya me katuka na mukanda mosi na kati ya Bible. Nge kele na mfunu ya papier ti crayola, to tableau ti mpembe, ti kiti mosi. Mwana mosi fweti vanda na zulu ya kiti. Sonika na papier to na tableau zina ya muntu mosi ya beno me longuka, kansi pesa yandi mpila ve na kumona zina yina. Kaka bana ya nkaka ya classe lenda mona yo. Yandi fweti yula bangiufula mingi ya bantu lenda vutula “e” to “ve”. Mbandu: Kana tableau kele kutuba Maria, mwana ya kele na zulu ya kiti lenda yula, “Keti mono kele bakala?” Bana ya classe ta vutula, “ve”. Ebuna, yandi ta zaba nde yandi kele nkento. Yandi lenda yula diaka, “Keti

mono butaka Mfumu Yesu Kristo?” Bana ya classe fweti vutula, “e”. Ebuna muntu yina lenda tuba nde, “Mono kele Maria.” Yandi ta tuba zina ya muntu kaka na nima ya yandi me zikisa yandi kele nani.

- **MONO KE SALA INKI?** Nsaka yai kele mbote ata bana lenda tanga to tanga ve. Yo kele mbote mingi na baleso ya ke landa mukanda ya Bible to luzingu ya muntu. Solula ti mwana na ntwala. Songa yandi mambu mosi ya nene ya salamaka, ya beno me longuka dezia. Songa yandi na kinsweki, sambu bana ya nkaka kuwa ve. Yandi lenda tuba kima ve. Yandi fweti kaka songa inki yandi kele kusala. Mbandu: Kana beno ke landa malongi ya mukanda ya Kubasika, nge lenda songa mwana nde, “Nge kele Farao, kele kubuya nde bana ya Israeli kubasika.” Mwana fweti songa mambu yai kaka na bageste, kansi na bandinga ve. Bana ya classe fweti songa inki mambu yandi kele kusonga bo na bageste yina.
- **NKUNGA** Nsaka yai kele mbote sambu na bana yonso. Yidika nkunga ya kele kusonga mabanza ya nene na kati ya kimvuka ya baleso. Yimba yo konso mposo ti yika ndambu konso mposo. Bageste to kukina ta benda mabanza ya bana ya kuluta.
- **XXOO** Nsaka yai kele competitio. Yo kele mbote sambu na bana ya me yela, mpe bana ya kele bonso niveau mosi. Yidika baligne bonso yai # na zulu ya tableau to papier, to sonika yo na ntoto na nganda. Kabisa bana na equip zole. Konso equipe lenda sola zina, bonso, “Bana ya Equateur,” to “Basolda ya Yesu”. Equipe mosi ta baka kidimbu X, ti equipe ya nkaka ta baka kidimbu O. Bo zola tula bidimbu tatu na ndonga, kansi equipe ya nkaka zola kanga bo nzila. Yidika bangifula na ntwala sambu na kuyula bana. Yo fweti vanda mambu ya bo me longuka dezia. Kana equipe vutula mvutu ya mbote, bo lenda tula kidimbu na bo. Equipe ya ntete ya kusunika kidimbu na bo na ndonga mbala tatu, bo bantu ta nunga.
- **KUBAMBUKA MUNTU** Nsaka yai kele mbote na bana ya me yela. Yo kele mbote sambu na baleso ya ke inda, luzingu ya muntu to mukanda ya Bible. Songa zina ya muntu ya bo me longuka. Kana foto ikele yo ta sadisa. Kana ve, muntu lenda lwata bilele bonso yandi kele muntu yina. Bana songa mambu yonso ya bo me zaba sambu na muntu yina.
- **KUBAMBUKA VOYAGE** Nsaka yai kele mbote na bana ya me yela. Yo kele mbote na konso kimvuka ya lesa ya bantu kele kutambula, kuvanda na bisika ya nkaka. Bana basika na nganda. Sadila nti sambu na kusunika bonso carte géographique ya nene na ntoto. Bana landa movement ya bantu na kati ya histoire.
- **KUSONGA MPANGI** Nsaka yai kele mbote na bana ya me yela, na konso lesa. Mwana mosi sala bonso yandi kele muntu na kati ya histoire ya bo me longuka. Songa bana kuyindula kana bo vandaka na mpila kutuba na muntu yina, bo zolaka kusonga yandi inki. Sola bana tanu kukwisa kusonga muntu ya Bible mambu mosi. Mbandu: Mwana kele Ananias, ya Nzambi fwaka sambu na luvunu na yandi (Bana lenda songa yandi nde, Nzambi zola luvunu ve! Ananias, sambu na inki nge tubaka luvunu? Luvunu na nge fwaka nkento na nge mpe! Kana nge tubaka ve luvunu, Nzambi zolaka ve kufwa nge. Ananias, nge lenda kusa Nzambi ve.
- **KUSALA GESTE** Nsaka yai kele mbote sambu na bana ya fioti ti bana ya me yela, na konso lesa. Tuba diaka mambu ya nene na baleso ya beno me longuka. Na konso phrase, songa geste ya kele kusonga mambu yina. Bana yonso landa bageste na kimvuka.
- **INKI LETTRE?** Nsaka yai kele mbote na bana ya lenda tanga mbote, na konso lesa. Sonika na tableau to na papier. Sonika baligne na kusonga bisono ya phrase mosi ya nkufi ya kele kutadila baleso ya beno me longuka. Mbandu, kana phrase kele, Nzambi pesaka bantu bansiku na Yandi, nge ta sonika _____

Bana fweti tuba bisono mosi-mosi, ti nge ta yika bisono tii ntangu ya bo lenda lungisa phrase yina.
- **INKI KIMA?** Nsaka yai kele mbote na bana ya me yela na konso lesa. Yindula bima ya kele mfunu na kati ya baleso ya beno me longuka. Mwana mosi zaba inki kima yina kele, kansi bana ya nkaka zaba yo ve. Mwana ke ya zaba yo fweti yantika kusonga inki mutindu yo kele, tii ntangu bana ya nkaka me zaba yo. Mbandu: Kana kima kele manna ya bana ya Israeli kudiaka na nseke, mwana lenda tuba nde, “Yo vandaka mpembe. Yo lalaka na zulu ya ntoto. Yo vandaka sukadi na munoko. Bantu monaka yo na suka.” Etc.

- **SONGA BETO.** Nsaka yai kele mbote na bana ya me yela na bisika ya tableau ikele. Mwana mosi ta dessiner na zulu ya tableau mambu mosi ya kele tadila lesa ya bo me longuka. Bana ya nkaka fweti songa yo kele inki.

Konso mposo, longi ta sola kaka mpila mosi na kati ya bansaka yai, ya kuvutukila baleso. Yo kele mfunu ve kuvutukila yonso mbala mosi. Kaka bambuka ndambu na malongi ya beno me longuka konso mposo. Kana bana zola nsaka mosi mingi, nge lenda sala yo kuluta, kansi ata bo zola nsaka yina, yo me luta mbote kubalula bansaka ya bana kele kusala konso mposo.

KUVUTUKILA BAVERSE YA BIBLE

Kuvutukila baverse ya Bible kele mfunu mpe. Beto zola kuvutukila verse ya Bible ya mposo me luta konso mposo. Beto zola tuba yo mbala zole diaka. Kana yo kele na nkunga, mpila yai me luta mbote sambu na kubambuka yo diaka.

Na nima ya bamposo zole, baverse ya bana me longuka kele kukota na kimvuka ya baverse ya ntama. Konso ntangu beno yantika kimvuka ya baleso ya mpa, beno fweti yantika mpe kimvuka ya baverse ya mpa. Konso mposo longi ta sola verse mosi sambu na kubambuka na nsaka.

Bansaka ya kubambuka baverse ya ntama:

- **TENNIS** Longi ta kanga maboko na yandi, ti bana zole ta bula yo bonso na tennis. Konso ntangu bo tuba ndinga mosi, bo lenda bula yo mbala mosi. Nsaka yai kele mbote na baequipe. Kana mwana mosi na equipe zaba ve ndinga ya verse yina, mwana na nima na vandi ta meka yo.
- **LONGI YA KELE KUVILA** Longi ta yantika kutuba verse, kansi na kati-kati, yandi ta sala bonso yandi ta sala bonso yandi me vila yo. Bana fweti “sadisa” yandi, kubambukisa yandi bandinga ya yandi lenda bambuka ve.
- **TELEMA** Songa verse ya ntama. Mwana ya ntete fweti telema ti songa ndinga ya ntete na yo. Mwana ya zole landa na ndinga ya zole, etc. tii nsuka ya verse.
- **INKI ADRESSE?** Na nima bana me longuka baverse ndambu mingi (5 to kuluta), sonika adresse ya konso verse na zulu ya tableau. Mwana mosi ta yantika kutanga verse mosi (na ndonga ve). Bana ta meka kusonga nswalu adresse ya verse ya yandi kele kutuba. Landa na verse ya nkaka tii ntangu bo me manisa yonso.
- **PROGRAM** Bana zola mingi kusonga bantu ya nkaka inki bo me longuka. Bo ta sala ngolo kana dibundu yidika program ya kele kusonga baverse ya bo me longuka. Na kati ya program, bana tuba verse mosi na kimvuka ti bageste, bo yimba verse mosi, bana zole tuba baverse, ti bo sala nsaka mosi ya baverse.

YINDULA DIAKA

Kuvutukila lesa ke lomba mambu zole: 1. _____

2. _____

Mpila ya kuluta mbote na kuvutukila verse ya Bible ikele: _____

YINDULA MBOTE

Na kati ya bansaka ya lesa ya beto me tuba, inki nsaka nge zola meka ntete? _____

Inki nsaka ya verse nge zola meka?

Meka kuyindula nsaka ya nkaka. Tendula yo awa:

.....
 Kwenda kumeka bansaka yai na malongi na nge. Sonika awa inki mutindu bana yambaka bansaka yina:

Nsaka: Inki mutindu?

Nsaka: Inki mutindu?

Nsaka: Inki mutindu?

.....

KITINI YA IYA KUTWADISA BANA NA YESU

Kapu Makumi Zole Kuguluka Ikele Inki?

Kana beto tuba nde muntu me guluka, beto zola tuba inki? Kuguluka ikele inki?

Beto lenda sadila bandinga mingi sambu na kutendula yo. Bandinga yai yonso ke kwenda nzila mosi kaka. Yo keke kusonga mambu mosi kaka, kansi yo keke kusosa bandinga mingi kutendula yo, sambu yo keke mambu mosi ya nene ya muntu me zenga na luzingu na yandi.

Beto lenda tuba nde muntu:

- me balula ntima
- me pindula mabanza
- me tula ntima na Yesu
- me ndima Yesu
- me yamba Yesu Kristo
- me kwikila Yesu
- me sola Yesu
- me zenga sambu na Yesu
- me kota na kimvuka ti Yesu
- me kwisa na Yesu
- me butuka ya mpa
- me butuka ya Mpeve
- me kuma mukristo, etc.
- me baka Yesu bonso Mvulusi ti Mfumu na yandi

Bana ya me yamba Yesu ntete ve ikele na mfunu ya kubakisa mambu zole:

A. BO KELE NA MFUNU YA YESU KRISTO, SAMBU—

1. Bantu yonso ikele bankwa-masumu. Beto me sala masumu, ti ntima na beto ke pusa beto na kusala yo.
Roma 3:10-12, 3:23
2. Nzambi keke na beto *mambu* sambu na masumu yina. Beto keke coupable na ntwala na Yandi. Nzambi me zenga ndola ya lufwa sambu na beto. Roma 6:23a, Yesaya 64:6
3. Mambu yonso ya mbote ya beto lenda sala, yo lunga gulusa beto ve ata fioti. Ata bisambu ya beto lenda samba, yo lunga gulusa beto ve. Bingana 22:27, Galatia 2:16, Efeso 2:8-9

Every Child Ministries (Ministères pour Chaque Enfant)
 Ecole du Dimanche Kulonga Bana par Maman Lorella Rosuter

www.teachingforafrica.com



B. BO KELE NA MFUNU NA KUBAKISA INKI MUTINDU BO LENDA GULUKA

1. Nzambi zola beto mingi, yo yina Yandi pesaka Yesu Kristo, Mwana-Nzambi, sambu na kubaka ndola yonso ya Nzambi zolaka kupesa beto. Yesu Kristo fwaka na kisika na beto. Roma 5:8, 6:9.
2. Muntu fweti bika mabanza yonso ya ke songa yandi nde yandi ta guluka na mpila ya nkaka, ye yandi fweti tula kivuvu yonso kaka na Yesu Kristo mpamba. Kana yandi tula Yesu ntima mpila yina, Yesu ta gulusa yandi. Bingana 3:5, 14:12, 16:31, Roma 5:1,9.
3. Kana kieleka muntu me guluka, Yesu ta soba ntima na yandi. Ndambu-ndambu, luzingu na yandi ta yantika kusoba. Yandi lenda sala masumu, kansi yo ta pesa yandi kiese diaka mingi ve bonso yo vandaka ntete. Kana muntu me pindula mabanza na yandi, yandi me kuma mukristo. Yandi kele muntu ya mpa, kansi yandi kele ngolo ntete ve. Yandi kele ntete kaka mwana ya fioti na kimfumu ya Nzambi. 2 Korinto 5:17, Efeso 2:1.

EBUNA, MBOTIKA KELE WAPI NA LUKANU YAI?

Mbotika kele kidimbu kele songa nde muntu me kuma mukristo. Yo kele ve mbotika ya kele kupesa moyo, kansi yo kele mpila muntu me zenga na ntima na yandi ya kele kupesa moyo. Kansi mbotika kele mfunu mingi, bonso kidimbu ya ntete ya kele kusonga bantu nde muntu yai me zenga kulanda Yesu Kristo. Mbote konso mukristo lemfuka na Yesu nswalu na mambu yai ya mbotika. Matayo 28:19, Bisalu 2:41, 8:36-38.

EBUNA, KUGULUKA KELE INKI?

Na nkufi yonso, beto lenda tuba nde kuguluka kele kutuba nde muntu me bakisa nde yandi vandaka ya kulunga ve na ntuala ya Nzambi, ti yandi vandaka na mpila ve kusala ata mambu mosi ya lenda sadisa. Yandi me bakisa nde Yesu fwaka ye Yandi telemaka sambu na kufuta lufutu ya masumu na yandi. Ebuna yandi me tula ntima kaka na Yesu Kristo. Ntangu yina, Yesu me yamba yandi na dikanda ya Nzambi, ye Yesu me pesa ntima ya mpa ya kele kuzola ye kusosa makambu ya kimpeve. Mambu ya yandi vandaka na yo ti Nzambi me mana. Nzambi me ndima yandi.

Kuguluka kele mambu ya ntima ya muntu. Mbala mingi, beto benda bana na kusamba sambu na kuyamba Yesu. Kansi, kutuba bandinga ya bisambu ikele ve yina ya lenda gulusa bo. Bo fweti tula ntima na Yesu na ntima na bo. Bisambu na kuyamba Yesu kele kaka mpila ya bo lenda zenga mbote-mbote na ntima nde kieleka, bo kele tula ntima na Yesu na lumbu yina.

Kuguluka kele tula muntu mukristo, ata NA NTWALA ya mbotika. Yo yina, yo kele kieleka ve na kutuba nde muntu me kuma mukristo na lumbu ya yandi me baka mbotika. Yo kele kuluta mbote kutuba nde, “Benno kumaka bakristo na ntangu ya benno tulaka ntima na Yesu Kristo ntete. Bubuyai benno me songa na meso ya beto yonso mpila ya benno me zenga na kulanda Yesu.”

BAKRISTO LENDA SALA MASUMU?

Keti bakristo mpe kele kusala masumu? Ata bantu ya kele bakristo ya kieleka lenda kubwa na masumu mbala na mbala. Bible kele kutuba nde, “kana beto tuba nde, beto kele na masumu ve, beto kele kudikusa” (1 Yoane 1:8. Yo yina, yo kele mbote ve kusonga bana nde, “Kana nge tuba luvunu (to sala konso mambu ya nkaka ya mbi), nge kele mukristo ve.” Yo kele kuluta mbote kutuba nde, “Kana nge kele mukristo, Nzambi zola nge kubika makambu yonso ya mbi.”

KANA MUKRISTO KE LANDA KAKA KUSALA MASUMU?

Kana muntu me yamba Yesu, luzingu na yandi fweti yantika kusoba, sambu yandi me kuma muntu mosi ya mpa. Kansi, mbala mingi Yesu kele na kusoba mambu ya mbi mosi-mosi. Ata nge mona nde muntu yina kele kulanda kusala masumu, mbala ya nkaka Yesu me songa yandi dezia mambu ya fweti soba na luzingu na yandi. Mbandu: Nge mona nde yandi kele kutuba luvunu, ebuna nge banza nde yandi kele mukristo ya kieleka ve. Kansi yandi vandaka kusala kindoki ti kuvwenza zina ya Nzambi. Dezia Yesu me manisa

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



makambu yina na luzingu na yandi! Bambuka nde muntu ya me yamba Yesu kele kaka mwana ya fioti na kimfumu ya Nzambi. Bangonda to bamvula ikwa beto sansa bana na beto na ntuala bo yela? Ndambu-ndambu bo baka ngolo. Kiteso mosi, ndambu-ndambu mwana ya mpa na kimfumu ya Nzambi kele kubaka ngolo. Beto kanga ntima, tula yandi na lombilu ti sadisa yandi na malongi ya mbote!

MALONGI YAI KELE KUTADILA ECODIM INKI MUTINDU?

Kana beto zola kubinga bavidi na ecodim, beto fweti bakisa mbote-mbote beto kele kubinga *nani*. Beto fweti bakisa mbote-mbote beto kele kubinga bo *na inki*. Beto fweti bakisa mbote-mbote inki malongi beto lenda pesa na kubinga yina, ti inki malongi beto lenda pesa na bo ya ndima kubinga yina.

YINDULA MBOTE

Na kati ya bandinga yonso ya lenda tendula kuguluka, sonika baphrase tatu ya lenda sadisa bana na classe na nge mingi:

.....
 Kuwa mbote-mbote mpila bampangi ya nkaka kele kubinga bavidi na Yesu. Keti malongi yonso ya bo ke tuba kele mambu ya kieleka? Inki nge me mona?

YINDULA DIAKA

Inki verse kele kusonga beto nde mukristo kele muntu ya mpa?

.....
 Inki verse kele kusonga beto nde bakristo lenda kubwa na masumu?

.....
 Bana ya me yamba Yesu ntete ve kele na mfunu na kuzaba inki mambu zole?

.....
 Keti mpila ikele nde Nzambi lenda ndima bantu ya sala mbote-mbote? Inki verse kele kusonga yo?

.....
 Keti beto lenda songa bana ya me baka mbotika nde, “Bubuyai beno me kuma bana ya Nzambi?” Sambu na inki?

.....
 Awa kele malongi ya bantu me longa. Ya nkaka kele kieleka, ya nkaka ke kwenda nzila mosi ve ti malongi ya Bible. Tula cercle na E to Ve na konso dilongi.

Yesu ta gulusa nge bubuyai kana nge tula Yandi ntima. E Ve

Bantu ya me botama ikele bo ya kele bakristo ya kieleka. E Ve

Bika mbi yonso, ebuna Yesu ta ndima nge. E Ve

Mbotika kele kubutuka ya zole na masa ti na kimpeve. E Ve

Kana nge kele kuyiba, nge kele mukristo ve. E Ve

Every Child Ministries (Ministères pour Chaque Enfant)
 Ecole du Dimanche Kulonga Bana par Maman Lorella Rosuter

www.teachingforafrica.com



Bakristo kele kusala masumu ve.	E	Ve
Nzambi zola beto kusala masumu ve.	E	Ve
Luzingu ya mukristo fweti soba.	E	Ve

Kapu Makumi Zole na Mosi

Inki Kele Mpila ya Mbote Kutwadisa Bana na Yesu?

Beto me solula konso kitini ya lesu. Kitini ya nsuka vandaka kubinga bantu ya me yamba Yesu ntete ve, sambu bo tula Yandi ntima. Na kubinga yina, longi songaka bo kukwenda na kisika mosi, kana bo zolaka kuwa malongi ya nkaka ya lenda sadisa bo na mambu yai. Kana longi me binga bavidi mutindu yina, program kibeni ya ecodim me suka. Kansi, kana bana me ndima kubinga yina, kana bo me kwenda na kisika ya longi me songa, kisalu na yandi me mana ntete ve. Longi fweti twadisa bo na Yesu na nima ya ecodim. Kutwadisa bantu na Yesu kele mambu ya beto ta longuka na kapu yai.

BO YA KELE KUBALULA NTIMA VE BUBU:

Kana beto zola twadisa bana na Yesu, yo sadisa mingi kana balongi lenda vanda zole. Ata nsadisi lenda sadisa mingi. Longi ya ntete ta twadisa bana na Yesu, ebuna longi ya zole to nsadisi ta vanda ti bana ya nkaka. Mbala ya nkaka bana mingi na kimvuka yina vandaka bakristo ntama. Yai kele ntangu ya longi lenda tula bo na lombilu, to bo na bo lenda lombilana sambu na bampasi ya luzingu na bo. Kisalu ya muntu yai beto me tendula mbote-mbote na kapu 23. Kana yandi kele kusamba sikamosi na bo, yo sadisa longi ya nkaka ya kele kutwadisa bana na Yesu. Bana ya nkaka ta kwenda ve kuyangisa bo. Bana ya nkaka ta kota ve na kati ya bo ya kele kuyamba Yesu, ebuna yo ta vanda ve mpasi na kuzaba nani me yamba Yesu ya kieleka.

Benda bana ndambu ntama ti nzo-Nzambi.

BO YA ZOLA KUBALULA NTIMA NA YESU BUBU:

Longi ya ntete ta kwenda na kisika ya yandi songaka bana kukwenda sambu na kuyamba Yesu. Yandi ta sala mambu yai:

1. Yandi ta pesa bana yonso ya me kwisa malongi ya bacarte ya kutwadisa.

Bacarte ya kutwadisa ikele na bandambu yai: malongi, ntendula ya foto, baverse ya Bible, ti bangiufula. Longi ta landa malongi yina yonso. Yandi ta yika malongi ya nkaka ve na zulu ya malongi ya bacarte. Bangiufula ta sadisa yandi na kuzaba kana bana me bakisa malongi ya bacarte.

Carte ya nsuka kele mutindu ya nkaka. Yo kele ve malongi, kansi yo kele lombilu bonso muntu lenda samba kana yandi zola yamba Yesu na ntima na yandi. Na ntwala na kusamba, longi ta solula ti bana sambu na kuzikisa muntu na muntu kana bo me yamba Yesu ntete.

2. Yandi ta zikisa nani me yamba Yesu ntete. Yandi lenda tuba mutindu yai:

“Na kati na beno, ya nkaka me yamba Yesu ntama. Ya nkaka me yamba Yandi ntete ve, kansi bo zola kuyamba Yandi kaka bubu. Mono ke na mfunu na kuzaba kana nge me yamba Yesu ntama, to kana nge zola yamba Yandi kaka bubu. Nge ta vutula nde, ‘ntama’ to ‘kaka bubu’.”

Yula bana mosi-mosi. Na nima, kabisa bo na bandambu zole. Bana ya me yamba Yandi ntama lenda vutuka na bana ya nkaka. Longi kuna ta sadisa bo na lombilu. Bo kele ve baconverti to bakristo ya mpa ya bubu, sambu bo me yamba Yesu ntama.

Bana ya zola yamba Yesu kaka bubu, bo lenda bikala. Longi ta landa program yai:

- Yula bo kana bo ke na kestio sambu na mambu ya malongi ya bacarte. Kana ngiufula kele, pesa mvutu, kansi tala mbote nde yo kele kutadila kaka malongi ya bacarte. Mambu yonso ya nkaka beno lenda solula na nima.
- Yula bo kana bo zola samba sambu na kuyamba Yesu. Landa lombilu ya carte ya nsuka bonso mbandu ya lombilu ya mbote. Kana bana kele mingi ve, bo lenda samba mosi-mosi, kansi tala mbote nde bisambu kele bonso ngindu ya kele na carte.
- Yula bo:

NGE me sala inki sambu na YESU sesepiyai?
YESU me sala inki sambu na NGE sesepiyai?
- Pesa bo verse ya assurance, bonso Yoane 1:12, Yoane 3:15, to Baebreo 13:5.
- Sonika bazina na bo ti mambu yonso ya lenda sadisa nge kumona bo diaka.
- Kana bo kele bamambre ya dibundu na nge, songa bo nde mbote bo sonika zina na kulanda malongi ya balandi. Mbala ya nkaka yo ta vanda mfunu na kusolula ti fami na mambu yina.

BANA ME BALULA NTIMA, ME KOTA NA DIKANDA YA NZAMBI. YANGALALA!

**KUTWADISA BANA
NA YESU
KRISTO!**

YINDULA DIAKA:

Sambu na inki yo kele mfunu nde balongi kuvanda zole?

.....
Bana ya ke balula ntima ve bubu, bo ta sala inki na nima ya ecodim?

.....
Kana longi zola twadisa bana na Yesu, mambu ya ntete ya yandi ta sala kele:

.....
Carte ya nsuka kele mutindu ya nkaka. Yo kele kusonga inki?

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



.....
 Kana longi me manisa malongi ya bacarte, yandi ta yula inki sambu na kuzaba kana bana me yamba Yesu dezia? Sonika bandinga bonso nge ta tuba na bana:

.....
 Kana mwana zola ndima Yesu bubu, yandi lenda _____ sambu na kuyamba Yesu.

Na nima mwana me yamba Yesu, longi lenda yula yandi inki?

- 1)
- 2)

Sambu na inki longi ta sonika zina ti adresse ya bana ya balula ntima?

.....

KITINI YA TANU KUSIAMISA BAKWIKIDI

Kapu Makumi Zole na Zole

Inki Kele Mpila ya Mbote Kusiamisa Bakwikidi ya Mpa?

Kana muntu ndima Yesu Kristo, yandi me kuma mukristo, kansi ksalu na kilongi me kaka yantika. Yo yina nge me sonika bazina ya bantu ya me balula ntima, ti wapi nge lenda mona bo diaka. Bakwikidi yai kele kaka bebe na kikristo na bo. Bo kele na mfunu ya malongi mingi, lusadisu mingi, kukanga ntima mingi sambu bo yela, sambu bo kuma bakristo ya ngolo. Kana mwana me butuka bonso bebe na fami na beto, yandi ta yela malembe-malembe. Kukuma mbuta ta lomba bamvula mingi. Beto ta banza ve nde na nima ya bilumbu to bamposo to bangonda, bebe ta baka ngolo bonso mbuta. Kana yo kele mpidina na mambu ya kimuntu, sambu na inki beto banza nde yo kele mutindu ya nkaka na mambu ya kimpeve?

Mbote kulanda konso mwana ya balula ntima na nzo na yandi. Kana nge solula ti yandi ti na fami na yandi, nge ta bakisa kuluta inki mutindu kusadisa yandi. Yo ta songa fami luzolo ya mbote. Mbala mingi yo ta vanda luyantiku ya kinduku ya ngolo ti bo.

INKI MUTINDU KUSOLULA NA MWANA TI FAMI NA NZO NA BO

Kwenda kusolula ti bo kaka na mposo na nima mwana me balula ntima, kana mpila ikele. Bambuka nde Yesu tubaka nde Satana kele kuziunga muntu kana yandi me wa nsangu ya mbote. Satana zola kudia nkeni ya nsangu yina bonso ndeke, na mpila nde muntu yina kuma ve mukristo ya ngolo (Matayo 13:4, 19). Pesa yandi ntangu ve na kukatula nkeni ya lukwikilu ya me yantika kumena! Kwenda kutala fami nswalu na nima mwana me balula ntima.

Nge zola kuvanda nduku ya fami yina. Kinduku yina ta benda bo yonso na Yesu Kristo, to, kana bo kele bakristo, yo ta siamisa lukwikilu na bo. Kwenda ve kunwana to kusonga bo mbi ya bo to bifu ya dibundu na bo, kana bo kele kulanda dibundu ya nkaka. Lomba Nzambi kutula kinduku na kati ya nge ti bo.

1. Songa bo kiese ya nge monaka na kumona mwana na bo na ecodim. Meka kutuba mambu ya mbote sambu na mwana yina. Yandi kele mayele? Kikesa? Kulanda malongi mbote? Luse ya kiese? Songa bibuti mambu yina.
2. Songa mwana nde nge kele na kiese mingi nde yandi ke zola kulanda Yesu Kristo.

Pesa yandi verse ya assurance, ya ke songa yandi nde kieleka, yandi me guluka. Sola verse mosi na kati ya baverse yai: Baebreo 13:5b, Yoane 3:15, Yoane 1:12. Bambukisa mwana mpila yandi me tula ntima na Yesu, ye yula yandi inki Yesu kele kusila yandi. Mbote yo basika na munoko na yandi nde Yesu me sila yandi moyo ya mvula na mvula. Nge lenda sonika certificat to kitemwe na Bible na yandi, kele kusonga lumbu ti sika ya yandi tulaka ntima na Yesu Kristo. KOTA VE MAKAMBU YA DIBUNDU TO MBOTIKA, na mbala yai ya ntete.

3. Yula bibuti kana nge lenda lomba lusakumunu ya Nzambi na zulu ya fami na bo. Tula fami na lombilu nde Nzambi sakumuna bo na mambu yonso. Nge lenda samba nde bo zaba Yesu Kristo mbote-mbote, kansi samba ve makambu ya dibundu to konso mambu ya lenda katula kinduku.
4. Kana nge zaba yo ve, yula fami mambu ya lenda sadisa nge kulanda mwana yai diaka. Bo kele bamambre to balandi ya inki dibundu? Mwana yai kele ya inki bwala? Mbala mingi nge mosi ta zaba mambu yai, kansi kana nge zaba yo ve, nge fweti yula. Kana bo tuba nde bo kele bamambre ya dibundu ya ke pesa nge kiese ve, kunwana ve ti bo! Tuba kaka nde, “Nzambi sakumuna beno.”

KULANDA BO NA NIMA YA VISITE YA NTETE

Na kati ya bantu ya balula ntima na malongi ya ecodim, kele bantu ya mutindu iya. Ntete kele bana ya bafami ya kele bamambre to balandi ya dibundu ya nge. Ya zole kele bana ya bafami ya kele ve kusamba. Bo kele bamambre ya dibundu ve, ata dibundu ya nge, ata dibundu ya nkaka. Ya tatu kele bana ya kele kuzinga na babwala ya nkaka. Bo kwisaka na ecodim ntangu bo vandaka kutala bampangi, kansi na nima, bo fweti vutuka na bwala na bo. Ya iya kele bana ya kele bamambre ya dibundu ya nkaka to religio ya nkaka ya kele kulanda ndinga ya Nzambi ve. Bisambu na bo me kwelana ve ti mpila ya Bible kele kutuba. Bantu yai yonso lenda yamba visite ya ntete, kansi na nima na yo, nge ta landa bo na mutindu ya nkaka.

Bana ya bafami ya kele bamambre to balandi ya dibundu ya nge

Bana yai kele mpasi ve ya kulanda, sambu fami na bo ta pesa bo kikesa. Nge lenda:

- A. Sosa mpila nde fami kusonika zina ya mwana bonso mulandi, sambu yandi kota malongi ya mbotika.
- B. Sosa ntangu kulonga yandi malongi ya kuyela (tala nsuka na kapu yai). Kana bana ya nkaka me balula ntima, nge lenda sosa ntangu ya bo lenda vukanu, sambu nge pesa bo yonso malongi mbala mosi. Kana kaka mwana mosi me balula ntima, nge lenda kwisa na nzo na yandi ti pesa malongi ya ta sadisa yandi kuyela na meso ya fami. Yo ta sadisa mpe bo. Malongi yai lenda lomba kiteso ya bilumbu tatu na kumanisa yo kana fami kele mambre ya dibundu.
- C. Ata fami kele bakristo, yindula mbote kana delivrance (kukatula bampeve ya mbi) kele mufunu. Kana bo to bibuti na bo me sala kindoki, me lwata bafetishi, me landa bisambu ya pesaka Nzambi lukumu ve, me sala bizumba, to me finga Nzambi, bampeve ya mbi ta vanda kukangama na bo. Nge lenda yula fami kana bo mona nde bampeve kele kuyangisa bo, to nge mosi lenda sosa kumona na kimpeve kana yai kele makambu na nzo na bo. Kana yo kele, nata mukristo ya nkaka ya kele ngolo na kimpeve sambu na kusadisa nge.

1. BANA YA BAFAMI YA KELE VE KUSAMBA (BO KELE KAKA MPIDINA—BAMAMBRE YA ATA DIBUNDU MOSI VE)

Bana yai kele mpasi mingi ve ya kulanda, kansi mbala mingi bafami yai me kangama na makambu ya kindoki ti bampeve. Nge lenda sala mambu yonso kaka bonso fami vandaka bakristo ye beno, kansi tala mbote-mbote makambu ya kindoki. Mbala ya nkaka yo ta lomba malongi mingi na mambu yai, ti fami ta vanda nswalu ve na kubika makambu yina. Mambu beto fweti songa bo kele nde Yesu me nunga Satana ti bampeve yonso, ye Yandi me pesa beto bakristo kiyeka na zulu na bo.

2. BANA YA KELE KUZINGA NA BABWALA YA NKAKA

Longi ya ecodim lenda sala mambu zole ya lenda sadisa bana yai. Ntete, yandi lenda sadila ntangu ya mwana kele na bwala na yandi sambu na kupesa yandi malongi yonso ya kele possible. Kana mwana yai kota classe ya balandi, yo fweti vanda na bwala na yandi, kansi yandi lenda mona mfunu na yo ntangu yandi kele na bwala na nge. Yandi lenda sila to zenga kukota classe yina. Mambu ya

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



zole ya nge lenda sala keke kusionikila dibundu na bwala na yandi, kusonga bo mpila mwana yina me yamba Yesu, ye kulomba bo na kulanda yandi diaka.

3. BANA YA KELE BAMAMBRE YA DIBUNDU TO RELIGIO YA KELE KULANDA BIBLE VE

Kuluta mpasi na kati ya bana yonso ya balula ntima keke bo ya keke bamambre ya dibundu ya nkaka to religio ya nkaka ya keke kulanda nzila ya Nzambi ve. Beto keke kutuba ve nde bo keke bamambre ya dibundu ya nkaka ya keke landa Bible. Ata bo samba ve kaka bonso beto, kana bo keke kulanda Bible, kana bo keke kutula ntima na Yesu, kana bo keke kupesa Yandi lukumu, bo mpe keke bampangi bakristo. Beto lenda pesa bazina ya baconverti na dibundu na bo sambu bo landa bo na mambu ya mbotika.

Kansi keke mabundu ya nkaka ya keke kulanda ve malongi ya Bible, kansi fami me kangama dezia na dibundu yina. Awa beto fweti sala na mayele yonso. Beto fweti landa bo malembe, malembe.

Mbala mingi, beto zola kukatula bantu yai na bisambu na beto sambu bo ke landa ve dibundu na beto kimakulu. Kana bo zola ve kulanda malongi na beto kimakulu, beto zola ve kusadisa bo. Yai keke kifu ya nene ya beto keke kusala. Nzambi muntu me nata bana na bo sambu bo kuwa malongi na beto. Beto fweti sosa kusadisa bo na kinduku, ye kulonga bo malembe malembe. Beto fweti tula bo na lombilu mingi ye kanga ntima mingi sambu na bo.

Na nsuka, yo keke *konso fami ya ta zenga* kana bo ta ndima nde bana na bo lenda baka mbotika na mpila ya Bible keke kutuba. Bafami ya nkaka ta ndima, kana mwana yandi mosi me zola. Bafami ya nkaka ta zola ve, kansi malongi ya mwana me baka na kileki, yo ta buta kaka kana yandi me yela. Bafami ya nkaka ta zola ve tii na nsuka. Nzambi me pesa konso fami kiyeka ya kuzenga lukwikilu na bo.

Beto lenda tula bo na bisambu nde bo ta mona nzila ya kieleka, kansi beto lenda benda bo ve na kingolo-ngolo. Dibundu lenda pesa ve mbotika na bana kana fami na bo keke kuzola ve. Kansi mbala mingi, bo me yantika kukangama na malongi na beto SAMBU NZAMBI ZOLA KUBENDA BO! Kansi beto keke bantu ya keke kupusa bo na nganda, kutuba nde bo lenda samba ve na beto. Beto keke bantu ya keke kunwana na bo bonso bo vandaka bambeni na beto. Makambu yai keke kusadisa ve kimfumu ya Nzambi. Beto vanda banduku, beto benda bo malembe, beto kula bo ve na bisambu to na malongi, beto tula bo na lombilu, beto bika bo kuzenga makambu yai na ngemba na bafami na bo.

Yo ta sadisa ve kukwenda na fami bonso yai kusosa kusionika zina ya mwana na bo bonso mulandi ya mbotika. Kansi beto lenda pesa bo malongi ya kuyela na nzo na bo, kana bo ndima. Mbote kupesa yo malembe—dilonji mosi to malongi zole kaka konso mposo. Malongi ya mbotika keke na kati ya malongi yina. Ntangu nge kwisa na yo, mbala ya nkaka, yo ta benda masolula ya lenda sadisa mabanza na bo. Kana yo kota mbote ve ntangu yina, landa diaka malongi ya nkaka. Mbala ya nkaka mabanza yina ta yela ti nge lenda solula yo na ntangu ya nkaka.

MALONGI SAMBU NA BAKWIKIDI YA MPA NA CLASSE YA ECODIM

Bonso beto monaka na kapu ya zole, konso longi fweti zaba kana bakwikidi ya mpa keke na kati ya classe ya yandi keke kulonga. Kana bo keke mingi, yandi ta tula ngolo na malongi ya lenda sadisa bo.

BACLUB LENDA SADISA

Baclub keke groupe ya keke kuvukana na lumbu ya nkaka (lumingu ve). Mbala mingi bo keke kuvukana na sika ya nkaka (*nzo-Nzambi ve). Yo lenda benda bana ya bwala ya keke na mpila ve kukwisa na lumingu, ye yo lenda sadisa bakwikidi ya mpa, sambu yo pesa ntangu ya nkaka ya bo lenda kuwa ndinga ya Nzambi. Club lenda sala mambu ya nkaka bonso sport to kutunga bilele to kuyimba ti kukina. Na nima, longi ta longa lesa ya Bible bonso ecodim.

MALONGI YA KUYELA

Yai keke malongi nge lenda pesa bana sambu bo yela na nima bo me balula ntima. Ntangu ya nkaka nge lenda pesa yo mwa-nswalu, ntangu ya nkaka malembe-malembe. Malongi yai ta sadisa bo sambu bo kuma ngolo na kikristo na bo.

KUYINDULA DIAKA

Lungisa baphrase yai:

Mbote kulanda konso mwana ya me balula ntima na _____ na yandi kaka na mposo na nima yandi me yamba Yesu.

Kana longi kwenda na nzo ya mwana ya me yamba Yesu, yandi lenda pesa fami yina _____, pesa mwana verse ya-
_____ ya kele kusonga yandi nde kieleka yandi me _____, ye samba sambu
Nzambi _____ fami yina.

Kana fami ya mwana kele mambre ya dibundu ya nge, to ata dibundu ve, nge ta kwenda diaka mbala ya zole na nzo sambu na
kusolula ti bo makambu ya mbotika. Nge kele kusosa nde bo sonika _____ ya mwana sambu yandi kota
_____ ya mbotika.

Kana mwana fweti vutuka na bwala ya nkaka, nge lenda _____ dibundu na yandi sambu bo _____
yandi diaka.

Kana fami ya mwana kele mambre ya dibundu ya kele kulanda ve ndinga ya Nzambi, nge ta sosa kinduku ti bo, nge ta
_____ bo malembe-malembe, ye nge ta tula bo na _____ mingi.

Mpila mosi dibundu lenda longa bana mingi ya lenda kwisa ve na bisambu kele kuvanda na _____. Na kubenda
bana, bo lenda _____, _____, to _____. Na nima, bo lenda longa
bana ndinga ya Nzambi.

Kapu Makumi Zole na Tatu

Inki Kele Mpila ya Mbote Kusadisa na Bampasi to Bamambu?

Bana ti bafami na bo kele na bampasi mingi na luzingu na bo, bamambu mingi ya kele kulomba lusadisu ya Nzambi. Ata bo vanda
bakristo, bampasi ti bamambu lenda konda ve. Beto zola tula bo na lombilu, ti songa bo mpila ya bo lenda lombilana bo na bo.

KULOMBILANA NA NIMA YA ECODIM

Na program ya ecodim, beto ta vanda na ntangu ya kulombilana. Kansi ntangu ta lunga
ve na kusamba bisambu yonso ya kele mfunu. Bambuka nde, na nima ya ecodim, kana
bana bikala sambu na kuyamba Yesu, nde bana ya nkaka lenda basika. Bo lenda kwenda
na longi na bo na sika ya nkaka. (Tala diaka kapu makumi zole na mosi.) Longi yina
lenda sadila ntangu yina na kusambila bana na bampasi na bo, ti na kulonga bo na
kulombilana. Ata longi kele kusamba yandi mosi sambu na mwana, bo ya nkaka ya kele
penepene, lenda tula yandi diboko sambu na kusonga nde bo mpe kele kundima lombilu
yina. Bana ya kele ngolo ve na nitu lenda kuma penepene ye longi lenda tula bo maboko.
Bana bo mosi lenda tula bo na lombilu na bimvuka na bo ya fioti. To, bo ya kele na
mfunu ya madia na nzo, bo lenda fukama, ye bana ya nkaka lenda kwisa pene-pene, tula
bo maboko, ye sambila bo Nzambi na mambu ya kudia.

KUKULA BAMPEVE YA MBI YA KELE NA BANA

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



Mbala mingi bana ta vanda na ecodim ya kele kuzaba dezia nde bo kele ndoki. Bana ya nkaka kele kumona mpasi na bandosi na mutindu na mutindu. Mambu yai kele kisalu ya bampeve ya mbi. Na mambu ya kukula bampeve, yo kele mfunu na kuzaba nde muntu ya kele kusambila bana Nzambi kele mukristo ya kieleka ti ya ngolo. Bana lenda sadisa na delivrance ya bampangi (kukula bampeve ya mbi), kansi kaka kana bo kele bakristo ya kieleka ti ya ngolo. Yo lenda nata mpasi mingi kana muntu meka kukula bampeve ya mbi kansi yandi mosi kele ve kulanda Yesu Kristo (Bisalu 19:13-16).

Mbote longi yandi mosi yantika na delivrance ya bampani ya kele na bampeve ya mbi. Na nima, yandi lenda lomba Nzambi na kusonga yandi mwana mosi ya kele mukristo ya ngolo ya lenda sadisa na delivrance. Mosi-mosi, malembe, malembe, Mpeve lenda songa banani lenda sadisa na kukula bampeve ya mbi. Longi kele muntu ya kele twadisa, kansi yandi lenda songa bana ya nkaka na kusadisa.

Konso mukristo kele na kiyeka ya kukula bampeve ya mbi na kiyeka ti na ngolo ya Yesu Kristo (Luka 10:17-20). Yo ke lomba kaka kusonga mpeve yina na kubasika kukwenda ntama na zina ya Yesu Kristo. Mbala mingi, bampeve ta basika na mpila mosi ya pima. Muntu ta zaba mbote-mbote kaka na nima, sambu bampeve yina ta yangisa yandi diaka ve mutindu bo vandaka kusala ntete. Ntangu ya nkaka, yo ta lomba lombilu mingi, kulanda kaka kusamba Nzambi ti kusonga bo kukwenda na zina ya Yesu. Bampeve lenda losa muntu na ntoto to sala makelele, kansi mambu yai kele kupesa Nzambi lukumu ve. Mbala mingi bo ta bika mambu yina kana mukristo songa bo kuvanda nie. Nge fweti tuba ve na ndinga ya ngolo kana nge zola kula mpeve ya mbi. Nge lenda kaka tuba na yandi na ndinga bonso nge ta tuba na muntu ya kele penepene. Yo kele ve ndinga ya ngolo to luse ya makasi ya kele kula bo, kele kaka zina ya ngolo ya Yesu Kristo, na munoko ya muntu ya kele kulanda Yandi.

LOMBILU NA BANZO YA BANA

Ntangu ya nkaka ya nge lenda tula bana na lombilu kele na banzo na bo. Kana dibundu me ndima nge bonso longi ya ecodim, bo me tula nge bonso pasteur sambu na bana yina. Kipasteur ya nge kele na nsi ya kiyeka ya pasteur responsable ya dibundu. Nge kele bonso nsadisi na yandi ti ya dibundu sambu na bana. Longi kele na kiyeka na kutambula na banzo ya bana, kutula bo ti bafami na bo na lombilu to na delivrance (kukula bampeve ya mbi). Yo kele mfunu konso ntangu na kulomba nzila na ntwala ya kusamba to na ntwala ya kukula mpeve ya mbi. Kana tata ikele, yandi muntu lenda pesa nzila. Kana yandi kele ve, mama lenda pesa nzila. Kana bo kele bakristo, fami lenda tula maboko na bo na munti ya nge kele kulombila Nzambi. Yai kele mpila ya bo ke songa nde bo kele kundima lombilu ya nge kele kusamba.

KUYINDULA DIAKA

Inki ntangu beto lenda tula bana na lombilu sambu na bampasi na bo? (Na meso ya bo mosi)

- 1.
- 2.
- 3.
- 4.

Kana longi kele kusambila mwana mosi Nzambi, bana ya nkaka lenda sala inki sambu na kusonga nde bo kele kundima bisambu yina?

.....
Nani kele na kiyeka ya kukula mpeve ya mbi?

.....
Inki mutindu mukristo fweti tuba na mpeve ya mbi sambu yo basika na muntu?

.....
Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



Inki mutindu mpeve keke basika na muntu?

KITINI YA SAMBANU KUYIDIKA MALONGI NA NIVEAU YA BANTU

Kapu Makumi Zole na Iya

Inki Kele Mpila ya Mbote Kuyidika Malongi na Niveau ya Bantu?

Kana ecodim me yela, mbote kutula konso mwana na classe ya me fwana na bamvula ti na niveau na yandi. Na kapu yai, beto zola kulanda mwana na mpila yandi keke kuyela, yantika mwana ya fioti tii na bambuta. Beto zola kumona inki mutindu beto lenda longa bantu ya konso niveau na mpila ya mbote.

BANA YA KELE MAYELE VE

Kana mwana keke mayele ve, yandi lenda monika bonso mwana ya mvula na nsi, ata yandi me yela. Mbala mingi, yo sadisa kutula bana yai na classe na nsi. Kuna bo lenda bakisa kuluta mbote. Kana dibundu keke na ville, mbala ya nkaka bana bonso yai lenda vanda mingi. Matondo mingi kana dibundu mona longi ya lenda kanga ntima mingi na kulonga bo. Mpidina bo lenda vanda na classe na bo mosi. Binga classe yai zina ya keke kupesa kiese: Bandeke ya Nzambi, Mwindi, Bana ya Kiese, etc.

BANA YA BWALA

Bana ya bwala lenda vanda mayele to mayele ve. Mambu ikeke na bo nde bo ke zaba ve kutanga sambu bo keke na mpila ve kukota nzo-nkanda. Dibundu fweti yindula muntu na muntu, na kuzaba inki classe lenda sadisa yandi. Mbala mingi classe ya keke na niveau ya nsi ndambu lenda sadisa bo. Kana dibundu me yela, bo lenda yantika classe ya alphabetisatio sambu na bana yai, na mpila nde bo longuka kutanga. To, dibundu lenda tula bo na classe ya Bible ya bo mosi. Longi ta sadila théâtre mingi, ti yandi ta sadila ve bampila ya kulonga ya ke lomba bo kutanga.

Bana ya Fiote ya Me Kota Ntete Ve Ecole Primaire:

LUBUTUKU TII NA BAMVULA ZOLE

1. INKI MPILA BO KELE KUYELA NA NITU?

Bo keke kusadila nitu na bo mingi. Bo keke kutula konso kima na munoko na bo, ti bo fweti simba konso kima bo mona. Bo lenda vanda ve pima.

2. INKI MPILA BO KELE KUYELA NA MABANZA?

Bo keke kuzaba bandinga mingi, ata bo tuba mingi ve. Ba “cellul” YONSO ya butomfu ti nerves me former na ntwala yandi me lungisa bangonda 6. Na moyo ya mvimba, yandi ta yika ata cellul mosi diaka ve. Kudia mbote keke mfunu mingi ntangu yai.

3. INKI MPILA BO KELE KUYELA NA KIMPANGI TI KINDUKU?

Bo zaba kaka bo mosi ti fami na bo.

4. INKI MPILA BO KELE KUYELA NA KIMPEVE?

Meka ve kulonga yandi na baphrase ya nda. Tuba baphrase ya nkufi. Mbandu: Nzambi zola nge.

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



Mono zola nge. Yesu kele mbote, etc. Sadila bankunga ya kele mpasi ve, ya kele na bandinga mingi ve.

Bafami kele kulonga bana yai na nzo. Bo ke kwisaka ntete ve na ecodim. Yo kele mfunu mingi kaka kusimba bo na luzolo, ti tuba na bo na ton ya ke songa luzolo.

Bamvula Zole Tii Ntangu Bana Kota na Ecole Primaire: (JARDIN DES ENFANTS/ GARDERIE)

1. INKI MPILA BO KELE KUYELA NA KITU?

Bo kele yela nswalu. Yo yina, bo ke na MFUNU ya kusala mouvement mingi na nitu, ata na ntangu ya malongi. Sambu bo ke sala mingi, bo lemba nswalu. Bo kele na mfunu ya ntangu ya pima ya bo lenda baka repo.

Yo yina, sosa mpila ya bo lenda sala mouvement kaka na kati ya malongi. Mbandu: Bo yonso lenda sala bageste to théâtre na kimvuka, ya ke songa mambu ya nge kele kulonga bo. Mwangwa bankunga ti kukina na kati ya malongi ya Bible: ndambu malongi, nkunga; ndambu malongi, nkunga. Kansi, na nima ya kiteso ya 20 minutes, vanda na ntangu ya pima. Mabala ya nkaka, nkunga ya pima lenda sadisa bo.

2. INKI MPILA BO KELE KUYELA NA MABANZA?

Bo lenda kuwa malongi (pesa atasio) kaka ntangu fioti—kiteso ya 2 minutes. Yo yina, sonika lukanu ya mambu mingi ya bo lenda sala. Sala konso kitini kaka ntangu fioti. Na nima, sala mambu ya nkaka. Baleso na bo fweti vanda nkufi. Baverse fweti vanda nkufi mpe—kiteso ya bandinga tanu to sambanu, kansi yo lenda kuma na kumi to na kumi na zole kana nge longa verse na nkunga ya kele na rythme ya mbote.

Bo kele na MFUNU ya kusakana. Yo kele kaka mpila ya Nzambi Yandi mosi me sala bo. Yo yina, sosa mpila ya kulonga ya me fwanana na kusakana. Mbandu: Kusala bageste bonso bo kele muntu ya nge kele kusolula na lesu. Bana lenda sadila misapi na bo kusonga inki kele kusalama na histoire ya nge ke longa. Kana nge kele kulonga verse, bo lenda bula maboko to makulu na konso syllab.

Bo longuka mingi ve yina ya bo ke wa kaka, kansi bo longuka mingi yina ya bo kele kusala. Yo yina, sadila théâtre ti bageste mingi. Pesa bo bima ya bo lenda simba. Mbandu: Bo lenda kuwa nsudi ya bintuntu ya Nzambi me sala, bo lenda kunwa masa bonso Nzambi pesaka bantu ntangu bo vandaka na nzala na kati ya nseke. Bo lenda simba mabaya bonso mabaya ya bantu sadilaka kutunga kulunsi ya Yesu, etc.

Bo zola kuvutukila, ti bo kele na mfunu na yo sambu na kulonguka. Ebuna, longi lenda longa kaka lesu mosi to dibanza mosi bamposo zole to ata ngonda ya mvimba. Yo kele mbote kuvutukila baverse ti bankunga mpe. Yo ta lembisa bo ve. Ntangu longi kele kulonga, yandi lenda tuba baphrase ya kele mingi kiteso mosi. Bana zola mingi rythme na yo.

Mbandu: Yosefi tambulaka na lweka ya mpunda. Klop, klop, klop! Marie vandaka na zulu ya mpunda. Klop, klop, klop! Mwana Yesu vandaka na maboko na yandi. Klop, klop, klop! Bo yonso vandaka kutina na Ezipte. Klop, klop, klop! Yosefi tinaka. Mama Maria tinaka. Mwana Yesu na maboko na yandi tinaka. Mpunda ya vandaka kunata bo tinaka. Klop, klop, klop! Bo yonso vandaka kutina na Ezipte. Nzambi songaka bo kutina. Klop, klop, klop.

Bo bakisa ve bidimbu. Bo kwikila nde konso ndinga kele kaka yina ya longi me tuba. Yo yina, longa ve na bidimbu ata fioti. Mbandu: Longa ve, Yesu kele mwini, to bana yai ta banza nde Yesu kele mwini bonso kima sadila ke petrol. Longa bahistoire ya kele kusonga bo muntindu Yesu kele. Baverse ti bankunga mpe lenda tadila ve bidimbu.

Bo ke zaba ve kutanga. Yo yina, bacarte ya kusonika ta sadisa ve. Adresse ya verse (sika yo kele na Bible) kele mfunu mpe ve. Kaka tuba nde verse kele BANDINGA YA BIBLE.

3. INKI MPILA BANA YAI KELE KUYELA NA NTIMA?

Bo ke wa boma ya mambu mingi. Yo yina, katula bima ya ke pesa bo boma, kana mpila ikele. Tuba na bo na bandinga ti na ton ya ngemba, ya pima, ya makasi ve. Longi yandi mosi fweti songa boma ve. Kansi, pesa bo nsoni ve kana bo kele na boma. Kuseka bo ve na mambu yina.

Mambu ya bo ke wa na ntima kele kusoba nswalu. Yo yina, sosa mpila ya kusimba mabanza na bo na mambu ya nkaka. Landa boma to makasi na bo ve.

Bo ta sala yonso ya bo banza ta pesa longi kiese. Yo yina, yo kele mfunu nde nge benda bo ve ngolo na kundima Yesu. Kansi, kana bo mosi zola ndima Yesu, kubuya bo mpe ve.

4. INKI MPILA BANA YAI KELE KUYELA NA KIMPANGI TI NA KINDUKU?

Bo zaba ti bo sadila mingi ndinga yai MONO. Bo ke kaka yantika kubakisa nde bantu ya nkaka IKELE. Yo yina, kuluta mbote baleso tadila bantu ya nkaka ya kele penepene—fami ya Moise, mama ya Yesu ti Yosefi ya vandaka bonso tata na yandi na nzo, etc. Na ntangu ya bisambu, sambila Nzambi sambu na bantu ya kele na bainzo na bo, sambu yai kele mambu ya bo lenda bakisa.

5. INKI MPILA BANA YAI KELE KUYELA NA KIMPEVE?

Bo bakisa bantu ti bima ya kele kieleka—bantu to bima ya bo lenda mona ti simba. Yo yina, bo lenda bakisa ve nde Nzambi kele Mpeve, kansi bo lenda bakisa Yesu sambu Yandi kele Muntu.

Bo lenda bakisa mutindu Nzambi kele ti mutindu Yesu kele ntangu bo mona inki Nzambi (to Yesu) SALAKA ti TUBAKA. Yo yina, longa baleso mingi ya songa inki Nzambi salaka ti inki Yandi tubaka.

Bamvula yai kele ntangu ya preparatio. Bana mingi na kati ya bana yai ta balula ntima kaka na bamvula na nima. Kansi ndambu lenda balula ntima ata na bamvula yai, kuluta kana bibuti kele kulonga bo makambu ya Nzambi na nzo. Yo yina, beto fweti longa mbote-mbote Yesu kele nani, Bible kele inki, masumu kele inki, Yesu salaka inki sambu na beto. Beto ta benda bo ngolo ve na kubalula ntima na bo, kansi beto ta sadisa konso mwana ya zola kutula ntima na Yesu.

Bo ya kele kubakisa nsangu ya Yesu ntete ve, bo kele kubuya Yesu ntete ve. Tula bo na maboko ya Nzambi ti pusa bo ve kusala decisio sambu na yandi. Kaka longa bo na mpila mosi ya kwikama.

Bo kele kubanza nde MBOTE kele mambu yina nge to fami na bo kele kuzola, ti MBI kele yina ke natila bo ndola to mpasi. Longa bo nde yo kele Nzambi ya lenda songa beto kana mambu kele mbote to mbi.

Bo lenda bakisa nde Nzambi kele kuzola bo, kana bo me zaba luzolo ya fami. Yo yina, longa luzolo ya Nzambi mingi. Longa bo nde Nzambi zola beto, bantu ya mbi. Longa VE nde Nzambi TA zola bo kaka KANA bo kele mbote! Yai kele luvunu. Yo kele ve malongi ya Bible. Malongi ya Bible kele yai, nde Nzambi zola beto, bantu ya mbi. (Roma 5:8)

Bo kele na mfunu ve na kuzaba malongi mingi ya kele mpasi ya kubakisa. Yo yina, bika malongi ya ngolo-ngolo sambu na bamvula ke kwisa.

Bana ya le, 1e, 2e, 3e Ya Ecole Primaire (Novice ti Cadet)

1. INKI MPILA BANA YAI KELE KUYELA NA NITU?

Bo kele kulemba nswalu, sambu konso ntangu bo kele kaka kusala, kusala, kusala. Bo lemba, kansi bo zola ve kubaka repo. Yo yina, mbote lukanu ya program ya ecodim kuvanda na mambu mingi mutindu ya mutindu ya bo ta sala. Bo lenda sala mambu ya ke lomba mouvement, na nima bo sala mambu ya kele ndambu pima.

Bamisisa ya nene na bo ke kwenda kuyela nswalu, yo yina, bo ke na mfunu na KUSALA NA NITU NA BO. Yo yina, mbote bo kina konso ntangu kana bo yimba. Mbote kusala bageste mingi na malongi. Bo lenda sala bageste na kimvuka, to bana mingi lenda vanda na théâtre, konso mwana ti yina ya yandi kele kusala. Na nganda ya classe to na nima ya classe, sala bansaka ti bo.

Bamisisa ya fioti na bo ke kaka yantika na kukwenda kuyela. Yo yina, bo lenda yantika kusonika ndambu, kutula couleur kana yo kele, etc., kansi bo ta sala mbote mingi ve na mambu yai.

2. INKI MPILA BANA YAI KELE KUYELA NA MABANZA?

Bo lenda kuwa malongi (pesa atasio) ntangu kuluta bana ya fioti, kansi mingi-mingi ve. Malongi fweti luta ve minutes 7-10. Yo sadisa kana longi kabisa lukanu ya malongi na

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



bandambu zole, kiteso ya 4-5 minutes na konso ndambu. Mwanga bankunga ti kukina na kati ya malongi yina.

Bo kele na mfunu ya kuvutukila malongi, kansi bo kele ve na mfunu ya kutuba yo diaka ti diaka kaka kiteso mosi bonso bana ya fioti. Longi lenda longa leso ya mpa konso mposo, kansi sadila ndambu ntangu na kuvutukila baleso ya ntama (mona kapu 19). Vutukila verse ya ntama (tuba to yimba yo mbala 2), kansi longa verse ya mpa mpe (tuba to yimba yo mbala 6 to kuluta).

Bo kele kusala ngolo na mambu yonso ya bo sala, kansi bo zola ve ndinga yai KISALU. Tuba ve nde yina ya bo ke sala na ecodim kele kisalu. Kuluta mbote kutuba nde yo kele NSAKA. Bo FWETI sala yo ve, kansi BO LENDA.

Bo kele bakisa mambu ya kele SESEPIYAI ti mambu ya kele AWA kaka. Bo kele ngolo ve na kubakisa ntangu ya nkaka to bisika ya nkaka. Yo yina, yo ta vanda mfunu ve na kutula ngolo na makambu bonso badate ya histoire to geographie ya Bible. Yo kele mfunu mingi ve nde baleso landa kaka na ordre ya mambu yina salamaka. Devoir sambu na bakristo kele mfunu mingi sambu yo songa bo inki mutindu bo lenda lemfuka na malongi ya Bible kaka sesepiyai na luzingu na bo.

Bo zola zaba mambu mingi. Bo yula bangiufula mingi. Ebuna, kuvutula mvutu na banguifula na bo kele mpila mosi ya mbote ya kulonga.

Bo kele ngolo na mambu ya kubambuka. Ebuna, yo kele mfunu mingi nde longi tula ngolo na lungisa bansilulu yonso ya yandi me sila bo. Kana verse kele mpasi mingi ve, bo lenda longuka verse ya mvimba, ti adresse mpe. Mbote bana yai longuka baverse mingi ya kele kusonga nzila ya kuguluka.

Bo me bakisa bidimbu mingi ntete ve. Kuluta mbote nde malongi, baverse ti bankunga sadila ve bidimbu. Kana longi songa kima, yandi fweti tuba ve nde yo kele kima ya nkaka. Na nsiku yai, kusadila bidimbu ve, beto lenda katula kaka kima mosi: mukanda ya kele na bandinga ve. Bacouleur ya mukanda yai, bana mingi kele kubakisa yo, ata yo kele bonso bidimbu.

Kana bo ke longuka kutanga ti kusonika na nzo-nkanda, bo kele na kiese na yo. Longi lenda sadila bacarte ya kusonga verse to sonika yo na zulu ya tableau to na ntoto. Kansi, bambuka nde bana yai ke kaka yantika kutanga. Pesa bo kiese kana bo tuba ata ndinga mosi ndambu mbote. Yula nani zola kutanga. Kusonga mwana ve nde yandi FWETI tanga.

Kana bo zaba ve kutanga to kana bo ke mona mpasi na kulonguka kutanga na nzo-nkanda, bo lenda vanda na nsoni. Kuseka bo to kunganina bo ve na mambu yai, ti kupusa bo ve na kutanga.

Bo kele yantika kulonguka ntalu. Bo zola bansaka ya Bible ti baleso ya Bible ya kele kutadila bantalu. Bo zola kuwa baleso ke tadila mambu yonso “bantu zole” to “bantu ya maladi kumi.”

3. INKI MPILA BANA YAI KELE KUYELA NA NTIMA?

Bo kele na ngolo ve na kukanga ntima. Ebuna, longi fweti vanda muntu ya pima. Yandi lenda sala ve mambu ya yandi zaba ta pusa bo.

Bo ke wa makasi nswalu. Longi lenda landa yo ve, ebuna yo ta mana nswalu.

Bo kele na boma ya mambu mingi. Yo yina, baleso ya kele kusonga mpila ya Nzambi lundaka bantu na yandi lenda sadisa bo.

4. INKI MPILA BANA YAI KELE KUYELA NA KIMPANGI TI NA KINDUKU?

Bo ke yantika kubakisa bampasi ya bantu ya nkaka. Bo lenda wila bantu ya nkaka mawa. Kansi, kuluta mingi bo kele kuyindula mambu kaka ya bo mosi. Baleso ya mbote lenda sadisa bo kuyindula inki mutindu bo lenda sadisa bantu ya nkaka.

Bo kele kusosa kinduku ya bana ya nkaka. Mbala mingi, yo kele mbote kusosa kubenda groupe ya mvimba ya banduku sambu bo kwisa na ecodim. Longi lenda pesa encouragement mpe sambu na bana na kunata banduku na bo.

Babakala ti bankento lenda vanda banduku na mpila ya mbote. Bana yonso lenda vanda sikamosi na bamvula yai. Longi lenda vanda ata nkento, ata bakala, mambu ikele ve.

Bo kele luzitu mingi sambu na bantu ya kele na kiyeka. Bo ta landa bansiku ya ecodim kana bo me zaba yo. Discipline kele mpasi mingi ve.

5. INKI MPILA BANA YAI KELE KUYELA NA KIMPEVE?

Bo kele kusosa na kuzaba mingi mambu ya ke tadila lufwa. Baleso lenda tendula mambu ya zulu ti bilungi, ti inki mutindu muntu lenda guluka.

Bo kele kuzola kusala mbote. Bo lenda bakisa mbi to masumu kele inki. Yai kele ntangu ya bo lenda yantika kuzaba mutindu ya mukristo fweti zinga—inki yandi fweti sala, inki yandi lenda sala, ti inki yandi lenda sala ve. Sambu bo zola vanda mbote, bo lenda bakisa mpe nde bo me lunga ve na meso ya Nzambi. Bo kele kusala ve mambu ya mbote konso ntangu na mpila ya Nzambi ke zola. Bo me sala masumu.

Ata bo ke yantika kubakisa mbote ti mbi, mbala mingi bo lenda yindula nde mbi kele mambu ya bibuti na bo kele kubuya, ti mbote kele yina ya bo kele kundima. Bo kele na mfunu ya malongi ya lenda songa bo nde ndinga ya Nzambi kele yina ta songa bakristo kana mambu kele mbote to mbi.

Bo kele na lukwikilu ya ngolo. Bo kwikila nde Nzambi ta sadisa bo kana bo samba. Baleso lenda songa bo inki MUTINDU Nzambi zola beto kusamba, inki lenda KANGA nzila sambu Yandi kuwa ve bisambu na beto, inki beto lenda samba ya kele kupesa Yandi kiese, inki mutindu Nzambi lenda pesa mvutu na bisambu, etc.

Bo lenda bakisa nzila ya kuguluka kana nge longa bo mbote. Binga bo na kuyamba Yesu, kansi benda bo ve na kingolo-ngolo.

Bana ya 4e, 5e, 6e na Ecole Primaire (Cadet, Aine)

1. INKI MPILA BANA YAI KELE KUYELA NA NITU?

Bo kele makelele mingi. Bo zola tuba mingi bo na bo. Longi lenda sosa mpila ya bo lenda tuba na kati ya leso. Mbandu: Kutanga verse, Kupesa mvutu, Kusala théâtre, Kusolula malongi ya leso, Kuyimba, etc. Kansi tula nsiku nde bo fweti vanda pima kana longi to mwana ya nkaka kele kutuba. Bo fweti songa luzitu. Bo kele na mfunu ya baleso ya ke songa mpila ya bakristo lenda songa luzitu, ye baleso ya kele kusonga inki mutindu bakristo lenda sadila munoko na bo na mpila ya mbote.

Bo kele ngolo na nitu. Bo lenda tambula ntama na bachorale na bo to kusala kisalu ya ngolo sambu na kusadisa dibundu. Mbandu: Bilanga, mandala, kuzenga matiti, etc.

2. INKI MPILA BANA YAI KELE KUYELA NA MABANZA?

Bo lenda landa leso ya Bible mbote. Longi lenda longa ata 20 minutes.

Ya nkaka na kati na bo kele kuma batangi ya mbote. Yai kele ntangu ya mbote na kulonga mikanda ya Bible ti na kubenda bo kusumba Bible na bo mosi. Kana carte ya verse kele (to tableau to kusonika na ntoto), bana ya nkaka lenda tanga yo na meso ya bana yonso. Batangi ya mbote lenda tanga baverse ya Bible ya ke tadila leso.

Bo lenda longuka baverse nswalu. Bo lenda bambuka ata baverse mingi. Longi lenda pesa liste ya baverse sambu bo longuka yo na nzo (sonika verse ya mvimba kana bo kele na Bible ve). Baverse ya bo ke longuka ti leso lenda vanda mwa-nda. Kuvutukila baverse ya ntama kele mfunu mingi. Bo lenda tuba baverse sambu na bambuta ya dibundu na ntangu ya bisambu.

Bo kele kuzola na kulonguka mambu mingi. Yo kele mfunu nde longi

kuwa mbote inki bo kele kuyufula. Yo kele mfunu mpe nde yandi sosa bamvutu ya mbote.

Bo kele kuyantika na kubakisa ndambu mambu ya bidimbu, geographie, ntangu, histoire, etc. Longi lenda yantika kusadila bacarte geographique, to bacarte ya songa ntangu, kansi yandi fweti tendula mbote mbote inki yo kele kusonga ti inki mutindu yo ke songa yo.

3. INKI MPILA BANA YAI KELE KUYELA NA NTIMA?

Bo kele na boma ve, kansi bo ke na kikesa mingi. Bo zola mingi baleso ya ba-“hero”, to bantu ya Nzambi ya me songa kikesa. Bahistoire ya ba-Africain ya kikesa kele mbote mpe. Bana yai kele na boma diaka ve na kutuba sambu na Yesu. Bo lenda vanda bantemwe ya ngolo, ye bo lenda benda bampangi ti banduku mingi na kukwisa na ecodim.

4. INKI MPILA BANA YAI KELE KUYELA NA KIMPANGI TI NA KINDUKU?

Babakala kele kuzola bankento ve, ti bankento kele kuzola babakala ve. Kuluta mbote, kana mpila ikele, na kutula babakala na classe na bo ti longi ya bakala, ye kutula bankento na classe na bo ti longi ya kele nkento.

Bo zola vanda na kati ya groupe. Bo lenda benda banduku na bo na mpila mosi ya ngolo—ata na mpila ya mbote, ata na mpila ya mbi. Classe ya ecodim lenda vanda bonso club. Bana lenda sola zina, president, secretaire, etc.

Bo zola kutula ngolo na competitio. Longi lenda sadila bansaka mingi ya Bible.

5. INKI MPILA BANA YAI KELE KUYELA NA KIMPEVE?

Bo lenda balula ntima nswalu na Yesu Kristo. Kubinga bavidi lenda konda ve na baleso sambu na bana ya bamvula yai. Mingi na kati na bo ta tula ntima na Yesu kana bo kuwa malongi ya mbote ti kana ntangu ya mbote ikele na kusala yo. Mbala mingi balongi ya bana yai kele kulomba Nzambi nde, na ntuala bana kota na C.O., bo yonso zaba Yesu Kristo.

Bo lenda yela ngolo na kikristo na bo. Yai kele ntangu ya mbote na kusadisa bo na kuyilama na abitud ya kutanga Bible ti na kusamba konso lumbu.

Bajeune ya 1e, 2e, C.O. ti 3e Ecole Secondaire (Aine)

1. INKI MPILA BO KELE KUYELA NA NITU?

Nitu kele na kati-kati ya kuchanger, kana yo me salama ntete ve (puberte). Puberte kele changement ya ngolo, kansi ya mbote. Kansi bana lenda vanda na boma ntangu yo ke salama. Sambu na yo, bo ke yindula nitu mingi. Yo kele bonso bo zaba diaka ve nitu ya bo mosi. Konso lumbu yo kele kuchanger. Bo ke na boma kana inki mutindu nitu na bo ta kuma, kana bo ta vanda ndaa to nkufi, kitoko to kitoko ve. Sosa na kusolula na bo mosi-mosi, to na bagroupe ya fioti, na kupesa konseye.

Interet ti nsatu ya mpa sexuel benda baquestio, baproblem, boma. Bo sosa kuzaba ti kubakisa konso mambu ya fioti. Yo kele mfunu nde longi songa bo mambu ya kieleka na mpila ya Bible kele kundima. Mbote solula mambu yai ti bankento kaka bo mosi, ye babakala kaka bo mosi. Kana bo zaba nde nge ta solula yo na ntima ya madidi, bo lenda kwisa kusolula mambu yai ti longi.

Bamambu mingi ya ke monika bonso “emotionel” (mambu ya ntima) to “spirituel” (mambu ya kimpeve) kele na base physique (kele kieleka mambu ya nitu). Mbandu: probleme ya kulembwa mingi. Bo kele bumolo ve, kansi sambu nitu keyela nswalu, ebuna yo kele kulembisa bo. Mbandu: Mpila nkento kele makasi to mawa na ntwala yandi mona ngonda na yandi.

Malnutritio lenda vanda mambu. Bo kele kusala mingi, bo ke yela nswalu, mabanza to butomfu mpe ke developper, kansi mbala mingi bo ke na nsatu ve ya kudia bima ya mbote, to mbala ya nkaka bima kele mingi ve ya kudia. Malongi ya ke songa mfunu ya madia ya mbote kele mfunu.

2. INKI MPILA BO KELE KUYELA NA MABANZA?

Mabanza ke yela. Bo kele kuyindula mingi, ti bo ke bakisa kuluta mbote, kansi bo ke konda experience. Yai kele kunata bangiufula ti keti-keti mingi. Longi fweti kanga ntima na mpila bo kele kuyula-yula.

Bo ke yula baquestio ti ke songa ba-doute mingi ata sambu na mambu ya bo zabaka to ndimaka na kileki na bo. Yo kele bonso bo fweti longuka yonso diaka. Vanda makasi ve. Pesa bo nsoni ve. Kaka kanga ntima na mambu yai. Baka yo ve bonso masumu, kansi bonso ntangu ya Nzambi me pesa nge na kusiamisa lukwikilu na bo. Ndimaka konso mambu ya bo ta yula to konso doute. Encourager mabanza nde badoute benda beto ve na kulosa lukwikilu na beto, kansi na kusosa bamvutu ya kuluta mbote.

Bo zola tanga. Mwa-bibliotheque kele ngindu ya mbote kana mpila ikele. Longi lenda defisa bo mikanda ya kutanga.

Bo zola kwenda longuka mambu bo mosi. Mbote mpila ya kulonga vanda ti mambu mingi ya bo lenda sala bo mosi. Kaka kusonga bo ta simba mingi ve.

Kusolula lenda vanda mpila ya mbote ya kulonga. Yula bo bangiufula mingi. Yula bo inki bo ke mona na verse ya nge kele kusonga bo.

Bo mona nsoni na kuyula mambu mingi. Bo mona bonso bantu ta banza nde bo kele bazoba. Boit sambu na bakestio na bo lenda sadisa. Konso yina bo yula, tuba nde yo kele question ya mbote, nde nge banza bantu minti ya nkaka mpe zola zaba yo. Songa bantu ya nkaka ve mambu bo yula to solula ti nge. Sala liste ya mambu ya bo kele kuyula. Vanda na nsoni ve na kutuba nde, “Mambu yai mono ke zaba mingi ve, kansi mono ta sosa mvutu ya mbote.” Ebuna, yula bantu ya nkaka, to sosa mvutu na kati ya mikanda.

Bo lenda sala lukanu bo mosi ya mambu ya bo zola kusala. Comite ya classe kele mfunu. Bo lenda yidika lukanu na kimvuka na bo.

Bo ke longuka na essaie-erreur. (Bo fweti meka mambu mingi ti mona kana yo ta kwenda mbote to mbi.) Pesa bo nsoni ve kana bo meka kansi bo sala mbote mingi ve. Bo kele ba-investigateur. Groupes interactives (bimvuka ya bana ya ke sala sika mosi) kele mbote. Projets (mambu bo sala) kele mbote. Recherche ya kele ngolo ve ti devoirs ya kele bonso nsaka kele mbote.

Bo zola kubuya mambu ya kileki, kansi bo lenda ve sala to yindula bonso bambuta. Yo kele mfunu nde bo vanda na classe na bo mosi. Tuba na bo bonso bo kele bantu, kansi pesa bo kizitu ve bonso bambuta.

Bo ke bakisa mbote ve inki mutindu bo lenda kulonguka mbote na nzo-nkanda. Sadisa bo na mambu yai.

4. INKI MPILA BO KELE KUYELA NA NTIMA?

Ntima na bo kele kisakasaka mingi sambu na changement na hormones.

- 1) Bo ke yilama na bahormones yina ntete ve.
- 2) Nitu kele irregulier na mpila yo ke sala hormones. Yo ke lomba nde longi kanga ntima ti lombila bo Nzambi mingi.

Emotions na bo kele na extremes—kiese mingi ou mawa mingi, kansi mbala kuluta mingi bo kele na mawa, kaka sambu na changement ya hormones. Longi lenda ndima yo bonso kaka mpila Nzambi me yidika sambu na muntu na kuyela. Yandi lenda songa bo kaka nde yandi kele kuzola bo, ata bo vanda kiese to mawa.

Bo ke sosa kuzaba, Mono ikele nani? Bo ke sosa kumonika to kuzabana bonso muntu unique to special. Yo kele mfunu mingi kuzaba bo ti kusolula ti bo mosi-mosi. Longi lenda sonikila bo mikanda ya fioti, pesa bo kikesa.

Bo ke sosa kuzaba, “Keti bantu (to nge longi) kele kuzola mona?” Bo ke na mfunu ya kuzaba ti kuwa nde bantu kele kundima bo. Pesa bo mbote na zina kana nge mona bo, ti solula ndambu ti bo.

Bo ke mona nsoni sambu na developpement ya nitu. Nsiku ya ngolo fweti vanda na classe: beto seka bantu ve.

5. INKI MPILA BO KELE KUYELA NA KINDUKU TI NA KIMPANGI?

Bo ke na mfunu na kuzabana bo na bo. Kusolula kele mfunu na kati ya classe.

Bo zola vanda mbote na meso ya banduku na bo. Longi lenda pesa bo nsoni ve na meso ya banduku.

Ba-activite social kele mfunu mingi. Bo zola bansaka—ata ya Bible, ata ya kinduku.

Bo mona mpasi na kusolula ti Papa to na Mama. Yo kele mfunu nde bibuti kunganina bo ve, bo vanda ngolo na kuwa. Bibuti fweti songa bo mingi ve inki bo fweti sala, kansi yula baquestio bonso, “Keti nge me yindula mambu yai?” Longi lenda vanda nduku ya bo lenda tula ntima.

Repons circulaire kele mbote sambu na kuyantika classe—

“Mbote kana baparent ta...”(muntu na muntu lungisa phrase yina).

“Mambu mosi ya mpasi sambu na mono kele...”

“Mono ke na kiese mingi ntangu...”

“Hero na mono kele...sambu...”

“Mono zola yo ve kana...”

Mbala mingi, bo kele kubuya kiyeka ya bantu ya nkaka na zulu na bo. Bo zola kulonguka ti kuzenga makambu, bo mosi. Longi lenda benda bo na kutala ti na kuyindula bo mosi malongi ya Bible. Longi lenda pesa bo mpila ya kutuba mabanza na bo na ntangu ya classe. Longi lenda tuba ve kaka mabanza na yandi mosi.

Babakala ti bankento ke zolana bo na bo—mbala ya nkaka, kuluta mingi. Longi lenda pesa bo ntangu ya bo lenda kuzabana bonso banduku. Kana makelele basika mingi na kati ya babakala ti bankento, dibundu lenda tula babakala na classe na bo ti bankento na classe na bo.

6. INKI MPILA BO KELE KUYELA NA KIMPEVE?

Bo lenda sala decisio sambu na Yesu, kieleka bo ke salaka badecision mingi, kansi kana yo simba, bo mosi fweti zenga yo. Longi lenda pesa bo occasio ya kuzenga, kansi benda bo ve ngolo na kingolo.

Bo ke na mfunu na kumona inki mutindu KUSADILA malongi ya Bible. Tula ngolo ti ntangu na membu ya devoir. Solula na kati na bo inki Bible ke tuba sambu na luzingu na bo. Pesa basituatio mingi bonso lenda tadila bo.

Bo zola kumeka konso mambu ya mpa. Bo ta sala konso mambu ya bo ke banza ta kumisa bo bonso muntu: badrog, bandinga ya mbi, sex, rebellio...Konso mambu ya mbi lenda simba bo nswalu. Yo kele mfunu nde longi longa na mutindu na mutindu, sambu bo mona mambu ya mpa na kati ya dibundu.

Yo kele ntangu ya mbote kusosa banduku ya nkaka ya me yela ve na bafami ya bakristo.

Bo ke na nzala kumona nde bo kele mfunu na meso na nge. Yo kele mfunu mingi kuzaba bazina na bo, kupesa bo ntangu, kuvanda sikamosi ti bo, kusolula na bo, etc.

Bo ke na nzala na kumona nde bo kele mfunu mpe na meso ya dibundu. Kusosila bo mpila ya bo nde sadila Nzambi na kati ya dibundu.

Bo ke na mfunu kuzaba nde kikristo fweti kwenda nzila mosi ve ti emotions. Nzambi lenda vanda na kiese na bo ata bo me lemba, ata bo ke na mawa, etc.

Bo kele na mfunu kuzaba inki bo fweti sala kana bo rater, to kana bo sala masumu. Longa bo nde Nzambi lenda pesa bantu occasion ya zole na kulemvuka kana bo me bebisa occasion ya ntete. Mbandu: Histoire ya Yonasi lenda longa bo kundima ti kubika masumu na bo, ebuna Nzambi ta lolula bo ti bo lenda yantika diaka (1 Yoane 1:9, Bingana 28:13).

Bo kele kubakisa nswalu kana muntu kele ya kieleka. Longi kele mfunu bonso mbandu ya mbote.

Bajeune ya 4e, 5e, 6e na Ecole Secondaire (Jeunesse)

1. INKI MPILA BO KELE KUYELA NA NITU?

Nitu na bo kele penepene na kuvanda bonso mbuta.

Bankento kele kuala kuluta bonso nkento (ndima role ya nkento)

Periodes kuluta regulier

Estrogen na zulu bamposo 2 ya ntete ya cycle, ebuna ntima fuluka na kiese, luzolo. Progesterone na zulu bamposo 2 ya nsuka, ebuna na ntangu yina bo bo kele na kiese mingi ve. Ntangu yina, bo kele na mfunu ya assurance ti luzolo ya bantu ya nkaka. Bilumbu zole na ntuala ya regle, bo kele na ntima ya kunwana. Bo ke na mfunu na kuzaba nde yai kele normal, ye bo ke na mfunu na kulonguka controller mpila bo sala na bilumbu na ntuala ya periode na bo. Bo ke na mfunu kuzaba inki mutindu kusala kana bakala zola sala na mpila ya bo ndima ve.

Bakala—En general, androgens na zulu ya kuluta—age 17

(Na mvula yai nsatu sexuel kele kuluta, kansi na ntuala age ya marriage) (Na bankento mvula ya nsatu sexuel mingi kele age 30!)

Babakala kele na mfunu ya kulonguka control ya nitu ti ya mabanza, ebuna bo kele na mfunu ya mambu mingi ya mbote ya kusala ti ya kuyindula.

Babakala ti bankento, bo zole kele na mfunu ya limites sexuel ya bo mosi ndima ti Nzambi mpe ndima.

Yo kele mfunu nde longi yandi mosi kele mbandu ya mbote na mambu ke tadila sex ti fami.

Bo zola vanda active mingi. Bo zola kusala. Sport, danse, théâtre, kusamuna—yonso kele kubenda bo.

2. INKI MPILA BO KELE KUYELA NA MABANZA?

Bo lenda bakisa mambu yonso ya bambuta ke bakisa, kansi mambu ke konda bo kele experience. Kutanga histoire ya bantu lenda sadisa bo na kuyela na experience. Kuwa batemwe ya bantu ya nkaka to ya longi lenda yika bo experience. Kusala theatre ti jeux de role mpe lenda sadisa.

Bo ke na mfunu kubakisa mbote SAMBU NA INKI dibundu me tula bansiku mpila yo kele. Longi lenda sadisa bo yindula sambu na inki ata Bible me tula bansiku mpila yo kele.

3. INKI MPILA BO KELE KUYELA NA NTIMA?

Kisakasaka kele kukita ndambu. Emotions ke yantika kulanda raison.

Mono kele nani? Ke continuer, kansi ndambu ke yantika kuyilama.

Bo sosa ntangu ya mbote, plaisir.

4. INKI MPILA BO KELE KUYELA NA KINDUKU TI NA KIMPANGI?

Banduku kele mfunu mingi—ke monika bonso bantu yonso.

Mabanza ya banduku kele mambu ya luta mfunu.

Bo ke na mfunu na kusala kinduku ya mbote ya bakala ti nkento. Kinduku yai lenda luta kimpangi ya fami na mabanza na bo. Dibundu fweti pesa bo ntangu ti kisika na kuvanda sikamosi na mpila ya mbote. Kuluta mbote classe ya ecodim vanda na kimvuka, kansi babakala ti bankento lenda vukana bo mosi mbala na mbala sambu na kusolula makambu ke tadila bo mosi.

5. INKI MPILA BO KELE KUYELA NA KIMPEVE?

Keti-keti (doutes) ti baquestion ke continuer.

Bo ke na nzala ya kudipesa—bo ke na ntima bonso croisadeur. Bo zola SADILA Yesu. Sosa sika ya konso jeune lenda sadila Nzambi na kati ya dibundu: kulonga to kusadisa na malongi ya bana ya fioti, kusamba na kimvuka, kutwadisa bampangi ya nkaka, kuyimba na chorale, kuvanda na equipe ya theatre to equipe ya kukina.

Bo ke na nzala ya kubakisa lukanu to luzolo ya Nzambi sambu na luzingu na bo. Yindula mingi mambu ya devoir ya lesu. Baka ntangu ya kulunga sambu na yo. Lomba barapport inki bo salaka.

Bajeune mingi balula ntima kana bo me ndima Yesu ntete ve. Yai ta vanda occasio ya nsuka ya bo lenda tula ntima na Yesu na kileki na bo. Longi lenda samba Nzambi ngolo nde bo yonso kuma bakristo na bamvula yai kana bo me yamba Yesu ntete ve.

YINDULA MBOTE

Inki age to niveau kele kubenda mabanza na nge mingi? _____

Sonika mambu iya ya mpa ya nge me longuka sambu na age to niveau yina:

- 1) _____
- 2) _____
- 3) _____
- 4) _____

Sonika bampila iya ya mbote ya kulonga age to niveau yina:

- 1) _____
- 2) _____
- 3) _____
- 4) _____

Sonika ngindu mosi ya nge zola meka mwa-nswalu ti age yina:

.....

Keti nge mona nde ntangu me lunga, nde beno tula konso mwana na niveau na bo na dibundu na nge? _____

Kana yo me lunga ntete ve, inki kele kukanga nzila? Inki fweti salama ntete? _____

Bambutu (Adultes)

Bo kele kuyela diaka ve bonso bana kele kuyela, kansi...

- Bantu lenda continuer kulonguka moyo ya bo ya mvimba. Yo kele mfunu na kuvanda na education continuelle sambu na bambuta.

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



- Experience, niveaux ti interet na bo ikele ya diswaswanu mingi. Yo landa education, ksalu, sika bo kele kuzinga ti bisika ya nkaka ya bo me zinga to ya bo me mona, position na bo na kati ya fami, etc. Mbote longi zaba niveau na bo ti mambu ya bo ke zola, ebuna yidika malongi sambu na yo.
- Bachangement ya nene ta kwisa na luzingu ya konso munti—yo landa kuyela ya fami.
 1. Marriage—bo fweti yindula mambote ti luzolo ya muntu ya nkaka bonso yina ya bo mosi konso lumbu.
 2. Lubutuku ya bana—mama na nzo kele kukangama na ksalu ya kuluta, mbongo basika kuluta.
 3. Bana kota nzo-nkanda—mama yantika kuvanda ndambu libre diaka, mbongo basika kuluta.
 4. Bana kota jeunesse—baprobleme ya communication, rebellion, kisakasaka, sex, etc.
 5. Marriage ya bana—bo buta bana (bo kota na relatio ya nkaka ti bo), probleme ya dote.
 6. Bana kele diaka ve na nzo, bo kuma bantu zole diaka. Mbala ya nkaka bana kele ntama ti bibuti, ti bo mona bo mingi ve.
 7. Bachangement-menopause to nsuka ya bangonda na yandi hormones kita nswalu—kisaksaka na nitu, ntima, mabanza.
 8. Nsuka ya ksalu, kana yo vandaka (pensio). Bantu ya nkaka fweti sadisa bo.
 9. Kununa—ngolo ve ya nitu, vila mambu nswalu, bantu ya nkaka fweti sadisa mingi, bo kele na mawa, bo zola kufwa.

Longi fweti yindula—ba adultes na classe na yandi ikele wapi na mambu yai? Inki malongi lenda sadisa bo na kuyilama ti na kupesa Nzambi kiese na sika bo ikele?

Bambuta lenda kuwa malongi ata 30 minutes kana yo kele mbote. Kansi mbote na kuyula bo bangiufula, kuluta kana bo zaba kutanga ti bo kele na niveau na zulu.

Kana longi ke yula mbuta mambu, yo kele mfunu mingi nde yandi pesa nsoni ve kana muntu zaba ve, to kana yandi tuba kifu. Kaka tuba nde, “Kuwa verse yai diaka. Kuwa mbote. Yo ke songa inki?” Ebuna tanga verse yina diaka na malembe yonso.

Bambuta ya nkaka ta vanda ngolo ve na kubambuka verse ya nda bonso bajeune. Longi fweti longuka ngolo na bo na mambu yai. Sola verse ya bo lenda simba.

KITINI YA NSAMBWADI ADMINISTRATIO

Kapu Makumi Zole na Tanu

Inki Kele Mpila ya Mbote Ya Kusala Rapport ya Ecodim?

Longi lenda longa bana mbote-mbote, kansi kana rapport ikele ve, nani ta zaba ksalu na yandi? Mambu ya mpasi lenda vanda ya bamfumu ya dibundu lenda sadisa, kansi kana bo mona ve rapport ya ecodim, bo ta sadisa inki mutindu? Rapport kele mfunu mingi na ksalu ya ecodim. Yo kele mfunu nde rapport ya ecodim vanda clair, yo vanda kieleka, ti yo kuma na kisika na yo konso ntangu na ntangu ya mbote.

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



KUTINDA RAPPORT NA NANI?

Konso dibundu kele na kiyeka ya kulomba rapport ya ecodim, ti na kusonga na inki form bo zola kumona rapport yina. Longi fweti solula mbote ti responsable ya dibundu sambu na kuzaba inki mutindu dibundu zola kubaka rapport. Ministères pour Chaque Enfant me sala form ya rapport ya mabundu mingi kele kusadila. MCE kele lombamba nde copi ya ntete ya rapport yina kwenda na dibundu, ye copi ya zole kwenda na bureau na beto, na maboko ya Responsable ya Centre des Matériels ya beto me tula. MCE kele na kiyeka ve na zulu ya ecodim, sambu yo kele program ya dibundu. Kansi, barapport ya mabundu kele kutinda beto na luzolo ya mbote na bo, rapports yai kele kusadisa beto kukwenda kulomba diaka lusadisya ya bakristo ya nkaka na bainsi mingi. Kana bo zaba nde kieleka, ecodim kele kuyela sambu na formatio ya MCE kele kusala, bo ta vanda na nzala na kutinda lusadisya ya nkaka.

RAPPORT FWETI VANDA CLAIR-- Inki mutindu kusala rapport ya MCE

Rapport ya MCE ke lombamba kuzaba mambu yai:

Sonika mambu yai sambu na KONSO CLASSE:

Nani longaka---Zina complet ya balongi ti bansadisi yonso ya lumbu yina

Total ya Bana --- Bana ikwa kuwaka malongi

Total ya Bambuta-Bambuta ikwa kuwaka malongi—Balongi, bansadisi, baparent

Obs. --- Observatio –Inki mpila longi monaka classe ya lumbu yina?

Verse --- Inki verse ya Bible bana longukaka na kutuba yo na munoko sambu bo kubambuka yo?

Nkanda, No. ya Leso --- Kana lesa ke basika na mukanda ya baleso, sonika zina ya mukanda yina, ti nombre ya lesa. Kana lesa ke basika na Bible, sonika zina ya mukanda ya Bible, kapu ti baverse ya lesa.

Total ya baconverti --- (Tala nsuka ya rapport) Converti kele mwana ya vandaka kuyamba Yesu ntete ve, kansi kaka na bilumbu yai yandi me balula ntima, me tula ntima na Yesu Kristo.

Total ya Balandi ya Mpa --- (Tala nsuka ya rapport) Mulandi ya mpa kele mwana ya me balula ntima, ebuna na nima yandi me kota malongi ya mbotika. Na nsuka ya malongi yina, bana yai ta baka mbotika.

Rapport ta vanda na baligne to bisika 5 ya kusonika. Konso mposo kele kubaka ligne to kisika mosi. Dibundu ta sonika na ligne ya tanu kaka kana ngonda yina kele na bamposo tanu na kati na yo. Na nsi ya rapport ya konso ngonda, kele kisika na kutula total ya bana sambu na ngonda yina. Kaka additioner total ya konso mposo. Total yina kele total ya ngonda.

Dibundu lenda sonika mambu yai na cahier na bo. Ebuna na nima ya bangonda sambanu (na ngonda ya janvier ti ya juillet), bo lenda vukisa barapport yonso ti tinda yo na MCE.

MCE kele kuyula mambu ya nkaka na nsuka ya rapport na bo. Beto kele kuyula banzo ikwa kele na bwala. Kana mpila kele, tanga yo. Kana ve, sonika kiteso ya bainzo ya nge banza kele na bwala. Yai kele mfunu na kuzaba kana ecodim lenda yela mingi diaka to yo lenda yela ve.

RAPPORT YA ECOLE DU DIMANCHE

Bangonda-----Mvula-----

Communauté ----- Paroisse ----- Responsable ya Paroisse-----

Bwala to kisika ya ecodim-----

Centre des Matériels----- Charge de Centre des Matériels-----

MB: Sala bacopi zole. Tinda mosi na Ministères pour Chaque Enfant na Mission Garizim. Pesa copi ya zole na chef de paroisse sambu na rapport ya dibundu.

Ngonda-----Mvula-----

Nani longaka *Total *Total *Obs. *Verse *Nkanda, No. ya lesa

	*Total ya Bana	*Total Bambuta	*Obs.	*Verse	*Nkanda, No. ya lesa
1.	*	*	*	*	*
2.	*	*	*	*	*
3.	*	*	*	*	*
4.	*	*	*	*	*
5.	*	*	*	*	*

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



Total/ngonda * * *****

Ngonda-----Mvula-----

Nani longaka	*Total Ya Bana	*Total Bambuta	*Obs.	*Verse	*Nkanda, No. ya leso
1.	*	*	*	*	*
2.	*	*	*	*	*
3.	*	*	*	*	*
4.	*	*	*	*	*
5.	*	*	*	*	*Total/ngonda * *
Total /ngonda	*	*	*****		

Nani longaka	*Total ya Bana	*Total Bambuta	*Obs.	*Verse	*Nkanda, No. ya leso
1.	*	*	*	*	*
2.	*	*	*	*	*
3.	*	*	*	*	*
4.	*	*	*	*	*
5.	*	*	*	*	*
Total/ngonda	*	*	*****		

Ngonda-----Mvula-----

Nani longaka	*Total ya Bana	*Total Bambuta	*Obs.	*Verse	*Nkanda, No. ya leso
1.	*	*	*	*	*
2.	*	*	*	*	*
3.	*	*	*	*	*
4.	*	*	*	*	*
5.	*	*	*	*	*
Total/ngonda	*	*	*****		

Ngonda-----Mvula-----

Nani longaka	*Total Ya Bana	*Total Bambuta	*Obs.	*Verse	*Nkanda, No. ya leso
1.	*	*	*	*	*
2.	*	*	*	*	*
3.	*	*	*	*	*
4.	*	*	*	*	*
5.	*	*	*	*	*Total/ngonda * *
Total /ngonda	*	*	*****		

Nani longaka	*Total ya Bana	*Total Bambuta	*Obs.	*Verse	*Nkanda, No. ya leso
1.	*	*	*	*	*
2.	*	*	*	*	*



3.	*	*	*	*	*
4.	*	*	*	*	*
5.	*	*	*	*	*
Total/ngonda	*	*	*****		

Beto kele kuyula inki bamambu ke pesa balongi kiese na ecodim. Longi lenda sonika kitemwe ya mpila malongi me sadisa bana, inki mutindu luzingu na bo me soba, kana bana, bibuti, to bamfumu kele na kiese na yo. Batemwe yai lenda sadisa beto mingi na kubenda mabanza ya bakristo ya nkaka ya lenda sadisa na kosalu yai.

Beto kele kuyula inki bampasi longi kele kumona na kusadila bima ya beto na MCE ke defisa beno sambu na kulonga. Longi lenda bakisa mukanda ya baleso? Baleso kele mpasi to mpasi ve? Kana yandi ke mona nde ndambu mosi ke kwenda mbote mingi ve, to kana yandi ke bakisa ve inki mutindu kusadila materiel ya nkaka, yai kele kisika yandi lenda songa mpasi yina.

Beto kele kuyula inki mambu beto lenda tula na lombilu. Beto lenda baka ba-intentio de priere ya ke tadila classe to ya ke tadila dibundu, to ya ke tadila longi yandi mosi ti fami na yandi.

Beto kele kuyula inki mabundu ya nkaka kele na bwala. Yai lenda songa beto mbala mosi na inki mabundu ya nkaka beto lenda sala na collaboratio, ti inki competitio ecodim kele kumona. (Inki mabundu ya nkaka kele kubenda mabanza ya bantu.) Mvutu na ngiufula yai ta sadisa beto mingi-mingi na kuyidika lukanu sambu na kupusa ecodim na bilumbu ke kwisa.

Beto kele kuyula inki ba-activite ya nkaka beno ke sala na ecodim. Beno kele kusala sport? Chorale? Kukina? Théâtre na bisambu? Club? Classe ya alphabetisatio to ya foyer? Beno me sala “Kilumbu ya Bana” to “Fete ya Ecodim” to mambu ya nkaka? Ngindu ya dibundu ya nge lenda sadisa mpe mabundu ya nkaka, ti rapport ya activites lenda benda mpe mabanza ya bantu ya zola sadisa kosalu yai.

Beto na MCE zola kutuba diaka nde kana dibundu ke lomba balongi kusonga bo mambu ya nkaka, mbote beno lemfuka nswalu na yonso ya bo lomba beno na kusonga bo. Dibundu kele na kiyeka ya lenda pusa to ya lenda kanga ecodim na bwala na nge. Nzala na beto ikele nde balongi yonso sala na kintwadi mosi ya mbote na kati ya mabundu na bo.

RAPPORT FWETI VANDA KIELEKA

Rapport ya luvunu ke sadisaka nani? Kana longi sonika nde bana 200 balulaka ntima na Yesu, kansi yonso kele luvunu sambu yandi kumonika mbote na meso na beto, tuba nde yandi ta mona nsoni na lumbu ya beto kwisa na kutala baconverti yina. Kana ve, tuba nde yandi ta mona nsoni mingi na lumbu ya Yesu ta yula yandi mambu yina. Ntalu 32:23 ti Luka 12:2-13 kele kutadila mambu yai (ya rapport ya kieleka) inki mutindu?

RAPPORT FWETI KUMA NA KISIKA NA YO NA NTANGU YA MBOTE

Konso longi ye konso directeur ya ecodim fweti zaba na inki ntangu dibundu ke zola kumona rapport ya ecodim. Bo fweti tinda rapport ya dibundu na bo na ntangu ya dibundu kele kulomba yo, ata yo vanda luswaswanu ti ntangu ya MCE kele kulomba yo. Bambuka nde dibundu kele na kiyeka kulomba rapport. Kana rapport kuma na bo ve, dibundu kele na kiyeka na kukanga ecodim. MCE kele na kiyeka ve na zulu ya ecodim. Kele kaka na luzolo ya mbote ya beto na MCE kele kulomba barapport. Yo sadisa beto, ye yo sadisa konso ecodim, sambu kana barapport kuma na beto mbote, beto kele na mpila kusosa lusadisusu ya nkaka. Kansi rapport ya mfunu mingi, rapport ya ntete-ntete ya bantu fweti yindula, kele rapport ya bo ke tinda na dibundu.

YINDULA MBOTE

Meka kusala rapport ya ecodim ya MCE na mpila ya nge ke mona yo awa. Nge kele kubakisa mambu yonso ya kele na rapport yai?

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



Solula ti dibundu na kuzaba inki rapport bo ke lomba, ti na inki ntangu bo fweti mona yo. Sonika awa mvutu bo me pesa nge:

Kapu Makumi Zole na Sambanu

Inki Kele Mpila ya Mbote Kusala Organisatio ya Ecodim?

Mambu ya ntete-ntete, ya mfunu mingi ya beto fweti bakisa kele nde ecodim kele program ya dibundu. Yo kele na nsi ya kiyeka ya dibundu bonso bachorale, federatio ya bamama, to konso program ya nkaka. Balongi to badirecteur ya ecodim lenda ve kusala bonso bo kele na nganda ya dibundu, bonso bo kele program ya bo mosi ya ke zaba dibundu ve. Bo lenda ve baka Ministeres pour Chaque Enfant bonso yo kele organisme ya kele kutwadisa ecodim. **DIBUNDU IKELE ORGANISME YA KELE KUTWADISA ECODIM. Ministères pour Chaque Enfant kele kaka nsadisi ya Nzambi me pesa sambu na kusadisa dibundu na kusalu na bo ya ecodim.**

Dibundu kele na kiyeka ya kukangula ecodim to ya kukanga yo. Dibundu kele na kiyeka na kutuba inki bana ta sala na ecodim ya kele na bo. Dibundu kele na kiyeka ya kuzenga inki ntangu ecodim ta salama, wapi yo ta salama, banani ta longa to ta sadisa to ta twadisa yo, kana bo ta baka makabu, ti inki bo ta sala na makabu yina kana bo me baka yo. Dibundu kele na kiyeka kupesa discipline to ndola na balongi to basadi ya zinga ve to ya sala ve na mpila ya dibundu kele ndimaka. Dibundu kele na kiyeka kulomba rapport ya ecodim. Dibundu kele na biyeka yai yonso sambu ecodim kele ntete-ntete program ya dibundu.

Na bisika mingi, ecodim ke yantika kaka na longi mosi to balongi zole. Bo fweti bakisa nde bo ke sala na dibundu na nsi ya kiyeka ya muntu ya kele responsable ya dibundu na bwala yina. Responsable yina kele na bamfumu ya nkaka na zulu na yandi, ebuna bo yonso mpe kele na zulu ya longi. Balongi yina fweti sosa na kuvanda mpe na kusala na kintwadi ya mbote ti responsable ya dibundu. Bo lenda solula ti yandi ti samba sikamosi ti yandi sambu yandi bakisa mbote inki bo zola kusala na ecodim. Bo lenda luta ve kiyeka ya dibundu kele kupesa bo.

KISALU YA PASTEUR TO RESPONSABLE YA DIBUNDU

Pasteur to responsable ya dibundu kele kulonga na ecodim ve, kansi yandi kele muntu ya mfunu mingi na program ya ecodim. Yandi kele muntu ya fweti pesa rapport ya ecodim na dibundu. Yandi kele mvungi ya dibundu ya mvimba, yo yina, yandi fweti landa mpe program ya ecodim. Bantu yonso ya nkaka kele na nsi ya kiyeka na yandi. Bo fweti sala na kintwadi ti yandi.

Pasteur to responsable ya dibundu kele na kusalu ya nene na kusonga bibuti ya bana mfunu ya ecodim. Kana yandi kele kubenda bo, kana yandi ke songa mabanza ya mbote, kana yandi ke songa nde yandi kele na kiese sambu na ecodim, ecodim ta kuma ngolo mingi na dibundu na yandi. Bana ta kota mingi, ye na nima bo me longuka ndinga ya Nzambi, bo ta vanda bamambre ya mbote ti na ngolo na kati ya dibundu.

KISALU YA DIRECTEUR TO DIRECTRICE YA ECODIM

Na bisika ya nkaka, balongi kele ndambu mingi. Bana kele mingi, ye dibundu zola tula konso mwana na classe bonso niveau na yandi. Kana baclasse zole to kuluta yo ikele, mbote dibundu tula muntu mosi directeur to directrice. Muntu yina fweti vanda muntu:

- ya me baka formatio ya kilongi
- muntu ya kele kupesa encouragement na bantu ya nkaka
- muntu ya kele na kuzinga na kintwadi ya mbote na kati ya dibundu.

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



Kisalu na yandi ta vanda:

- Kutala program ya mvimba ya ecodim nde yo ke salama na mpila ya mbote.
- Kusadisa ti kupesa encouragement ti bangindu ya mbote na balongi.
- Kupusa ecodim na mpila yonso.
- Kuwakana ti responsable ya dibundu na mambu yonso.
- Yidika mambu.
- Sosa balongi ya mpa ya lenda vanda mfunu mbala na mbala.
- Yandi lenda sadisa kulonga bana ya me balula ntima na Yesu, kubenda bo kukota malongi ya balandi, etc.
- Baka barapport ya balongi, vukisa yonso, ti tinda yo na sika yo fweti kwenda.
- Baka materiels ya Centre des Materiels kana yo kele mfunu, mpe vutula yo.

KISALU YA SECRETAIRE YA ECODIM

Kana ecodim kuma nene, secretaire lenda sadisa directeur ya ecodim. Yandi muntu ta baka ti ta vukisa barapport ya konso classe konso mposo. Yandi muntu ta pesa yo na directeur. Kana dibundu zola, yandi lenda tanga rapport ya nkufi konso mposo na meso ya dibundu. Kana yo kele mfunu na kusonika mikanda sambu na ecodim, secretaire muntu ta sala yo.

KISALU YA TRESORIER YA ECODIM

Kana ecodim kuma nene, tresorier mpe lenda sadisa directeur ya ecodim. (Kana muntu ya kufwana me monika ve, yandi lenda vanda secretaire ti tresorier mbala mosi, to tresorier lenda vanda tresorier ya dibundu mbala mosi.) Tresorier kele muntu ya ta simba mbongo ya makabu kana bana kele kupesa yo. Yandi ta sonika rapport ke songa ikwa kotaka konso mposo, ti ikwa basikaka, ti mbongo ya basikaka sumbaka inki, ye basikaka na maboko ya nani. Ata yandi kele kusimba mbongo ti kupesa rapport na yo, yandi lenda tanga makabu ve kaka yandi mosi. Kuluta mbote dibundu tula comite ya bantu tatu ya kutanga mbongo ya ke kota na makabu. Na nima, bo ta pesa yo na tresorier ti yandi ta tanga yo diaka. Longi lenda simba ve mbongo ya makabu, kansi dibundu lenda sadisa yandi na mwa-lusadisusu na mpila ya bo ta zenga.

Kana dibundu mona mpila bo lenda sadisa balongi na prime, yo ta salama mutindu yai:

- Mbongo ta kota na makabu.
- Comite ta tanga yo.
- Bo pesa yo na tresorier.
- Yandi tanga yo diaka.
- Yo ta kota na caisse ya ecodim.
- Konso ngonda na mpila ya dibundu ta zenga, tresorier ta basisa mbongo kiteso ya dibundu me ndima na kupesa balongi to basadi ya nkaka mwa-lusadisusu.
- Tresorier ta pesa rapport na dibundu.

KISALU YA COMITE YA MAKABU

Ata longi vanda kaka yandi mosi to bo vanda mingi, yo kele mfunu nde bo kusimba ve mbongo ya makabu. Dibundu lenda tula bantu zole to tatu ya kwikama comite ya makabu. Bo fweti vanda bantu ya lenda vanda penepene na ntangu ya ecodim. Bo ta tanga makabu ti pesa yo yonso na tresorier.

KISALU YA BANSADISI

Mbote konso longi vanda na nsadisi ya lenda sadisa yandi na ntangu ya ecodim. Nsadisi lenda sadisa na ordre, yandi lenda sadisa na bansaka, ti na nima ya ecodim, yandi lenda sadisa kutula na bisambu bana yonso ya basika na nganda. Mpidina longi lenda twadisa bana na Yesu ya me kwisa kundima ntangu yandi bingaka bavidu na Yesu. Kuvanda nsadisi kele mpila mosi ya mbote ya muntu lenda tesa kana Nzambi me pesa yandi makabu ya kulonga. Yo kele formation mosi ya ngolo. Bantu mingi ya sala mbote bonso bansadisi ta kuma balongi na nima ya ntangu. Kana longi kele kubela, nsadisi lenda meka kulonga bana yandi mosi na mpila ya yandi me mona longi kusala yo.

MDANDU YA ORGANISATION YA ECODIM:

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



KUYINDULA DIAKA

Banani lenda simba makabu ya ecodim?

.....
Konso muntu ya ke sala na ecodim keke na nsi ya kiyeka ya nani to ya inki?

.....
Ecodim keke program ya nani to ya inki?

.....
Mbote konso longi vanda ti nani?

KUYINDULA MBOTE

Sonika awa zina ya muntu keke responsable ya dibundu na bwala na nge:

.....
Keti nge keke kundima nde yandi keke responsable na kutala mambu yonso ya ke salama na kati ya dibundu? Sambu na inki?

.....
Inki organisatio keke sesepiyai na bwala na nge sambu na ecodim? Sonika lukanu na yo awa, ti bazina ya bantu yina:

.....
Kana nge keke penepene na bantu ya nkaka ya keke kulanda formatio yai, solula ngiufula yai sikamosi: Inki organisatio lenda sadisa beno na mambu ya ecodim? Inki mabanza beno zola solula ti pasteur? Sonika yo awa:



.....

Keti nge kele na ngindu banani lenda vanda mbote na kusala mambu yai ya kele mfunu na ecodim? Sonika bazina na bo awa. Na nima, tula yo na lombilu, ye solula yo ti pasteur, sambu na kuzaba kana yandi ta ndima yo. Solula yo mbote mbote ti yandi.

.....

Kapu Makumi Zole na Nsambwadi

Inki Kele Mpila ya Mbote Kupusa Program ya Ecodim?

Dibundu ta zola kumona nde bana yonso kele na kati ya ecodim. Bakwikidi yonso ta zola kupusa program ya ecodim sambu bana kota yo mingi. Kansi kele bantu ya nkaka ya kele na kusalu ya nene na kupusa yo. Ntete na kati na bo kele pasteur to responsable ya dibundu. Ya zole na kati na bo kele directeur ya ecodim. Ya tatu na kati na bo kele balongi ti bansadisi yonso.

MPILA PASTEUR LENDA PUSA ECODIM

Bakwikidi lenda bakisa nswalu mabanza ya pasteur. Pasteur lenda tuba nde ecodim kele mbote. Kutuba ya pasteur kele mfunu mingi. Kansi bantu ta bakisa nswalu kuluta kana kieleka na ntima yandi kele kumona yo mfunu. Mabanza na yandi ta vanda kima mosi ya lenda pusa to kanga nzila na ecodim. Pasteur fweti kusonga bakristo mambu ya ecodim. Yandi fweti benda mabanza na bo na kutinda bana. Mono ke tuba mbote nde yandi ta BENDA bo. Mbala mingi bapasteur nganina bantu bonso bo zola kupesa bantu nsoni, to bo commander bantu bonso bo kele kupusa bo na kingolo-ngolo. Mpila yai kele kusadisa ve. Kieleka, yo kele kubebisa ecodim. Pasteur fweti benda bantu na kusonga bo mambu yonso ya mbote ya ecodim-- inki mutindu yo ta sadisa bana, fami, dibundu, etc. Yandi fweti songa bibuti mambu yonso ya kele mfunu—inki ntangu, wapi, nani ke longu, inki makabu bana lenda nata, etc. Mbote yandi tuba mambu yai bamposo tatu to iya na luyantiku ya ecodim, ti diaka konso ntangu na nima ya bangonda tatu to iya.

KUSADILA FICHE YA KUKOTISA BANA

Na baparoisse ya nene, fiche ya kukotisa bana na ecodim lenda sadisa. Pasteur ta pesa fiche mosi na konso fami, ye bo ta sonika bazina ti bamvula ya bana na bo ya kele kukota na ecodim. Bo vutula yo na nima ya mposo mosi, ti dibundu lenda yidika baclasse bonso bamvula ti niveau ya bana. Yo sadisa longi sambu yandi yantika na liste ya bana ya fweti kota. Ata dibundu me sadila fiche na nsuka ya yina, mbote bo kangula nzila na bana ya nkaka ya zola kota na nima. Mbandu ya fiche yina kele kulanda kapu yai.

Kana dibundu pesa rapport ya ecodim na ntangu ya bisambu, yo lenda bambukisa bantu ya nkaka ya me kota ntete ve. Rapport yina fweti vanda na enthousiasme, ata bana vandaka mingi ve. Rapport lenda tuba ve nde, “Beto mona ecodim kele kaka kukita.” Yo lenda pesa nombre kaka, ebuna songa mambu mosi ya mbote ya bana salaka to longukaka. Mbala na mbala, mwana lenda tuba verse ya yandi me longuka na ecodim, to bana lenda yimba na kimvuka nkunga ya bo me longuka. Kana foto to mwa-théâtre vandaka, bo lenda songa yo.

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



CHORALE YA ECODIM

Na bisika mingi, bana ya ecodim kele kusala chorale na bo mosi. Bachorale ya nkaka kele kukina, to na kunikisa bansinga sambu na kusonga kiese. Kana groupe bonso yai lenda salama, yo lenda bambukisa bantu diaka makambu ya ecodim.

MAMBU YA NKAKA YA KELE KUBENDA BANA

Na bisika ya nkaka, dibundu kele kusosa mpila na kubenda bana na ecodim. Bampila kele mingi. Kana bana ya bwala kele mingi, bo lenda yantika classe ya alphabetisatio. Ebuna ecodim kulanda yo. Na bisika yonso, sport to nsaka ya konso mutindu kele kubenda bana. Na nima, bo kota na ecodim. Kiteso mosi, kana bajeune kele ngolo na misiki, bo lenda yimba ti kutwadisa bana na kukina. Na nsuka, bana kota na ecodim. Na bisika ya nkaka, bo kele kuyantika ecodim na defile ya kele kutambula na banzila ya bwala. Yo kele kubinga bana mingi. Na nima, bo suka na nzo-Nzambi. Bo kota, ye bo sala ecodim.

KUBENDA BANA YA NGANDA

Kana dibundu zola binga bana ya mabundu ya nkaka, bo fweti tala ntete ntangu ya ecodim kele kusalama, nde yo kele ve kiteso mosi ti ntangu ya dibundu yina kele kubinga bana na bo. Diaka, dibundu lenda vanda na baclub ya Bible ya kele kuvukana na bilumbu ya nkaka na kati ya banzo ya bakristo. Benda bana yai ya nganda ntete na kati ya baclub. Na nima yo me simba mbote, benda bo na ecodim ya kele kusalama na lumingu. Mpila yai, bantu mingi me losa boma ya bo vandaka na yo sambu na bamisioni. Mingi me yamba Yesu, ti ya nkaka na kati na bo me kota kimakulu na dibundu. Lukanu yai kele kulomba ntangu, kansi yo lenda sadisa.

JOURNEE DES ENFANTS

Mbala mosi konso mvula, dibundu lenda sala “Journée des Enfants” to “Kilumbu ya Bana”. Na lumbu yina, bana ya ecodim lenda songa na meso ya dibundu mambu mingi ya bo me longuka to ya bo me sala na ecodim. Bana lenda simba bitunga ya makabu. Bo lenda twadisa na lombilu. Bo lenda twadisa animatio ye yimba bankunga na bo. Bo lenda tuba baverse ya Bible, na kimvuka to mosi-mosi. Bo lenda songa histoire ya Bible na théâtre. Program ya mvimba ya lumbu yina ta vanda na maboko ya bana. Bantu mingi ya me mona program ya lumbu yina me tuba nde, « *Kieleka, beto bakisaka ve nde bana lenda longuka Bible mutindu yai! Beto zola kutinda mpe bana na beto sambu bo kota ecodim nswalu!* »

KUYINDULA MBOTE

Inki bangindu nge zola sadila nswalu sambu na kupusa ecodim na dibundu na nge?

MBANDU YA FORMULAIRE SAMBU NA KUBAKA INFORMATIO:

EGLISE DU CHRIST AU CONGO
DEPARTEMENT DE L'EDUCATION
CHRETIENNE 35e-C.U.E.B.C
B.P.78 KIKWIT II

I. INFORMATIONS DEMANDEES AUX PARENTS POUR L'ECOLE DE DIMANCHE

Nom et Post-Noms des Parents (ou tuteurs):-----

Adresse:-----

Every Child Ministries (Ministères pour Chaque Enfant)
Ecole du Dimanche Kulonga Bana par Maman Lorella Rosuter

www.teachingforafrica.com



Nombre d'enfants:

NO.	NOM 7 POST-NOMS	SEXE	DATE DE NAISS.	OBS.
01				
02				
03				
04				
05				
06				
07				

Fait a Kikwit, le / /19__

LE RESPONSABLE DE DEPARTEMENT DE L'EDUCATION CHRETIENNE
EGLISE DU CHRIST AU CONGO
DEPARTEMENT DE L'EDUCATION CHRETIENNE
35e – C.U.E.B.C
B. P. 78 KIKWIT II

II. INFORMATION POUR L'ECOLE DE DIMANCHE

Moi _____ conscient(e) de l'importance de l'enfant et de son éducation chrétienne dans l'Eglise et dans la société, j'accepte de servir le Seigneur dans cette paroisse a l'école de dimanche comme :

1. Moniteur (trice)
 2. Surveillant(e)
- AVEC UN DON DE ; a) a la garderie (les enfants de 3 ans)
b) au jardin d'enfants (de 3 a 5 ans)
c) Chez les cadets (enfants) de 7 a 9 ans
d) Chez les aines (de 10 a 12 ans)
e) a la jeunesse et aux adultes (de 13 a 20 ans)

Fait à Kikwit, le / /

***Bana na bwala na nge
Kele kubinga!***

***Bo kele na nzala
Ya Ndinga ya Nzambi.***

***Keti nge ta pesa bo
Madia ya Moyo?***